

冊府元龜卷第四百七十一

巡按福建監察御史臣李嗣京 訂正

分守建南道左布政使臣胡維霖 叅閱

知建陽縣事 臣黃國琦 較釋

臺省部 一十五

奏議第二

宋鄭鮮之初仕晉安帝為御史中丞時制長吏以父
母疾去官禁錮三年山陰令沈叔任父疾去職鮮之
因此上議曰夫事相權故制有與奪此有所屈而彼
有所申未有理無所明事無所獲而為永制者也當

以去官之人或容詭托之事誠或有之豈可虧天下之大教以末傷本者乎且設法蓋以衆包寡而不以寡違衆况房杜去官而塞孝愛之實且人情趨於榮利辭官本非所以爲其制者莅官不久則奔競年生故杜其欲速之情以申考績之實卽父母之疾而加以罪名悖義疾理莫此爲大謂宜從奪於義爲允從之於是自二品以上父母沒者墳墓推毀及疾病族屬轉去竝不禁錮

裴松之晉安帝義熙初爲祠部郎松之以世立私碑有乖事實上表陳之日碑銘之作明示後昆自作殊

功異德無以允應茲典大者道勲光遠世所宗推其次節行高妙遺烈可紀若乃亮采登庸績用顯著敷化所莅惠訓融遠述詠所寄有賴鐫勒非斯族也則幾乎潛瀆矣俗弊僞興華煩已久是以孔悝之銘行是人非蔡邕制文每有愧色而自時厥後其流彌多預有臣吏必爲建立勒銘寡取信之實刊石成虛僞之常真假相蒙殆使合美者不貴但論其功費又不_所可稱不加禁裁其弊無已以爲諸欲立碑者宜悉令言上爲朝議所許然後聽之庶可以防遏無徵顯彰茂實使百世之下知其不虛則義信於仰止道秀於

來葉錄是竝斷

孔琳之晉義熙中爲尚書左丞詔衆官獻便宜議者以爲宜修庠序卹典刑審官方明黜陟舉逸拔材務農簡調琳之於衆議之外別建言曰夫璽印者所以辨章官爵立契符信官莫大於皇帝爵莫尊於公侯而傳國之璽歷代迭用襲封之印奕世相傳貴於仍舊無取改作今世唯尉一職獨用一印於內外羣官每遷悉改討尋其義私所未達若謂官各異姓與傳襲不同則未若異代之爲殊若論其名器雖有公卿之貴未若帝王之重若以或有誅夷之臣忌其凶穢

則漢用秦璽延祚四百未聞以子嬰身戮國亡而棄不佩帝王公侯之尊不疑於傳璽人臣衆僚之卑何嫌於卽印載籍未聞其說推例自乖其准而終年刻鑄乖功消實金銅炭之費不可稱言非所以因循舊貫易簡之道愚謂衆官卽用一印無煩改作若有新置官人多官印少文或零失然後乃鑄則仰禪天府非唯小益又曰凶門柏裝不出禮典起自末代稱習生嘗遂成舊俗爰自天子達於庶人誠行之有餘卒革必駭然苟無害於情而有愆禮度存之未有所明去之未有所失固當式遵先典釐革後謬况復兼須

以遊費實爲民患者乎凡人士喪儀多出閭里每有此須動十數萬損民財力而義無所取至於寒庶則人思自竭雖復室如懸罄莫不傾產殫財所謂葬之以禮其若此乎謂宜謹遵先典一罷凶門之式表以素扇足以示凶又曰昔事故飢荒米穀綿絹皆貴其後米價登復而絹于今一倍綿絹旣貴蠶業者滋雖勤勵兼倍而貴猶不息愚謂致此良有其繇昔事故之前軍器止用鎧而已至於襖袍襌襜必俟戰陣實在庫藏永無損毀今儀從直衛及邀羅使命或有防衛送迎悉用袍襖之屬非惟一府衆軍皆然綿帛易

敗勢不支久又晝以禦寒夜兼寢卧曾未周年便自敗裂每絲綿新租以市又諸府競收動有千萬積貴不已實繇於斯私服爲之艱匱官庫爲之空盡愚謂若侍衛所須固不可廢其餘則依舊用鎧小小使命送迎之屬止宜用仗不煩鎧襖用之旣簡則其價自降又曰夫不恥惡食唯君子能之肴饌尚奢爲日久矣今雖改張是期而此風未革所甘不過一味而陳必於方丈適口之外皆爲悅目之費富者以之自矜貧者爲之殫產衆所同鄙而莫能獨異愚謂宜粗爲其品使奢儉有中若有不改加以貶黜則德儉之化

不日而流

何承天爲御史中丞宋文帝元嘉九年魏軍侵遼太祖訪羣臣威戎禦遠之略承天上表曰伏見北蕃上事虜犯青兗天慈降監矜此黎元博達羣策經綸戎政臣以愚陋預聞訪及竊尋儼仇告難爰自上古周室之盛南仲出車漢氏方隆衛霍宣力雖飲馬瀚海揚旆祁連事難役繁天下騷動委輸負海貲及舟車凶狡倔强未肯受弱得失報復裁不相補宣帝末年值其乖亂推亡固存始獲稽服自晉喪中原戎狄侵擾百餘年間未暇以北虜爲念大宋啟祚光耀靈武

懷德畏威用自納款陛下統御以來羈縻遵養十餘年間貢譯不絕去歲三王出鎮思振遠圖獸心易駭遂生猜懼悖違信約深構讐隙貪禍恣毒無因自反恐烽燧之警必自此始臣素庸懦才不經武率其管窺謹撰安邊論意乃淺末懼無可採若得詢之朝列辨覈同異庶或開引羣慮研盡衆謀短長畢陳當否可見其論曰漢世言備匈奴之策不過二科武夫盡征伐之謀儒生講和親之約課其所言未有遠志加塞漠之外胡敵掣肘必未能推鋒引日親自開張當繇往年冀土之民附化者衆二州臨境三王出藩經

略旣張宏圖將舉士女延望華夷慕義故昧於小利且自矜侈外示餘力內堅僞衆今若務存遵養許其自新雖未可羈致北關猶足鎮靜邊境然和親事重當盡廟筭誠非愚短所能究言若追蹤衛霍瀚海之志時事不等致功亦殊寇雖習戰未久又全據燕趙跨帶秦魏山河之險終古如一自非大田淮泗內實青徐使民有贏儲野有積穀然後分命方召總率虎旅精卒十萬使一舉盪夷則不足稍勤王師以勞天下何以言之今遺黎習亂志在偷安非皆恥爲左袵遠慕冠冕徒以殘害剝辱視息無寄故襁負歸國堯

後相尋虜旣不能較勝循理攻城略地而輕兵掩襲急在驅殘是其所以速怨名禍滅亡之日今若遣軍追討報其侵暴大翦幽冀屠城破邑則聖朝愛育黎元方濟之以道若但欲撫其歸附伐罪弔民則駿馬奔走不肯來征徒興巨費無損於彼復寄兵深入殺敵破軍苟陵患未盡則困獸思鬪報復之役將遂無已斯秦漢之末策輪臺之所悔也安邊固守於計爲長臣以安邊之計備在史策李牧言其端嚴尤申其要大略舉矣曹孫之霸才均智敵江淮之間不居各數百里魏捨合肥退保新城江陵移民南浹濡湏之

戎家停羨溪及表陵之屯民夷散雜晉宣王以爲宜從江南以北岸曹爽不許果亡租中此皆前代之殷鑒也何者斥候之郊非畜牧之地非耕桑之邑故堅壁清野以俟其來整甲繕兵以乘其弊雖時有古今勢有強弱保民全境不出此塗要而歸之有四一日移遠就近二曰浚復城隍三曰纂偶車牛四曰計丁課仗良守疆其土田曉帥振其風略蒐獵宣其號令俎豆訓其廉恥懸爵以縻之設禁以威之徭稅有程寬猛相濟比及十載民知義方然後簡將授寄揚旌雲朔風捲河冀電掃嵩嶺燕弧折節代馬摧足秦首

斬其右臂吳蹄絕其左肩銘功於燕然之阿饗徒於金微之曲寇雖亂亡有徵昧弱易取若天時人事或未盡符抑銳俟機宜審其筭若邊戍未增星居布野勤惰異教貧富殊資疆場之民多懷彼此虜在去就不根本業難可驅率易在振蕩又狡虜之性食肉衣皮以騁馳爲儀容以遊獵爲南畝非有車輿之安官室之衛櫛風沐雨不以爲勞露宿草宿維其常性勝則競利敗不羞走彼來或驟而此已奔波且今春踰濟旣獲其利乘勝忸怩未虞天誅比及秋末容更送死歟騎蟻聚輕兵烏集並踐禾稼焚蕪間井雖邊將

多累未審何以禦之若盛師連屯廢農必衆馳車奔
驛起役必遲散金行賞損費必大換土客戍怨曠必
繁孰若因民所居竝修農戰無動衆之勞有扞衛之
實其爲利害優劣相懸也一日移遠就近以實內地
今青兗舊民冀州新附在界首者三萬家此寇之資
也今悉河內徙青州民移東萊平昌北海諸郡太山
以南南至下邳左沃右沂田良野沃西阻蘭陵北阨
大峴四塞之內其號險固民性重遷閭於圖始無虜
之時嘉生咨怨今新被抄掠餘懼未息曉示安危居
以樂土宜其歌枵就路視遷如歸二日浚復城隍以
增阻防舊秋冬歛民人入保所以警備暴客使防衛
有素也古之城池處處皆有今雖頽毀猶可修治粗
計戶數量其所容新徙之家悉著城內假其經用爲
之間伍納稼築塲還在一處婦子守家長吏爲師丁
夫匪婦春夏佃收寇至之時一城千室堪戰之士不
下二千其餘羸弱猶能登陴鼓譟十則圍之兵家舊
說戰士二千足抗羣虜三萬矣三日募犍車牛以飾
戎械計千家之資不下五百耦牛爲車五百輛叅合
鈎連以衛其衆設使城不可固平行趨險賊所不能
干旣已族居易可檢括號令先明民知夙戒有急徵

發信宿可聚四日計丁課伏勿使有闕千家之邑戰士三千隨其便能各自有仗素所服習銘刻絲已還保輸之於庫出行請以自衛弓斡利鐵民不辦得者官以漸充之數年之內軍用粗備矣臣聞軍國異容施於封畿之內兵農並修在於疆場之表攻守之宜皆因其習任其怯勇山林川陸之形寒暑溫涼之氣各繇本性易則害生是故戊申作師遠屯清濟功費既重嗟怨亦深以臣料之未若卽用彼衆之易管子治齊寄令在民商君爲秦設以耕戰終能申威定霸行共志業非苟任強實繇有數梁用走卒其邦自滅齊用技擊厥衆亦離漢魏以來茲制漸絕蒐田非復先王之禮治兵徒逞耳目之欲有急之日民不知戰至乃廣延賞募奉以厚秩發遽奔救天下騷然方伯刺史拱手坐聽自無經畧唯望朝廷遣軍此皆忘戰忘害不教之失也今移民實內浚治城隍族居聚處課其騎射長吏簡試差品能否甲科上第漸就優別明其勲材表言州郡如此則屯部有常不遷其業內護老弱外通官塗朋曹素定同憂等樂情繇習親藝因事著畫戰見貌足以相識夜戰聞聲足以相救斯教戰之一隅先哲之遺術論者必以古城荒毀難可

修復今不謂頓便加功整麗如舊但欲先定民營其
間街墉壑存者因而葺之其有毀缺權時柵斷足以
禦彼輕兵防遏遊騎假以方將漸就只立車牛之賦
課仗之宜攻守所資軍國之要今因民所利道而率
之耕農之器爲府庫之實田蠶之氓兼并城之用千
家總倍旅之兵萬戶具全軍之衆兵強而敵不戒國
富而民不勞比於優復隊伍坐食廩糧者不可同年
而校矣今承平來久邊令弛縱弓箭斡利鐵旣不都斷
往歲棄甲垂二十年課其所任理應消壞謂宜申明
舊科嚴加禁塞諸商賈往來幢隊挾藏者皆以軍法
懲治之又界上嚴立關候杜廢間蹊城保之境諸所
課仗並加雕鐫別造程式若有遺鏃亡刃及私爲竊
盜者皆可立驗於事爲長又鉅野湖澤廣大南通洙
泗北連青齊有舊縣城正在澤內宜立式修復舊堵
利其壞遏給輕艦百艘寇若入境引艦出戰左右隨
宜應接據其師津毀其航漕此以利制車運我所長
亦懲敵之要也

袁淑爲御史中丞元嘉二十六年元魏南侵遂至瓜
步文帝使百官議防禦之術淑上議曰臣聞函車之
獸離山必斃絕波之鱗宕流則枯竭寇遺醜趣致畿

甸蟻萃螽集聞已崩殪天險巖曠地限深遐故全魏
戢其圖盛晉輟其議情屈力殫氣挫勇竭諒不虞於
來臨本無怯於能濟乃者燹定攜遠阻違授律繇將
有弛拙故士少闕志圍潰之衆匪寇傾淪攻制之師
空自班散濟西勁騎怠戰楚旅淮上訓卒簡備靡旗
是繇繇整寡囊戎貽多昧遂使潞子入患伊川來擾
紛殄姬風泯毒禹績騰書有渭陰之迫懸烽均咸陽
之警然而切揣虛實匿迹先彰按索能否詭狀旣顯
綿地千里彌行阻深表裏贗駭東西分逼捨陵行之
習競湍沙之利今虹見萍生土膏脈動津陸隘溢疢

禍游興芻藁已單米粟莫係水寓衿帶進必傾損級
江右寬繕淮內竊謂隕河溢宿固退亦墜滅所謂栖
鳥於烈火之上養魚於叢棘之中或謂拯拒閉城舊
吏爲允棄遠涼土前言稱非限此要荒猶弗委割况
聯被京國咫尺神甸數州摧掃列邑殲夷山淵反覆
草木塗地今兵賦千乘井竿萬集肩摩倍於長安帷
袂百於臨淄什一而藉實慊氓願履畝以稅旣協農
和戶競戰心人含銳志皆欲贏糧請奮釋緯乘城謂
宜懸金銷印要壯果之士重幣甘辭招摧決之將舉
薦板築之下抽登臺皇之間賞之以焚書報之以相

爵俄而昭才賀闕異能間至戎貪而無謀肆而不整
迷乎向背之次謬於合散之宜犯軍志之極害觸兵
家之甚諱咸畜憤矣僉策戰矣稱願影從謠言縉命
宜選敢悍數千驚行潛掩偃旗暴甲鉞馬銜枚檜動
而起晨壓未陣旌謀亂舉火鼓四臨使景不暇移塵
不及起無不禽鍛獸警水解霧散掃洗嘒顛漂鹵浮
山如有决置漏網遠巢逗穴命淮汝戈船遏其還逕
充部勁卒梗其歸塗必剪元雄懸首麾下乃將隻輪
不反戰鞞無旋矣於是信臣騰威武士繕力緹組接
陰鞞析連響若其僞遁羸張出沒無際楚言漢茹顯

默如神固已日月蔽虧川谷蕩實負塞殘孽阻山燼
黨收險竊命憑城借一則當因威席捲承機芟剽泗
汴秀士星流電燭徐阜巖兵雨湊雲集蹶亂桑溪之
北搖潰瀚海以南絕其本根勿使能植銜索之枯幾
何不蠹是猶涸澤而漁焚林而狩若大風之舞輕籜
杲日之拂浮霜旣而尉洽荷掠之餘望吊網悲之鬼
然後天行樞運焱舉煙升青蓋西巡翠華經啟州野
蕩滌舉無遺策俾高闕再勒燕然復銘方乃奠山沉
河創禮輯策闡耀炎昊之遺則貫軼商夏之舊文今
衆賈拳勇而將術踈怯意者稔泰日積承平歲久邑

無驚赴之急家緩餽戰之勤闕閱訓之禮簡參屬之飾且亦薦採之法庸未旣歟若乃邦造里選權論深切窮澤盡幽漸帶尋遠設有沉明能昭俊偉自宣誠感泉雨勇通金石氣懾飛賁知窮苴起審邪正順逆之數達昏明益損之宜能睽合民心愚獻物性登丹墀而敷策躡青蒲而揚謀上說宸鑒下弭素言足以安民紓國救災恤患則宜拔過寵貴之上褒升戚舊之右別其旂章榮其班祿出得專譽使不稟命降席折節同廣武之請設壇致禮均淮陰之授必有要盟之功竊符之捷夷裔暴狠內外侮棄始附之衆分散

無序蠱以威利勢必推仍離首順之徒靡然自及今涑澤故俗典纏纓綏翦焉幽播折首凶狡是猶眇者願明痿人思步動傷適會功終易感劫晉在於善覘全鄭實荷良謀多縱反問汨惑心耳發險易之前抵興喪之術衝其猜伏拂其嫌嗜啗以連率之貴餌以折壤之資罄筆端之用展辭鋒之銳振辨則堅圍可解馳羽而巖邑易傾心鬲土分枝榦瓦裂故燕樂相悔項范交疑矣或乃言約功深事邇應廣齊圍反駕趙養還君盡輿訟之道畢能事之效臣幸得出內

又音納

暑禁游息明代澤與身泰思隨年行無以逢迎昌運

潤飾鴻法今塗有遺鏃蠱未息鋒敢思涼識少酬閔
施但坐幕旣乏昭文免胄不能致果切觀都護之邊
論屬國之兵謀終晁之抗辭杜耿之言事咸云及經
之策猶闕上竿燭邪之敬裁收下策自恥懦水智不
綜微敢露昧見無會昭採

何尙之孝武卽位爲尙書令時欲分荆州置郢州議
其所居江夏王義恭以爲宜在巴陵尙之議曰夏口
在荆州之中正對沔口通接梁雍實爲津要緣來舊
鍤故根基未易今分取江夏武陵天門竟陵隨五郡
爲一州鎮在夏口旣有劔城浦大容舫竟陵出道取

荆州雖水路與去江夏不異諸郡至夏口皆從流竝
爲利便湘州所領十一郡其巴陵邊帶長江去夏口
密邇旣分湘中反更成大亦可割巴陵屬新州於事
爲允帝從其議荆楊二州戶口半天下江左以來楊
州爲根本委荆州以閩外至是竝分欲以削臣下之
權而荆楊竝因此虛耗尙之建言復合二州帝不許
何偃孝武卽位爲侍中時責百官讜言偃以爲宜重
農卹本并官省事考課以知能否增俸以除吏姦責
成良守久於其職都督刺史宜別其仕
謝莊孝武初爲侍中時魏人求通互市上詔羣臣博

議莊議曰臣愚以爲獯獫棄義唯利是視關市之請
或以覘國順之示弱無名柔遠距而觀釁有足表疆
且漢文和親豈止彭陽之寇武帝修約不廢馬邑之
謀故有餘則經畧不足則閉關何爲屈冠帶之邦通
引弓之俗樹無益之軌招塵點之風交易爽議旣應
深杜和約詭論尤宜固絕臣庸管多蔽豈識國儀恩
誘降建敢不披盡莊又以搜才路狹乃上表曰臣聞
功炤千里非特燭車之珍德柔隣國豈徒祕璧之貴
故詩稱殄悴誓述榮懷兩能道臻無積化至恭已伏
惟陛下膺慶集圖締寓開縣召爽選政臬旦諷風採
言廝輿觀謠友遠斯實辰階告平頌聲方製臣竊惟
隆披所漸治亂之繇何嘗不興資得才替因失士故
楚書以善人爲寶虞典以則哲爲難進選之軌旣弛
中代登造之律未闡當今必欲崇本康務庇民濟俗
匪更恣憑奚取九成升曆中陽英賢起於徐沛受籙
白水茂異出於荆宛寧二都智之所產七隩才之所
集實遇與不遇用與不用耳今大道光亨萬務俟德
而九服之曠九流之艱提鈞懸衡委之選部一人之
鑒易限而天下之才難原以易限之鑒鏡難原之才
使國罔遺賢野無滯器其可得乎昔公叔與俱同升

管仲取臣於盜趙文非親士疎嗣祁奚豈諂讐比子
茹茅以彙作範前經舉爾所知式昭往牒且自古任
薦賞罰弘明成子舉三哲而身致魏輔應侯任二士
而已捐秦相曰季稱冀缺而疇以田采張勃進陳湯
而坐以褫爵此先事之盛準亦後王之彛鑒如臣愚
見宜普命大臣各舉所知以付尚書依分銓用若任
得其才據主延賞有不稱職宜及其坐重者免黜輕
者左遷被舉之身加以禁錮年數多少隨愆議制若
犯大辟則任者刑論又政平訟理莫先親民親民之
要實歸守宰故黃霸治潁川累稔杜畿居河東歷載

或就加恩秩或入崇暉寵今蒞民之職自非公私必
應代換者宜遵六年之制進獲章明庸墮退得民不
勤擾如此則下無浮謬之愆上靡棄能之累考績之
風載秦撫薪之譎克昌臣生屬亨路身漸鴻猷遂得
奉詔左右陳愚於側敢露芻言懼氛常典有詔莊表
如此可付外詳議莊後以疾免官大明元年起爲都
官尚書奏改定刑獄曰臣聞明慎用刑式存姬典哀
矜折獄實暉呂命罪疑從輕旣前王之格範寧失弗
經亦烈聖之常訓用能化致升平道臻恭已逮漢文
傷不辜之罰除相坐之令孝宣悟深文之吏立鞠訊

之法當是時也號稱刑清陛下踐位親臨聽訟億兆相賀以爲無冤民矣而比囹圄未虛頌聲尚缺臣竊謂五聽之慈弗宣於宰政三省之澤未洽於民謠頃年軍旅餘弊劫掠猶繁監司討獲多非其實或規免身咎不慮國患楚對之下鮮不誣濫身遭鐵鎖之誅家嬰孥戮之痛比伍同閔莫不及罪是則一人罰謬坐者數十昔齊女告天臨淄臺殞孝婦冤戮東海誓陽此皆符變靈祇精感景緯臣近兼訊見重囚八人旋觀其初死有餘罪詳察其理實竝無辜恐此等不少誠可怵惕也舊官長竟囚畢郡遣督郵案驗仍就

施刑督郵賤吏非能異於官長有案驗之名而無研究之實愚謂此制宜革自今入重之囚縣考正畢以事言郡并送囚身委二千石親臨覈辦必收聲吞釁然後就戮若二千石不能決乃啟廷尉神州統外移之刺史刺史有疑亦歸臺獄令死者不怨生者無恨庶鬻棺之諺輟嘆於終古兩造之察流詠於方今臣學聞申韓才寡治術輕陳庸管懼乖國憲

張永孝武時爲尚書左丞時將士休假年間三番紛紜道路永建議曰臣聞開兵從據前王以之兼隙耕戰遽勞先代以之經遠當今化寧萬里文同九服捐

金走驥於馬自始伏見將士休假多蒙三番程會既促裝赴在早故一歲之間四馳遙路或失遽春耜或違要秋登致使公替常儲家闕舊粟考定利害宜加詳改愚謂交代之限以一年爲制使主上之念勞未及積遊農之望收功歲成則王度無騫民業期植矣從之

南齊虞玩之仕宋後廢帝時爲尚書右丞表陳時事曰天府虛散垂三十年江荆諸州稅調本少自頃以來軍募多乏其穀帛所入折供文武豫兗司徐開口待哺西北戍將裸身求衣委輸京都益爲寡薄天府所資唯是淮海民荒財單不及曩日而國度弘費四信元嘉二衛臺坊之民五不餘一都水材官朽散十不兩存備豫都庫材竹俱盡東西二陶埴瓦雙遺勅令給賜悉仰交市尚書省閣日就傾隳第宅府署太多穿毀視不遑救知不暇及尋所入定調用恤不周旣無儲畜理至空盡積弊累耗鍾於今日昔歲奉勅課以楊徐衆逋凡入米穀六十萬斛錢五千萬布絹五萬疋雜物在外賴此相贍故得推移卽今所懸轉多興用漸廣深懼供奉頓闕軍器輟功將士飢怨百官騫祿府署謝雕麗之器土木停緹紫之容國戚無

以贍勲舊無以給如愚管所慮不周歲矣經國遠謀臣所不敢言朝夕祇勤心在於匪懈起伏振遠事屬歸聞伏願陛下留須臾之鑒垂永代之計發不世之詔施必行之典則氓隸齊歡高卑同泰帝優詔答之王儉高帝時爲散騎常侍及帝遺詔以褚淵錄尚書事江左以來無單拜錄者有司疑立優策儉議以爲見居本官拜錄推理應有策書而舊事不載中朝以來三公王侯則優策竝設官品第二策而不優優者褒美策者庶明委寄尚書職居天官政化之本故尚書令品雖第三拜必有策錄尚書品秩不見而總任彌重前代多與本官同拜故不別有策卽事緣情不容均之凡僚宜有策書用申隆寄旣異王侯不假優文從之

王僧虔建元二年爲左光祿大夫侍中丹陽尹郡縣獄相承有上湯殺囚僧虔上疏言之曰湯本以救疾而實行寃暴或以肆忿若罪必入重自有正刑若去惡宜疾則應先啟豈有死生大命而潛制下邑愚謂治下囚必病先刺郡求職司與醫對共診驗遠縣家人省視然後處治可使死者不恨生者無怨帝納其言

王慈武帝時爲侍中領部兵校尉慈以朝廷諱榜非古舊制上表曰夫帝后之德綢繆天地君人之亮蟬聯日月至於名族不著昭自方篆號謚幸宣載伊篇籍所以魏臣據中以建議晉主依經以下詔朝堂置榜先諱懸路義非綿古事敝中世宗失資敬之情徒乖嚴配之道若乃式功鼎臣贊庸元吏或以秩崇或由姓表故孔悝見銘謂標叔舅子孟應圖稱題霍氏况以處一之重列尊名以止仁無二之貴夤冲文而止敬昔東平卽世孝章巡宮而灑泣新野云終和熹見似而流涕感循舊類尙或深心矧觀徽跡能無惻隱今扁禁欵邃動延葆蓋若使鑿駕停覽以時臨閱豈不重增聖慮用感宸衷愚謂空彪簡冊無益於匪躬直日朝堂寧虧於夕惕伏惟陛下保合萬國齊聖羣生當刪前基之弊軌啟皇齊之孝則詔付外羣議博士李搗議據周禮凡有新令必奮以驚衆乃退以憲及于王宮注憲表懸之也太常丞王儻之議尊極之名宜率土同諱日可得觀口不可言口不可言則知之者絕知之者絕則犯觸必衆儀曹郎任昉議搗取證明之文儻之卽情惟允真班諱之典爰自漢世降及有晉歷代無爽今之諱榜兼明義訓邦之育國

實爲前事之徵名諱之重情敬斯極故懸諸朝堂縉紳所聚將使起伏晨昏不違耳目禁避之道明然易從此乃敬恭之深旨何情典之或廢尊稱霍氏理例乖方居下必明故以不明爲重在上必諱故以班諱爲尊因心則理無不安卽事則罷行已久謂宜式尊無所創革慈議不行

諱榜謂朝堂置榜書國廟諱令人避之

王融爲中書郎武帝討雍州刺史王奐融上疏曰臣每覽史傳見憂國忘家捐生報德者未嘗不撫躬歎惜以爲今古共情也然或以片言微感一食小惠參國士之盼同布素之遊耳豈有如臣獨拔無聞之伍

過超非分之位名器雙假榮祿竝升而宴安娛罷之晨優遊肝食之日所以敢布丹愚仰聞宸聽今議者或以西夏爲念臣竊謂之不爾其故何哉陛下聖明羣臣悉力以從制逆上而御下詔開賞黜之言微示生死之路方城之人皆相爲敵旣兵威遠臨人不自保雖窮鳥必啄固等命於梁鶉因獸斯驚終竝懸於厨鹿而母后內難糧食外虛謠言物情屬當今會若籍巫漢之歸師騁士卒之餘憤取函河如反掌凌關塞若摧枯但士非素蓄無以卽用不教民戰是謂棄之特希私集部曲豫加習技若蒙垂許乞隸防衛臣

少重名節早習軍旅若試而無績伏受面欺之誅用
且有功侷酬知人之哲

梁賀琛武帝時爲散騎常侍是時任職者緣飾奸諂
深害時政琛啟陳事條封奏大略其一事曰今北邊
稽顙政是生聚訓練之時而天下戶口減落誠當今
之急務國家之於關外賦稅蓋微乃至年常租調動
致逋積而人失安居寧非牧守之過其二事曰今天
下寄守牧所以皆向貪殘罕有廉者良繇風俗侈靡
使之然也欲使人守廉隅吏尙清白安可得耶今誠
宜嚴爲禁制道之以節儉貶黜彫飾紀奏浮華使衆

皆知變其耳目改其好惡則易於反掌其三事曰斗
筭之人詭競求進運挈瓶之智徼分外之求以深刻
爲能以繩逐爲務長惡增奸實繇於此今誠願責其
公平之効黜其譏愚之心則下安上謐無徼倖之患
矣其四事曰自征伐北境帑藏空虛今天下無事而
猶日不暇給良有以也夫國弊則省其事而息其費
事省則養人費息則財聚若言小費不足害財則終
年不息矣以小役不足妨人則終年不止矣書奏不
納

陳袁樞爲都官尙書高祖長女永世公主先適陳留

太守錢藏生子品主及品竝卒於梁高祖受命唯公主追封至是將葬尚書王客請詳議欲加藏駙馬都尉并贈品官樞議曰昔王姬下嫁必適諸侯同姓爲主聞於公羊之說車服不繫顯於詩人之篇漢氏初興列侯尙主自斯已後降嬪素族駙馬都尉置繇漢武或以假諸功臣或以加於戚屬是以魏曹植表云駙馬奉車趣得一號齊職儀曰凡尙主必拜駙馬都尉魏晉以來因而爲准蓋以王姬之重庶姓之輕若不加其等級寧可合蚕而醕所以假駙馬之位乃崇於皇女也今公主早薨伉儷已絕旣無禮數何須駙馬之授案杜預尙晉宣第二女高陸公主晉武踐祚而主已亡泰始中追贈公主凱無復駙馬之號梁文帝女新安公主早薨天監初王氏無追拜之事遠近二例足以據明公主所生旣未及成人之禮無勞此受今宜追贈亭侯時以樞議爲長

冊府元龜卷第四百七十一 十月初百校

文今宜... 册府元龜... 奏議二... 卷之四十七... 册府元龜... 奏議二... 卷之四十七...

册府元龜卷第四百七十二

巡按福建監察御史臣李嗣京訂正奏

知閩縣事 臣曹鼎臣參閱

知建陽縣事 臣黃國琦較釋

臺省部 一十六

奏議第三

後魏崔玄伯為黃門侍郎與張袞對掌樞要草創制度有司博議國號玄伯議曰三皇五帝之立號也或因所生之土或即封國之名故虞夏商周始皆諸侯及聖德既隆萬國崇戴稱號隨本不復更立唯裔人

册府元龜 宰省部

屢徙改號曰殷然猶兼行不廢始基之稱故詩云殷商之旅天命玄鳥降而生商宅殷土茫茫此其義也昔漢高祖以漢王定三秦滅彊楚故遂以漢爲號國家雖統北方廣漢之土逮於陛下應運龍飛雖號舊邦受命惟新以登國之初改代曰魏又慕容永亦奉進魏土夫魏者大明神州之上國斯乃革命之徵驗利見之符也臣愚以爲宜號爲魏道武從之於是四方賓王之貢咸稱大魏矣

劉潔太武時爲尙書令時南州大水百姓阻饑潔奏曰臣聞天地至公故萬物咸育帝王無私而黎民戴賴伏惟陛下以神武之姿紹重光之緒恢隆大業育濟羣生威之所振無思不服澤之所振無遠不懷太平之治於是而在自頃邊寇內侵戎車屢駕天贊神明所在尅殄方難旣平皆蒙酬錫勲高者受爵功卑者獲賞寵賜優崇有過古義而郡國之民雖不征討服勤農桑以供軍國實經世之大本府庫之所資自山以東偏遇水害頻年不收就食他方臣聞率土之濱莫非王臣應加哀矜以鴻覆育今南權強寇西販醜虜四海晏如人神協暢若與兆民同享其福則惠感和氣蒼生悅樂矣大武從之於是復天下一歲租

賦

源賀爲給事中時斷獄多濫賀上書曰臣聞人所貴者莫貴於生命德之厚者莫厚於宥死然犯死之罪難其盡恕權其輕重有加矜恤今寇賊未殄鹽場須防臣愚以爲自非大逆赤手殺人之罪其坐贓及盜與過誤之愆應入死者皆可原命謫守邊境是則已斷之體更受再生之恩徭役之家漸蒙休息之惠刑措之化庶幾在茲虞書曰流宥五刑此其義也臣受恩深重思以仰答將違闕庭預增係戀敢上瞽言唯加裁察文成納之已後入死者皆恕死徙邊

韓秀獻文踐祚爲給事中參征南慕容白曜軍事孝文延興中尚書奏以燉煌一鎮界遠西北寇賊路衝慮或不固欲移就涼州羣官會議僉以爲然秀獨謂非便曰此蹙國之事非關土之宜愚謂燉煌之立其來久矣雖土鄰強寇而兵人素習縱有姦竊不能爲害循常置戍足以自全退保一方之城聚進塞四夷之窺伺若徒就姑臧慮人懷異意或貪留重遷情不願從腕引寇內侵深爲國患且燉煌去涼州乃千餘里捨遠就近邊防有關一旦廢罷是啟戎心則夷狄交構互相來往恐醜協契侵竊涼土及近諸戍則關

右荒擾烽警不息邊役煩興艱難方甚乃從秀議
程駿爲中書令獻文神主遷於太廟有司奏舊事廟
中執事之官例皆賜爵今宜依舊事駿獨以爲不可
表曰臣聞名器爲帝王所貴山河爲區夏之重是以
漢祖有約非功不侯必當屬有命於大君之辰展心
力於戰謀之日然後可以應茅土之錫未見預事於
宗廟而獲賞於壇土徒見晉鄭之復以夾輔爲至勲
吳鄧之儔以征伐爲重績周漢旣無文於遠代魏晉
亦靡記於往年自皇道開符乾業創統務高三五之
規思隆百王之軌罰頗減古賞實增昔時因神主改
祔清廟致肅而授羣司以九品之命顯執事以五等
之名雖復帝王制作弗相沿襲然當時恩澤豈足爲
喪世之軌乎垂衆之愆伏待罪譴書奏從之文明太
后謂羣臣曰言事固當正直而准古典安可依附暫
時舊事乎賜駿衣一襲帛二百疋

李冲爲內秘書令南都給事中舊無三長唯立宗主
督護所以民多隱冒五十家方爲一戶冲以三正治
治所錄來遠於是創三長之制而上之文明太后覽
而稱善引見公卿議之中書令鄭義秘書令高祐等
曰冲求立三長者乃欲混天下一法言似可用事實

難行義又曰不信臣言但試行之事敗之後當知愚言之不謬太尉元丕曰臣謂此法若行於公私者益減稱方今有事之月投比民戶親舊未分民心勞怨請過令至冬間月徐乃遣使於事爲宜冲曰民者冥也可使錄之不可使知之若不因調時百姓徒知之立長校戶之勤未見均徭省賦之益必心生怨宜及課調之月令知賦稅之均旣識其事又得其利因民之欲爲之易行著作郎傅思益進曰民俗旣易險易不同九品著條爲日已久一旦改法恐成擾亂太后曰立三長則課有常分包蔭之戶可出僥倖之人可止何爲而不可羣議雖有乖異然唯以變法爲難更無異議立三長公私便之

陳建孝文時爲尙書右僕射加侍中與侍中尙書晉陽侯元仙德殿中尙書長樂王穆亮北部尙書平原王陸叡密表曰皇天輔德命集大魏臣等祖父翼贊初興勲過蜀漢誓固山河享茲景福寵辱休戚與國均焉臣以凡近識無遠達皆藉先寵遂荷今任彼已之譏播於羣口仰感生成俯自策勵顧省駑鈍終無云益然飲冰驚寐實懷慙負至於願天高地厚何日忘之自永嘉之末封豕橫噬馬戲南據奄有荆楚及

桓劉跋扈禍難相繼岱宗隔望秩之敬青徐限見德之風獻文皇帝髻鬣龍飛道光率土干戚暫舞淮海偃風車書旣同華裔將一昊天不弔奄肯萬邦竊聞劉昱天亡權臣殺害思正之民翹想罔極愚謂時不再來機宜易失毫分之差致悔千里天與不取反受其咎所謂見而不作過在介石者也宜簡雄將號令八方義陽王臣昶深悟存亡遠同孫氏苟力運響從則吳會可定脫事有難成則振旅而返進可以揚義聲於四海退可以通德信於遐裔宜乘之會運俟今日如合聖聽乞速施行脫忤天心願存臣表徐觀後驗賞罰隨焉帝嘉之

韓顯宗太和初兼中書侍郎旣定遷都顯宗上書其一日竊聞輿駕今夏若不巡三齊當幸中山竊以爲非計也何者當今徭役宜早息雜京宜速成省方則徭役可簡并功則雜京易就徃冬輿駕停鄴是閒隙之時猶編戶供奉勞費爲劇聖鑒矜殷優旨懇勲爵浹高年賚周鰥寡雖賑貸普霑今猶愍雨來夏菜色况三農要時六軍雲會其所損業實爲不少雖調欵輕省未足稱勞然大駕親臨誰敢寧息徃來承奉紛紛道路田蠶斃廢則將來無資此國之深憂也且向

炎暑而六軍暴露恐生厲疾此可憂之次也臣願輿
駕早還北京以省諸州供帳之費并功專力以營維
邑則南州免雜徭之煩北都息分拆之歎維京可以
時就遷者僉爾如歸其二曰自古聖帝必以儉約爲
美亂主必以奢侈貽患仰惟先朝皆卑官室而致力
於經略故能基宇開廣業祚隆泰今維陽基趾魏明
所營取譏前代伏願陛下損之又損頃來北都富室
競以第宅相尚今因遷徙宜申禁約令貴賤有檢無
得踰制端廣衢路通利溝渠使寺署有別四民異居
永垂百世不刊之範則天下幸甚矣三曰竊聞輿駕

還維陽將數千騎臣甚爲陛下不取也夫千金之子
猶坐不垂堂况萬乘之尊富有四海乎警蹕於闐闐
之內者豈以爲儀容而已蓋以戒不虞也清道而後
行尙恐銜檠之或失况履涉山河而不加三思哉此
愚臣之所以悚息伏願省察其四曰伏惟陛下耳聽
法音目玩墳典口對百辟心虞萬機晷晏而食夜分
而寢加以孝思之至隨時而深文章之業日成篇卷
雖獻明所用未足爲煩然非所以嗇神養性願無疆
之祚莊周有言形有待而知無涯以有待之形役無
涯之智殆矣此愚臣所不安伏願陛下垂拱司契委

天下責成惟冕旒垂纒而天下治矣高祖頗納之顯宗又上言曰進賢求才百王之所先也前代取士必先正名故有賢良方正之稱今州郡貢察徒有秀孝之名而無秀孝之實而朝廷但檢有門望不復彈坐如此則可令別貢門望之敘士人何假冒秀孝之名也夫門望者是其父祖之遺烈亦何所益於皇家益於時者賢才而已苟有才雖屠釣奴虜之賤聖皇不恥以爲臣苟非其才雖三后之裔自墜於皂隸矣是大才受大官小才受小官各得其所以致雍熙議者或云今世等無奇才不若取士於門此亦失矣豈可以世無周密使廢宰相而不致哉但當按其寸長銖重者卽先叙之則賢才無遺矣又曰夫帝皇所以居尊以御下者威也兆庶所以徙惡以從善者法也是以有國有家以刑法爲蓋生民之命於是而在有罪必罰罰必當辜則雖箠撻之刑而人恥而莫敢犯也有生隲行人得僥倖則終參夷之誅不足以肅自太和以來未多坐盜棄市而遠近肅清餘此言之止姦在於防檢不在麗刑也今州郡牧守邀當時之名行一切之法臺閣百官亦咸以深酷爲無私以仁恕爲容盜迭相敦厲遂成風俗陛下居九重之內視人如

赤子百司分萬務之要遇下如仇讐是則堯舜止一人而桀紂以千百和氣不至蓋錄於此書曰興殺不辜寧失不經實宜勅示百僚以惠元元之命又曰昔周王爲犬戎所逐東遷河雒鎬京後補宗周以存本也光武雖曰中興實自創業西京尚置京尹不廢舊今陛下光隆先業遷宅土中稽古復禮於斯爲盛豈若周漢出不得已哉按春秋之義有宗廟曰都無謂之邑此不刊之典也况北代宗廟在焉山陵託焉王業所基聖躬所載其爲神鄉福地實亦遠矣今便同之郡國臣竊不安愚謂代京宜建幾置尹一如故事

崇本重舊以光萬乘又曰伏見雜京之制居民以官位相從不依族類然官位非常有朝榮而夕辱則衣冠倫於斯濫之邑臧獲騰弄膏腴之里物之顛倒或至於斯古之聖王必令四民異居者欲其志專而業定則不淫故耳目所習不督而就父兄之教不肅而成仰惟太祖道武皇帝荆基撥亂日不暇給然猶分別庶士不令雜居伎作屠沽各有攸處但不設科禁賣買任情販貴易賤錯居混雜假令一處嚴師苦訓誦詩講禮宣令童齠任意所從其走起舞堂者萬數往就學館者無一此則伎作不可雜居士人不可異

處之明驗也故孔父里仁之美孟母三徙之訓賢聖明誨若此之重令今伎作家習士人風禮則百年難成令士人兒童効伎作容態一朝可得是以士人同處則禮教易興伎作雜居則風俗難改朝廷每選舉人士則校其一婚一官以爲升降何其密也至於別伎作官途得與膏梁華望接闊連薨何其略也此愚臣之所惑今稽古建極光宅中區凡所從居皆是公地分別伎作在於一言有何爲疑而闕甚美又曰自南僞相承竊有淮北欲擅中華之稱且以招誘邊民故先置中州郡縣自皇風南被仍而不改凡有重名其數甚重疑惑書記錯亂區宇非所以疆域物土必也正名之謂也愚以爲可依地理舊名一皆釐革小者并合大者分置及中州郡縣昔以戶少併省今人口旣多亦可復舊君人也者以天下爲家不得有所私也故倉庫儲貯以候水旱之災供軍國之用至於有功德者然後加賜爰及末代乃寵之所隆賜賴無限自此以來亦爲大過在朝諸貴受祿不輕土木被錦綺僮妾厭梁肉而復厚賚屢加動以千計若分賜鰥寡贍濟實多如不悛革豈周急不繼富之謂也愚謂事可賞勸則明旨褒揚稱事加賜以勸爲善不可

以親近之昵猥損天府之儲又曰宿衛內直者宜令武官習弓矢文官諷書傳而今給其蒲博之具以成褻狎之容長矜爭之心恣誼囂之慢徒損朝儀無益事實如此之類一宜禁之帝善之

高閭爲尙書中書監太和十四年秋閭上表曰奉祭未詔書以春夏少雨憂饑饉之方臻愍黎元之傷瘁同禹湯罪已之誠齊堯舜引咎之德慮災致懼詢及卿士令各上書極陳損益深恩被采蒼生厚惠流于后土伏惟陛下天啟聖哲利見纂極欽若昊天光格宇宙太皇太后以獻哲贊世稽合三才高明柔克道

被無外七政昭宣於上九功咸序於下君人之量逾高謙光之旨彌篤脩復祭儀宗廟所以致敬飾正器服禮樂所以宣和增儒官以重文德簡勇士以昭武功慮獄訟之未息定刑書以理之懼蒸民之姦軌置隣黨以穆之究庶官之窮劇班俸祿以優之知勞逸之難均分民主以齊之甄忠明孝矜貧恤獨開納讜言抑絕讒佞明訓以體率土移風雖未勝殘去殺成無爲之化足以仰答三靈者矣臣聞皇天無私降臨在下休咎之徵錄人名教帝道昌則九疇敘君德衰而倫彞斃休瑞竝應享以五福則康于其邦咎徵屢

臻罰以五極則害于其國斯乃洪範之實徵神祇之明驗及其厄運所纏世鍾陽九數乖天理事違於人謀時則有之矣故堯湯逢歷年之災周漢遭水旱之患然立功修行終能弭息今考治則有如此之風計運未有如彼之害而陛下慤懃引過事邁前王徒星澍雨之徵指辰可必消災滅禍之符灼然自見雖王畿之內頗爲少雨關外諸方禾稼仍茂苟動之以理綏之以利一歲不收未爲大損但預虞不備古之善政安不忘危有國常典竊以比鐘新徙家業未就思親戀本人有愁心一朝有事難以禦敵可寬其徃來頗使欣慰開雲中馬城之倉以賑恤之足以感德致力邊境矣明察畿甸之民甚者出靈丘下館之粟以救其乏可以安慰孤貧樂業保土使幽定安并四州之租隨運以益其處開關弛禁薄賦賤糶以消其費清其道路恣其東西隨豐逐食貧富相贍可以免度凶年不爲患苦又聞常士困則濫竊生匹婦餒則慈心薄凶險之年民輕違犯可緩其役使急其禁令宜於未然之前申勅外牧又一夫幽枉王道爲虧京師之獄或恐未盡可集見囚於都曹使明折庶獄者重加究察輕者卽可決遣重者定狀以聞罷非急之

作放無用之獸此乃救凶之常法且以見憂於百姓
論語曰不患貧而患不安苟安而樂生雖遭凶年何
傷於民庶也愚臣所見如此而已詔曰省表聞之當
勅有司依此施行

邢巒爲散騎常侍兼尚書宣武初奏曰臣聞昔者明
王之以德治天下莫不重粟帛輕金寶粟帛乃安國
育民之方金玉是虛華損德之物故先皇深觀古今
去諸奢侈服御尚質不貴雕鏤所珍在素不務綺綵
至乃以紙絹爲帳辰銅鐵爲轡勒訓朝廷以節儉示
百姓以憂矜日夜孜孜小大必慎輕賤珠璣示其無

設府藏之金裁給而已更不買積以費國資逮景明
之初承昇平之業四疆清晏遠邇來同於是番貢繼
路商估交入諸所獻貨倍多於常雖加以節約猶歲
損萬計珍貨常有餘國用常不足若不裁其分限便
恐無以支歲自非爲要須者請皆不受從之

源懷宣武景明中爲尚書左僕射時有詔以姦吏犯
罪每多逃遁因青乃出竝釋然自今以後犯罪不問
輕重而藏竄者遠流若永不出兄弟代徙懷乃奏曰
謹按條制逃吏不在赦限竊惟聖朝之恩異於前宥
諸流徒在路尙蒙旋反况有未發而仍遣邊戍按守

字犯罪逃走者衆祿潤旣優尙有茲失及蒙恩宥卒
然得還今獨苦此等恐非均一之法如臣管識謂宜
寬之書奏門下以成式旣班駁奏不許懷重奏曰臣
以爲法貴經通法尙簡要刑憲之設所以羅網罪人
苟理之所備不在繁典刑之可通豈容峻制此乃古
今之達政救世之常規伏尋條制勲品以下罪發逃
亡遇恩不宥仍流妻子雖欲仰給姦途匪爲通式謹
按事條侵官敗法專據流外豈九品以上人皆貞白
也諸州守宰職任清流至有貪濁事發逃竄遇恩免
罪以勲品以下獨乖斯例如此則寬從上流法切下

吏育物有差惠罰不等又謀逆滔天經恩尙免吏犯
微罪獨不蒙赦使大宥之經不通開坐之路致壅進
違古典退乖今律輒率愚見以爲宜停書奏帝納之
盧昶爲散騎常侍兼尙書時雒陽縣獲白鼠昶奏曰
謹按瑞典外鎮刺史二千石長不祇上命刻暴百姓
人民嗟怨則白鼠至臣聞禎不虛見德合乃降妖不
妄出咎彰則至是以古之人君或怠瑞以失德或祇
變而立功斯乃萬古之殷鑒千齡之炳戒此者災氣
作沴嘗虧法度陛下流如傷之慈降納隍之旨其哀
百姓之無辜引在予之深責舉賢黜佞之詔道映於

堯夫進忠納諫之言事光於舜古伏讀明旨俯觀徵
譴敢布庸瞽以陳萬一竊惟一夫之耕食裁充口一
婦之織衣止蔽形年租歲調則惟常理此外徵求於
何取足然自比年以來兵革屢動荆揚二州屯戍不
息鍾離儀陽師旅相繼兼蠻凶狡王師薄伐暴露原
野經秋淹夏汝潁之地率戶從戎河冀之境連丁轉
運又戰不勝加之退負死喪離曠十室而八細役煩
催日月滋甚苛兵酷吏因逞威福至使通原遙畛田
蕪罕耕連村接閉蠶飢莫食而監司因公以責水豪
強恃私而逼掠遂令鬻短褐以益千金之資制口腹
而充一朝之急此繇牧守令長多失其人郡闕黃霸
之君縣無魯恭之宰不思所以安民止思所以潤屋
故士女呼嗟相望於道路守宰暴貪風聞於魏闕往
歲法官按驗多推刑網謂必顯戮以明勸誡然後命
使覆訊公違憲典或承風挾請輕樹私恩或容情受
賂輒施已惠御史所劾皆言誣枉申雪罪人更云清
白長侮上之源滋陵下之路忠清之人見之而自怠
犯暴之夫聞之以益快白鼠之至信而有徵矣伏願
陛下乘獻喆之鑒察妖災之起廷對公卿廣宣庶政
引見樞納博求民隱存問孤寡去其苛碎輕徭省賦

與之體息貞良忠謹置之於朝姦罔貪佞棄之於市
 則九官勿戒而宮敬百縣不嚴而自肅士女欣欣人
 有望矣詔曰朕纂承鴻緒伏膺寶曆思靖八方惠康
 四海當必世之期麟鳳不降屬勝殘之會白鼠告咎
 萬邦有罪實唯朕躬尚書敷納獻替是寄讜言有聞
 朕實嘉美

袁翻為尚書殿中郎正始中議選邊戍事翻建議曰
 臣聞兩漢警於西北魏晉備在東南是以鎮邊守塞
 必寄威重伐叛柔服實賴溫良故田叔魏尚聲高於
 沙漠當陽鉅平績流於江漢紀籍用為美談古今取

為盛德自皇上以獻明纂御風凝化遠威厲秋霜惠
 霑春露能使淮海輸誠華陽卽序連城請面比屋居
 仁懸車劍閣豈伊曩載鼓譟金陵復在今日然荆揚
 之牧宜盡一時才望梁郢之君尤須當今秀異自北
 緣邊州郡官至便登疆場統戎階當卽用或植稔德
 凡人或遇貪家惡子不識字民溫恤之方唯知重役
 殘忍之法廣開戍羅多置率領或用其左右婚親或
 受其貨財講囑皆無防寇禦賊之心唯有通商聚歛
 之意其勇力之兵驅令抄掠若值疆敵卽為奴虜如
 有執獲奪為已富其羸弱老小葦微解金鐵之工少

闕草木之作無不搜營窮壘苦役百端自餘或伐木
高山芸草平陸販質往還相望道路此等祿旣不多
資亦有限皆收其實絹給其虛粟窮其力薄其衣用
其工節其食繙冬歷夏加之疾苦死於溝瀆者常十
七八焉是以吳楚間伺審此虛實皆云糧匱兵疲易
可乘擾故驅率犬羊屢犯疆場頻年已來甲冑生蟣
十萬在郊千金日費爲弊之深一至於此皆繇邊任
不得其人故延若斯之患賈生所以痛哭良有以也
夫潔其流者清其源理其末者正其本旣失之在始
庸可也乎愚謂自今已後荆楊徐豫梁益諸番及所
統郡縣府佐統軍至于戍主皆令朝臣王公以下各
舉所知必選其才不拘階級若能統御有方清高獨
著威足臨戎信能懷遠撫循將士得其歡心不營私
潤專循公利者則就加爵賞使久於其人以時褒資
勵其忠款所舉之人亦垂優異獎其得士嘉其誠節
若不能一心奉公才非捍禦貪憚日富經略無聞人
不見德兵厭其勞者卽加顯戮用彰其罪所舉之人
隨事免降責其謬薦罰其僞薄如此則舉人不得挾
其私受任不得孤其舉善惡旣審沮勸亦明邊患永
清譏議攸息矣

游肇爲侍中梁軍主徐玄明斬其青冀二州刺史張
稷首以都州內附朝議遣兵赴援肇表曰玄明之款
雖奔救是常然事有損益或憚舉而功多或因小而
生患不可必也今六里駒山地實接海陂湖下濕人
不可居郁州又在海中所謂雖獲石田連口六里雖
尅尙不可守况方事連兵而爭非要也且六里於賊
近要去北閑遠若以閑遠之兵攻逼之衆其藝旣殊
不可敵也災險之年百姓饑弊死者亦復不少其何
以居宜靜之辰興干戈之役軍資糧運取濟無所唯
見其損未覩其益且親附之民復化猶近特須安帖
不宜勞之勞則怨生怨則思叛思叛則不自安不安
則擾動脫爾則連兵難解事不可輕宜損茲小利不
使大損宣武竝不納

任城王澄爲尙書令正始之末詔百司並升一級而
執事不達旨意刺史守令限而不及孝明初澄奏曰
竊惟雲構鬱起澤及百司宜春望榮內外同慶至於
賞陟不及守宰爾來十年寃詞不絕封回自鎮遠安
州入爲太尉長史元康自征虜營州入爲高卿二人
遷授竝在先詔應蒙之埋備在於斯兼州佐停從之
徒部臣郡丞之例尙蒙天澤下降榮及當時然叅佐

之末皆因府主不霑佐官獨預棄本賞未思謂未允
公計刺史守宰之官請准回康悉同汎限上允初旨
百司之章下覆訟者元元之心詔曰自今以後內外
之事嘗經先朝者不得重聞澄奏曰臣聞堯懸諫諍
之鼓舜置誹謗之木皆所以廣耳目於芻蕘達四聰
於天下伏惟太祖開基化隆自遠累聖相承於九帝
重光疊胎滂隆必同與奪隨時道無常體思過如渴
言重千金故稱無諱之朝邁蹤三五高祖冲年纂曆
文明協統變官易律未爲違典及慈聖臨朝母儀寓
縣爰發慈令垂心滯獄深枉者仰日月於九泉微屈

者希曲昭於天下乃格以先朝限以一判期誠奉遵
之本心實乖元元之至望在於謙挹有乖舊典謹尋
抱枉求直或至累朝毫釐之差正之宜速謬若千里
駟馬弗追故禮有損益事有可否父有諍子君有諫
臣琴瑟不調理宜改作是以大則起防川之論小則
通鄉校之言言壅敗國矧伊陳屈而可仰以先朝且
先屈者非故屈之或有司愛憎或執事獨僻空文致
法以誤視聽如此冤塞彌在可哀與其濫申寧失不
經乞收今旨還依前詔詔曰省奏深見毗篤之情三
皇異軌五代殊風一時之制何必詮改必請虛文旨

理存可申者何容不同來執可依往制又前來尚書文簿諸曹須則出備時公車署以理寃事重奏請直案澄執奏以尚書政本特宜遠慎故凡所奏閣道通之蓋以秘要之地防其宣露寧有古制所重今反輕之內猶設禁外更寬也宜善寫事意以付公車詔從之又御史中尉東平王遙奏請取景明元年已來內外考簿吏部尚書中兵勲案并諸殿最欲一案技竊階盜官之人靈太后許之澄表曰臣聞三季之弊繇於頽刑火德之興在於三約是以老聃云法令滋彰盜賊多有又曰其政察察其民缺缺又曰天網恢恢疎而不漏是故欲求治本莫若省事清心昔漢文斷獄四百幾致刑厝省事也所致蕭曹爲相載其清靜畫一之歌清心之本也今欲求之於本宜以省事爲先使在位羣官慕蕭曹之心以毗聖化如此則上下相安遠近相信百司不怠事無愆失豈宜擾世教以深文烹小鮮以煩手哉臣竊惟景明之初暨永平之末內外羣官三經考課建延昌之始方知黜陟五品已上引之朝堂親決聖日六品已下例錄勅判自世宗晏駕太宥三品所以蕩除故意與物更始革世之事方相窮極以臣愚見謂爲不可又是尚書職分樞

納所憂昔魏明帝卒至尙書門陳矯抗辭帝慙而返夫以萬乘之重非所宜行猶屈一言慙而廻駕羣官百司而可相亂乎故陳平不知錢穀之數兩吉不問僵道之死當時以爲達治歷代用爲美談但各宜守其職思不出位潔已以勵時靖恭以致節又尋御史之體風聞是司空於冑勲妄考皆有處分若二處有風謠卽應攝其一簿研檢虛實若差外不同僞情自露然後繩以典刑人孰不伏豈有移一省之案取天下之簿尋兩紀之事窮革世之尤如此求過誰堪其罪斯實聖朝所宜甚重也靈太后納之乃止

孫紹爲門下錄事與常景等共修律令延昌中紹表曰臣聞建國有計雖危必安施化能和雖寡必盛治垂人理雖合必離作用失機雖成必敗此乃古今同然百王之定法也伏惟大魏應天明命肇啟無窮必世後仁祚隆七百今三號京門了無嚴防南北二中復闕固守長安鄴城股肱之寄穰城上黨腹背所憑四軍五校之軌領護分事之職徵兵儲粟之要舟車水陸之資山河要害之權緩急去來之用持平赴救之方節用應時之法特宜修置以固堂堂之基持盈之體何得而忽居安之辰故應危懼矣且法開清濁

不平申滯理冤而卑寒亦免士庶同悲兵徒懷怨中
正賣望於下里主案舞筆於上臺真偽混淆知而不
糾得者不欣失者倍怨使門齊身等而涇渭奄殊類
應同役而苦樂懸異士人居職不以爲榮兵士役苦
心不忘亂故有競棄本生飄藏他土或詭名托養散
在人間或忘命山藪漁獵爲命或投伏疆豪寄命衣
食又應遷之戶遂樂諸州應留諸戍避寒歸暖兼職
人子弟隨逐浮遊南北東西卜居莫定關禁不修任
意取適如此之徒不可勝數爪牙不復爲用百工爭
棄其業混一之計事實闕如考課之方責辦無日流
浪之徒決須精技今強敵窺時邊黎伺隙內民不平
久成懷怨戰國之勢竊謂危矣必造禍源者北邊鎮
戎之人也若夫一統之年持平用之者大道之計也
亂離之期縱橫作之者行權之勢也故道不可久須
文質以換情權不可常隨洵隆以收物文質應世道
形自安洵隆獲衷權勢亦濟然則王者計法之趣化
物之窺圓方務得其境人物不失其地又先帝時律
令並議律尋施行令獨不出十餘年矣臣以令之爲
體卽帝王之身也公處百揆之儀安置九服之節經
緯三才之倫包羅六卿之職措置風化之門作用賞

罰之要則是有爲之樞機世法之大本也然修令之人亦皆博古依撰置大體可觀比之前令精麤有在但主議之家太用古制若全依古高祖之法復須昇隆誰敢措意有是非哉以是爭故久廢不理然律令相須不可偏用今律班令止於是甚滯若令不班是無典法臣不執事何依而行臣等修律非無勤止畧下之日臣乃無名是謂農夫盡力他食其秋功名之所實懷於悒

元暉孝明初徵拜尚書左僕射詔攝吏部選事上疏曰臣聞治人之本實委守牧之官得其人則政平物理失其人則訟興怨結自非察訪善惡明加貶賞將何以黜彼貪怠陟此清勤也竊以大使巡省必廣迎送之費御史馳糾頗興威濫之刑且蹙往爾還理不委悉從有簡舉良未平當愚謂宜令三司八坐侍中黃門各布耳目外訪州鎮牧將治人守令能否若德教有方清白獨著宜以名聞卽加褒陟若治績無効貪暴遠聞亦便示牒登加貶退如此則不出庭戶坐知四方端委垂拱明賞審罰矣又表以御史之職鷹鷂是任必逞爪牙有所噬搏若選後生年少血氣方剛者恐其輕肆勁直傷物處廣愚謂宜簡官經事忠

良平慎者爲之詔付外依此施行後詔暉與任城王
澄京兆王愉東平王康共決門下大事暉又尙書論
政要其一曰御史之職務在得賢必得其人不拘階
秩久於其事責其成功其二曰安人寧邊觀時而動
頃來邊將亡遠大之畧貪萬一之功楚梁之好未聞
而蠶婦之怨屢結斯乃庸人所爲銳爲姦利之所致
也平吳之計自有良圖不在於一城一戍也又河北
數州以其國之基本饑荒多年戶口流散豈於境上
兵復徵發卽如此日何易舉動愚謂數年以來唯宜
靜邊以自征役安人勸農惠此中夏請嚴勅邊將自
今有賊戍求內附者不聽輒遣授接皆須表聞違者
雖有功請以違詔書論三曰國之資儲唯藉河北饑
饉積年戶口逃散生長姦詐因其隱藏出縮老小妾
注死失收人租調割入於已人困於下官損於上自
非更立權制善加撿括損耗之來方在未已請求其
議明宣條格帝納之

源子恭爲尙書北主客郎中攝南主客事梁亡人許
周自稱給事黃門侍郎朝士翕然咸共信待子恭奏
曰徐州表投化人許團并其弟周等究其牒狀周列
云亡蕭衍黃門侍郎又稱心存山水不好榮官屢冒

讓辭貽彼赫怒遂被出爲齊康郡因爾歸國願畢志
嵩嶺比加採訪畧無登明尋其表狀又復莫落案牒
推理實有所疑何者昔夷齊獨往周王不屈其志伯
况辭祿漢帝曲成其美斯實古先詰王名必有不臣
之人者也蕭衍雖復崎嶇江右竊號一隅至於處物
未甚悖禮豈有士辭榮祿而苟不聽之哉推察情理
此則孟浪假蕭衍昏狂不存雅道逼士出郡未爲死
急何宜輕去生養之事長辭父母之邦乎言不好榮
官志願嵩嶺者初留之日卽應杖策尋山負袂泝水
而乃廣尋知己遍造知事希榮之心已見逃官之志

安在昔梁鴻去鄉終於吳會逢萌浮海遠客遼東並
全志養性逍遙而已考之事實何其懸哉又其履歷
清華名位高達計其蒙累應在不輕今者歸化何其
孤迥設使當時愈遽不得携將及其來後家貧產業
應見薄歛尊卑口累亦當從法而周兄弟然嘗無蹙
若無種族理或可通如有不坐便應是衍故遣非同
投化推究二三真僞難辨請下徐揚二州密訪必令
獲實不盈數旬玉石可覩於是詔推訪周果以罪歸
闕便假職位如子恭所疑
蕭寶寅爲尙書左僕射正光四年上表曰臣聞堯典

有黜陟之文周書有考績之法雖其源難得而尋然
條流抑亦可以知矣大較在於官人用財審於所蒞
練迹較名驗於虛實豈有臧否得之餘論優劣著於
歷試者乎既聲窮於月旦品定於黃紙用效於名輩
事彰於臺閣則實賞罰之途差有商准用舍之宜非
無依據雖復勇進忘退之儔奔競於市里過分亡涯
之請馳騫於多門猶且顧其聲第慎其與奪器分定
於下爵位懸於上不可妄叨故也今竊見考功之典
所懷未喻敢竭無隱誠陳萬一何者竊惟文武之名
在人之極地德行之稱爲生之最首忠貞之美立朝
之譽仁義之號出處之端自非職惟九官任當四嶽
授日爾諧讓稱愈往將何以克厭大名允茲令問自
北以來官內高卑人無貴賤皆飾辭假說用相褒舉
涇渭同波薰蕕共器求者不能量其多少與者不復
覈其是非遂使冠履相貿名與實爽謂之考功事同
汎陟紛紛漫漫焉可勝言又在京之官積年一考其
中或所事之主遷移數四或所奉之君身名廢絕或
具僚離索或同事彫零雖當時文簿紀其殿最日久
月深散落都盡人有去留誰復掌其勤惰或停休積
穢數千累年之後方思追訪齊立其考第無不苟相

悅附其爲唇齒飾垢掩疵妄加丹素趣令得階而已
無所顧惜賢達君子未免斯患中庸已降夫復何論
官以求成身以請立上下相蒙莫斯爲甚又勤恤人
隱咸歸守令厥任非輕所責實重然及其考課悉以
六載爲程旣而限滿代還復經六年而敘是則歲周
十二始得一階於東西兩省文武關職公府散佐無
事冗官或數旬方應一直或朔望止於斲朝及其考
日更得四年爲限是一紀之中便登三級彼以實勞
遽任而遷遺之路至難此其散位虛名而陞陟之方
甚易何内外之相懸令厚薄之如是又聞之聖人太
寶曰位何以守位曰仁孟子亦曰仁義忠信天爵也
公卿大夫士人爵也古之人修其天爵而人爵從之故
雖文質異時汚隆殊世莫不寶茲名器不以假人是
以賞罰之柄常自持也至乃周之鬻鬻五叔無官漢
之察察館陶徒請豈不重骨肉私親愛誠以賞罰一
差則無以懲勸至公斲替則覬覦相欺故至慎至惜
懇懃若此况乎親非肺腑才乖秀逸或充單介之使
始無汗馬之勞或說興利之規終懸十一之潤皆虛
張無功妄指羸益坐獲數階之官藉成通顯之貴於
是巧詐萌生僞辨鋒出役萬慮以求榮開百方而逐

利握樞秉鈞者亦知其若斯但抑之則其流已注引
之則有何紀極夫琴瑟在於必和更張求其適調去
者既不可追來者猶或宜改案周官太宰之職歲終
則合官府各正所司受其會計聽其事致而詔於王
三歲則大計群吏之治而誅賞之愚謂今可粗依其
唯見居官者每歲終本曹皆明辨在官日月具覈才
行能否審其實用而注其上下游辭宥說一無取焉
列上尚書覆其合否如有紕繆卽正而罰之不得方
復推諉委下容其進退既定其優劣善惡交分庸短
下第黜凡以明法幹務忠清甄能以記賞總而奏之
後考功曹別書於黃紙油帛一通則本曹尚書與令
僕印署留於門下一通則以侍中黃門印署掌在尚
書嚴加緘密不得開視考績之日然後對共裁量如
此則少存實錄薄止姦回其內外考格裁非庸管乞
求博議以爲畫一若殊謀異策事關興廢遐邇所談
物無異議者自可臨時斟酌匪拘恒例至如授流引
比之訴冒榮求級之請如不限以關鍵肆其傍通則
蔓草難除涓流遂積穢我彛章撓茲大典謂宜明加
禁斷以全至治開返本之路杜撓弊之門如斯則吉
士盈朝薪樞載煥矣詔付外博議以爲永式竟無所

定時梁西豐侯正德來降實寅表曰伏見揚州表蕭
正德自云避禍遠投宸掖背父叛君駭議衆口深心
指趣厥情難測臣聞立身行道始於事親終於事君
故君親盡之以嘗敬嚴父兼之以博愛斯人倫之所
先王教之盛典三千之罪莫大於不孝毀則藏姦嘗
刑靡赦所以晉恭獲謗無所逃死衛伋受誣二子繼
沒親命匪棄國孰無父况今封豕尚存長蛇未滅偷
生江表自安毒醜而正德居猶子之親竊通侯之貴
父榮於國子爵於家履霜弗聞去就先結隔絕山淮
溫情永盡定省長違報復何日以此爲心心可知矣

皇朝綿塞累葉思均四海自北徂南要荒仰澤能言
革化無思不遘賁玉帛於丘園標忠孝以納賞列藁
街于伊維集華裔其如歸披髮隳身之酋屈膝而請
吏交趾文身之渠欵關而効質至如正德宜甄義以
致貶昔越棲會稽賴宰嚭以獲立漢因彭越實丁公
而獲免吳項已平二臣卽法豈不錄其情哉欲明責
以示後况徵君忽父狼子野心旣不親親安能親人
中間變詐或有萬等伏惟陛下聖鏡自天欽光纂曆
昭德塞違以臨羣后脫包此凶醜寘之列位百官是
象其何誅焉臣釁結禍深痛纏肝髓日暮途遙復報

無日豈區區於一豎哉但才雖庸近職居獻替愚衷寸抱敢不申陳伏願聖慈少垂察覽訪議槐棘論其是非使秋霜春露施之有在相鼠攸刺遄死有歸無令申俶受笑於苟存曾閔淪名於盛世正德既至京師朝臣待之尤薄歲餘還叛

張普惠爲尙書右丞詔訪寃屈普惠上疏曰詩稱文王孫子本枝百世易曰大君有命開國承家皆所以明德睦親維城作翰漢祖封爵之誓曰使黃河如帶泰山如礪國以永存爰及苗裔又申之以丹書之信重之以白馬之盟其以疆大分王罪犯蹙邑者蓋有

之矣未聞父基子構世載忠賢一死一削用爲典者也故尙書令臣肇未能遠稽古義近寃成旨以初封之詔有親王二千戶始蕃一千戶二蕃五百戶三蕃三百戶謂是親疎世減之法又以開國五等有所減之言以爲世減之趣遂立格奏奪稱是高祖本意仍被旨可差謬之來亦已甚矣遂使勲親懷屈幽顯同寃紛訟彌年莫之能息臣輒遠研先旨格窮其事世變滅奪今古無據又尋詔書稱昔未可采今始列辭豈得混一周分遠近也故樂良樂安同蕃異封廣陽安豐屬別戶等宁定之嫡邑齊親王河間戚近更從

蕃食是乃太和之恩旨初封之倫級勲親兼樹非世減之大驗者也博陵襲爵亦在太和之年時不世減以父嘗全食足戶充本同之始封減從令式如此則減者減其所足之外足者足其所減之內減之旨乃爲所貢所食爾欲使諸王開國弗專其民賦役之差貴賤有等蓋准擬周禮公侯伯子男貢稅之法王食其半公食三分之一侯伯四分之一子男五分之一是以親與得足充本清淵吏多減戶故始封承襲俱稱所減謂減之以貢食謂食之於國斯實高祖霈然之詔減實之理聖明自釋求之史帛猶有未盡時尙

書臣琇疑減足之參差旨又判之以開訓所減之旨可以不疑於世減矣而臣肇弗稽往事曰五等有所減之格用爲世減之法以王封有親疎之等謂是代削之條妄解成旨雷同世奪以此毒天下民其從乎故太傅任城文宣王臣澄樞弼累朝識洞今古爲尙書之日殷勤執請孜孜於重議被旨不許於此遂停又律罪例減及先帝之總麻令給親恤止當世之有服律令相違威澤異品使七廟曾玄不治末恤嫡封則賦祿無窮枝庶則屬絕內貶儀刑作孚億兆何觀夫一人吁嗟尙日虧治今諸王五等各稱其寃七廟

之孫竝訟其初陳訴之案盈於省曹朝言巷議咸云其苦恐非先王所以建萬國親諸侯睦九族之義也臣猥忝今任於茲五年推尋旨格謂無世減之理謂請近遵高祖減食之謀遠循百代像賢之誥退繇九代進從九儀則刑罰有倫封不虛黜斯乃文王所以尅慎不敢侮於鰥寡而况於公侯伯子男乎今旨訪寃滯愚以此爲大者求尋光錫之詔并諸條所奪所請事事窮審諸王開國非犯罪削奪者竝求還復其昔嘗全食足戶充本減從今式者從前則力多於親懿全奪則減足之格不行愚謂祿力竝應依所之食

而食之若是則力少蕃王粟帛仍本戶邑雖盈之減兩秦既有全食足戶之異故不得同於新封之力爾親恤所褒請依律斷伏惟親親尊賢必以功立尊賢以司民其可不慎乎親親以睦族其可棄乎如脫蒙允求以日判爲始其前來吏秩悉年久不追臣又聞明德慎罰文王所以造周咸有一德殷湯所以革夏故能上令下從風動斯偃畏之如雷電敬之如神明是以天子加天下綏萬國若天之無不覆地之無不載遷都之構庶方子來汎澤所沾降及陪皂寧有嶽牧二石縣令丞尉治中別駕及諸軍幢受命於朝廷

而不可豫乎此之班駮雲雨之不平謂是當時有司出納之未允何以明之仰尋世宗詔書百官普進一級中有朝臣刺史登時褒授內外貴賤莫不同澤又覆奏稱爰及陪皂明無不逮自後人率其心紛綸盈庭誤惑視聽限以汎前更爲年斷六年三年之考以意折之汎前汎後之歲隔而絕之遂使如綸之旨頓於一朝汎前六年上第者全不得汎三年上第者蒙半階而已汎前汎後合考者隔絕而不得無考者無折而全汎前汎後有考無考竝蒙汎與否乖違勤舊彌屈差若毫釐謬以千里其此之謂乎易曰言行君

子之所以動天地可不慎與言之不從無以抑之遂奏奪牧守外祿全不與汎散官改爲四年之考汎前者八年一階致令不一寃訟惟慎與而復奪其本在茲致使邀駕擊鼓者無理以加其罪誹謗所繇生公聽者無辭以抑其言嘽陪所繇起夫琴瑟不調弛而更張善人國之本也其可棄乎詩云樂只君子邦家之基堯典曰克明峻德呂刑曰何擇非人周官官弗必備惟其人咎繇曰無曠庶官天工人其代之詩云人之云亡邦國殄悴又曰雨我公田遂及我私孔子曰不患寡而患不均如此則官必擇人汎則宜溥請

遠遵正始元旨近准聖明二汎內外百官悉同一階
不以汎前折考不以散任增年則同雲共澍四海均
洽如謂未可宜以權理折之易曰聖人之大寶曰位
何以守位曰仁春秋傳曰擇人如此則乃可無汎不
可無一日考守宰之汎旣以追奪則百官之汎不應
同霑溥澤復誰敢怨夫三載之考興於太和再周之
陟通於景明開劇祿力自有加減陪臣以事省降而
考則三年朝官旣祿等平曹更周四乃陟考祿參差
各稱其枉且一日于役征戍苦於煩任終年專使決
斷重於陪臣常尚若通於三載之考無汎隔折則各
盈其分亦足以近塞羣口遠綏四方日映求賢猶有
所失况不遵擇人之訓唯以停久而進乎自今已後
考黜願以三宅革心選進願以三儁居德書曰舉能
其官惟爾之能稱非其人惟爾弗任斯同道所以佑
辟康民敢不敬守臣忝官樞副毗察寃訟寤寐惟省
謂宜追正愚固所陳萬無可採

辛雄孝昌末爲尚書右丞上疏曰帝王之道莫尚於
安民安民之本莫加於禮律禮律旣設擇賢而行之
天下雍熙無非任賢之功也故虞舜之盛穆穆標美
文王受命濟濟以康高祖孝文皇帝天縱大聖開復

典謨選三代之異禮採二漢之典法端拱而四方安
刑措而兆民治世宗重光繼軌無念聿脩官人有道
萬里清謐陛下勤勞日昃躬親庶政求瘼恤民無時
甦憇而黔首紛然兵車不息以臣愚見可得而言自
神龜未來專以停年爲選士無善惡歲久先叙職無
劇易名到授官執案之吏以差次日月爲功能銓衡
之人以簡老舊爲平直且庸劣之人莫不貪鄙委卧
筭以共治之重託傾鼠以百里之命皆貨賄是求肆
心縱意禁制雖煩不勝其欲致令徭役不均發調違
謬歛箕盈門囚執滿道二聖明詔寢而不遵畫一之

法懸而不用自比夷夏之民相將爲亂豈有餘懷哉
蓋繇官授不得其人百姓不堪其命故也當今天下
黔黎久經寇賊父死兄亡子弟淪陷流離艱危十室
而九白骨不收孤孑靡恤財殫力盡無以卒歲宜及
此時早加慰撫蓋助陛下治天下者唯在守令最須
簡置以康治道但那縣選舉繇來頗輕貴游雋才莫
肯居此宜改其弊以定官方請上等郡縣爲第一請
中等爲第二請下等爲第三清選補之法如盡才望
如不可竝後地先才不得拘以停年意無銓革三載
黜陟有稱者補在京名官如前代故事不歷郡縣不

得為內職則人思自勉上下同心枉屈可申強暴自
息刑政日平民俗奉化矣復何憂於不治何恤於逆
徒也竊見今之守令清慎奉治則政平訟理有非其
才則綱維荒穢伏願陛下暫留天心較其利害則臣
言可驗不待終朝昔杜畿寬惠河東無警蘇則分糧
金城尅復畧觀古今風俗遷訛無不任賢以相化革
朝任夕治功可立待若遵常習故不明選典欲以靜
民便恐無日書奏不行

册府元龜卷第四百七十二 十一月初三日

册府元龜卷第四百七十三

巡按福建監察御史臣李嗣京 訂正

新建縣舉人 臣戴國士參閱

知建陽縣事 臣黃國琦較釋

臺省部 一十七

奏議第四

北齊高隆之初仕魏為尚書右僕射自孝明孝昌之
後天下多難刺史太守皆為當部都督雖無兵事皆
立佐僚所在頗為煩擾隆之表請自非實在邊要見

有兵馬者悉皆斷之又朝貴多假嘗侍以取貂蟬之飾隆之自表解侍中并陳諸假侍中服者請亦罷之詔皆如表自軍國多事冒名竊官者不可勝數隆之奏請檢括旬日獲五萬餘人而羣小謹囂隆之懼止王紘後主時爲散騎嘗侍武平五年陳人寇淮南詔令羣官共議禦捍封疆輔相請出討擊紘曰官軍頻經失利人情騷動若復興兵黷武出頓江淮恐北狄西寇乘我之弊傾國而來則大事去矣莫若薄賦省徭息民養士使朝廷協睦遐邇歸心征之以仁義鼓之以道德天下皆當肅清豈直僞陳而已錄尚書事

高阿那肱謂衆曰從王武衛者南席衆皆同焉

後周蘇綽爲度支尚書太祖方欲革易時政務弘疆國富民之道故綽得盡其智能贊成其事減官員置二長并置屯田以資軍國又爲六條詔書奏施行之其一先治心曰凡今之方伯守令皆受命天朝出臨下國論其尊貴竝古之諸侯也是以前世帝王每稱其治天下者唯良守宰耳明知百僚卿尹雖各有所司然其理民之本莫若宰守之最重也凡理民之體先當理己心心者一身之主百行之本心不清淨則思慮妄生思慮妄生則見理不明見理不明則是非

理民之非謬亂則一身不能自理安能理民也是以
理民之本在於清心而已夫所謂清心者非不貪貨
財之謂也乃欲使心氣清和志意端淨心和志靜則
邪僻之慮無因而作邪僻不作則凡所思念無不皆
得至公之理率至公之理以臨其民則彼下民孰不
從化是以稱理民之本先在理心其次又在理身凡
人君之身者乃百姓之表一國之的也表不正不可
求直影的不明不可責射中今君身不能自理而望
理百姓是猶曲表而求直影也君行不能自修而欲
百姓修行者是猶無的而責射中也故為人君者必

心如清水形如白玉躬行仁義躬行孝悌躬行忠信
躬行禮讓躬行廉平躬行儉約然後繼之以無倦加
之以明察行此八者以訓其民是以其人畏而愛之
則而象之不待家教日見而自興行矣其二敦教化
曰天地之性唯人為貴明其有中和之心仁恕之行
異於木石不同禽獸故貴之耳然性無嘗定隨化而
遷化於敦朴者則質直化於澆偽者則浮薄浮薄者
則衰弊之風質直者則淳和之俗衰弊則禍亂交興
淳和則天下自治治亂興亡無不皆錄所化也然世
道凋喪已數百年大亂滋甚且二十歲民不見德唯

兵革是聞上無教化惟刑罰是用而中興始爾大難未平加以師旅因之以饑饉凡百草剝率多權宜致使禮讓弗興風俗未改比年稍登稔徭賦差輕衣食不切則教化可修矣凡諸牧守令長各宜洗心革意上承朝旨下宣教化矣夫化者貴能扇之以淳風浸之以大和被之以道德示之以朴素使百姓豐豐日遷於善邪偽之心嗜慾之性潛以消化而不知其所以然此之謂化也然後教之以孝悌使民慈愛教之以仁順使民和睦教之以禮義使民敬讓然慈愛則不遺其親和睦則無怨於人敬讓則不競於物三者既備則王道成矣此之謂教也先王之所以移風易俗還淳反素垂拱而臨天下以至於太平者莫不繇此此之謂要道也其三盡地利曰人生天地之間以衣食爲命食不足則飢衣不足則寒飢寒切體而欲使民興行禮讓者此猶逆坂走丸勢不可得也是以古之聖主知其若此故先足其衣食然後教化隨之夫衣食所以足者在於地利盡地利所以盡者繇於勸課有方主此教者在乎牧守令長而已民者冥也智不自周必待勸教然後得盡其力諸州郡縣每至歲首必戒勅部民無問少長但能操持農器者皆

今就田墾發以時勿失其所及布種既訖嘉苗須理
麥秋在野蠶停於室若此之時皆宜少長悉力男女
併功若揚湯救火寇盜之將至然後可使農夫不廢
其業蠶婦得就其功若有遊手怠惰早歸晚出好逸
惡勞不勤事業者則正長牒各郡縣守令隨事加罰
罪一勸百此則明宰之教也夫百畝之田必春耕之
夏種之秋收之然後冬食之此三時者農之要也若
失其一時則穀不可得而食故先王之戒曰一夫不
耕天下必有受其飢者一婦不織天下必有受其寒
者若此三時不務省事而令民廢農者是則絕民之
命驅以就死然單劣之戶及無牛之家勸令有無相
通使得兼濟三農之隙及陰雨之暇又當教民種桑
植果藝其菜蔬修其園圃畜育鷄豚以備生生之資
以供養老之具夫爲政不欲過碎碎則民煩勸課亦
不容太簡簡則民怠善爲政者必消息時宜而適煩
簡之中故詩曰不剛不柔布政優優則百祿是求如
不能爾則必陷於刑辟矣其四擢賢良曰天生蒸民
不能自化故必立君以理之人君不能獨理故必置
臣以佐之上自帝王下至列國置臣得賢則治失賢
則亂此乃自然之理百王不能易也令刺史縣令悉

有僚吏皆佐助之人也刺史府官則命於天朝其州吏以下並牧守自置自昔以來州郡大吏但取門資多不擇賢良未曹小吏唯試刀筆並不問志行吏門資者乃先世之爵祿無妨子孫之愚瞽刀筆者乃身命之末材不廢性行之澆僞若門資之中而得賢良是則策驥驥而取千里也若門資之中而得愚瞽是則土牛木馬形似而用非不可以涉道也若刀筆之中而得志行是則金相玉質內外俱美實爲人寶也若刀筆之中而得澆僞是則飾畫朽木悅目一時不以充椽椽之用也今之選舉者當不限資蔭唯在得人苟得其人自可起廝養而爲卿相伊尹傳說是也而况州郡之職乎苟非其人則丹朱商均雖帝王之胤不能守百里之封况於公卿之胄乎繇此而言官人之道可見矣凡所求材藝者爲其可以理民若有材藝而以正直爲本者必以其材而爲理也若有材藝而以奸僞爲本者將因其官而爲亂也何致化之可得乎是故將求材藝必先擇志行善者則舉之其志行不善者則去之而今擇人者多云邦國無賢莫知所舉此乃未之思也非適理之論所以然者古人有言明主聿興不降佐於昊天大人基命不擢才於

后土嘗引一世之人理一世之務故殷周不待稷契之臣魏晉無假蕭曹之佐仲尼曰十室之邑必有忠信如丘者焉豈有萬家之都而云無士但求之不勤擇之不審或用之不得其所任之不盡其材故云無耳古人云千人之秀曰英萬人之英曰雋今之智效一官行聞一邦者豈非近英雋之士也但能勤而審去虛取實各得州郡之最而用之則民無多少皆足化矣孰云無賢夫良玉未剖與瓦石相類名驥未馳與駑馬相雜及其剖而瑩之馳而試之玉石駑驥然後始分彼賢士之未用也混於凡品竟何以異要任之以事業責之以成務方與彼庸流較然不同昔呂望之屠釣百里奚之飯牛甯生之扣角管夷吾之三敗當此之時悠悠之徒豈謂其賢及昇王朝登霸國積數十年功成事立始識其奇士也於是後世稱之不容於口彼瓌偉之才不世之傑尙不能以未遇之時自異於凡品况降此者哉若必待太公而後用是千載無太公必待夷吾而後任是百世無夷吾所以然者事必從微而至著功必積小以至大豈有未任而已成不用而先達也若識此理則賢可求士可擇得賢而任之得士而使之則天下之理何向而不

可成也然善官人者必先省其官官省則善人易充
善人易充則事無不理官煩則必雜不善之人雜不
善之人則政必有得失故語曰官省則事省事省則
民清官煩則事煩事煩則民濁清濁之錄在於官之
煩省案今吏員其數不少昔民殷事廣尚能克濟况
今戶口減耗依員而置猶以爲少如聞在下州郡尚
有兼假擾亂細民甚爲無理諸如此輩悉宜罷黜無
得習嘗非直州郡之官宜須善人爰至黨族閭里正
長之職皆當審擇各得一鄉之選以相監統夫正長
若理民之基基不傾者上必安凡求賢之路自非一
途然所以得之審者必錄任而試之考而察之起於
居家至於鄉黨訪其所以觀其所錄則人道盡矣賢
與不肖別矣率此以求則庶無愆悔矣其五卹獄訟
曰人受陰陽之氣以生有情有性性則有善情則爲
惡善惡旣分而賞罰隨焉賞罰得中則惡止而善勸
賞罰不中則民無所措手足民無所措手足則怨叛
之心是以先王重之特加戒慎者欲使察獄之官精
心悉意推究根源先之以五聽參之以證驗妙觀情
狀窮寃隱伏使奸無所容罪人必得然後隨事加刑
輕重皆當赦過矜愚得情勿喜又能消息情理斟酌

禮律無不曲盡人心而遠明大教使獲罪者如歸此則善之上者也然宰守非一不可人人皆有通識推理求情時或難盡唯當率至公之心去阿枉之志務求曲直念盡平當聽察之理必窮所見然後考訊以法不苛不暴有疑則從輕未審不妄罰隨事斷理獄無停滯此亦其次若乃不以仁恕而肆其殘暴同民木石專用撻楚巧詐者雖事彰而獲免辭弱者乃無罪而被罰有如此者斯則下矣非其理所寄今之宰守當勤於中科而慕其上善如在下條則刑所不赦又當深思遠大念存德教先王之刑曰與殺無辜寧赦有罪與其害善寧其利淫明必不得中寧濫捨有罪不謬害善之也若今之從政者則不然浮文巧劾寧致善人於法不免有罪於刑所以然者非皆好殺人也但云爲吏寧酷可免後患此則情存自便不念至公奉法如此皆姦人也夫人者天地之貴物一死不可復生然楚毒之下以痛自誣不被申理遂陷刑戮者將恐徃徃而有是以自古以來設五聽三宥之法著明慎庶獄之典此皆愛民甚也凡伐木殺草田獵不順尙違時令而虧帝道况刑罰不中濫害善人寧不傷天心犯和氣也天心傷和氣損而欲陰陽調

適四時順序萬物阜安蒼生悅樂者不可得也故語
曰一夫吁嗟王道爲之傾覆正謂此也凡百宰守可
祭慎乎若有深姦巨猾傷化敗俗悖亂人倫不忠不
孝故爲悖道者殺一儆百以清王化重刑可也識此
二途則刑政盡矣其六均賦役曰聖人之大寶曰位
何以守位曰仁何以聚人曰財明王必以財聚人以
仁守位國而無財位不可守是故三五以來皆有征
稅之法雖輕重不同而濟用一也今寇逆未平軍國
費廣雖未遑減省以卹民瘼然宜令平均使下無怨
夫平均者不捨豪疆而糞貧弱不縱姦巧而困愚拙
此之謂均也故聖人曰蓋均無貧然財貨之生其功
不易紡績織組起於有漸非旬日之間所可造次必
須勸課使預營理絹鄉先事織組麻土早修紡績先
時而備至時而輸故王賦獲供下民無困如不預勸
戒臨時迫切復恐稽緩以爲已過摶扑交至取辦日
前富商大賈緣茲射利有者從之貴買無者舉之舉
息輸稅之民於是弊矣租稅之時雖有大式至於斟
酌貧富差次先後皆事起於正長而繫之於守令若
斟酌得所則政和而民悅若簡理無方則吏姦而民
怨又差發徭役多不存意致令貧弱者或重徭而遠

成富疆者或輕使而近防守令用懷如此不存恤民之心皆王政之罪人也太祖甚重之嘗置諸座右又令百司習誦之其牧守令長非通六條及計帳者不得居官

隋柳彧為司武中士平齊之後帝大賞從官留京者不預或上表曰今太平告始信賞宜明酬勲報勞務先有本屠城破邑出自聖規斬將擐旗必繇神略若負戈擐甲征并劬勞至於鏹撫國家宿衛為重俱稟成筭非專已能留從事同功勞須等皇太子以下實有守宗廟之功昔蕭何留守茅生先於平陽穆之器

中歿後猶蒙優策不勝管見奉表以聞於是留守並加汎級

楊尙希高祖開皇初為河南道行臺兵部尙書見天下州郡過多上表曰自秦并天下罷侯置守漢魏及晉邦邑屢改竊見今郡縣倍多於古或地無百里數縣並置或戶不滿千二縣分領具察以衆資費日多吏卒入倍租調歲減清幹才良百分無一動須數萬如何可覓所謂民少官多十年九牧琴有更張之義瑟無膠柱之理今存要去開併小為大國家則不虧粟帛選舉則易得賢才敢陳管見伏聽裁處帝覽而

嘉之於是遂罷天下諸郡

李諤爲治書侍御史諤見禮教彫弊公卿薨亡其愛妾侍婢子孫輒嫁賣之遂成風俗諤上書曰臣聞追遠慎終民德歸厚三年無改方稱爲孝如聞與臣之內有父祖亡沒日月未久子孫無賴便分其妓妾嫁賣取財有一於茲實損風化妾雖微賤親承衣履服斬三年古今通式豈容遽褫縗經強傅鉛華泣辭靈机之前送付他人之室凡在見者猶致傷心况乎人子能堪斯忍復有朝廷重臣位望通貴平生交舊情若弟兄及其亡沒杳同行路朝聞其死夕規其妾妾便求媾以得爲限無廉恥之心棄友朋之義且居家理治可移於官旣不正私何能贊務帝覽而嘉之五品已上妻妾不得改醮始於此也諤又以屬文之家體尙輕薄遞相師效流宕忘反於是上書曰臣聞古先哲王之化民也必變其視聽防其嗜欲塞其邪放之心示以淳和之路五教六行爲訓民之本詩書禮易爲道義之門故能家復孝慈人知禮讓正俗調風莫大於此其有上書獻賦制誅鐫銘皆以褒德序賢明勳證理苟非懲勸義不徒然降及後代風教漸落魏之三祖更尙文詞忽君人之大道好雕虫之小藝

下之從上有同影響競騁文華遂成風俗江左齊梁
其弊彌甚貴賤賢愚唯務吟詠遂復遺理存異尋虛
逐微競一韻之奇爭一字之巧連篇累牘不出月露
之形積案盈箱唯是風雲之狀世俗以此相高朝廷
據茲擢士祿利之路旣開愛尚之情愈篤於是閭里
童昏貴遊總及未窺六甲先製五言至如義皇舜禹
之典伊傅周孔之說不復關心何嘗入耳以敬誕爲
清虛以緣情爲勲績損儒素爲古拙用詞賦爲君子
故文筆日繁其政日亂良繇棄大聖之軌模構無用
以爲用也捐本逐末流遁華壤遞相師祖久而愈扇

夫大隋受命聖道幸興屏黜浮詞遏止華僞自非懷
經抱質志道依仁不得引領搢紳參厠纓冕開皇四
年普詔天下公私文翰竝宜實錄其年九月泗州刺
史司馬幼之文表華艷付所司治罪自是公卿大臣
咸知正道莫不鑽仰墳素棄絕華綺擇先王之令典
行大道於茲世如聞外州遠縣仍踵弊風選吏舉人
未遵典則至於宗黨稱孝鄉曲歸仁學必典謨交不
苟合則擯落私門不加收齒其學不稽古逐俗隨時
作輕薄之篇章結朋黨而求譽則選充吏職舉送天
朝蓋繇縣令刺史未行風教猶挾私情不存公道臣

既忝憲司職當糾察若聞風卽劾恐挂網者多請勒
請司普加搜訪有如此者具狀送臺諤又以當官者
好自矜伐上奏曰臣聞舜戒禹曰汝惟不矜天下莫
與汝爭能汝惟不伐天下莫與汝爭功言偃又云事
君數斯辱矣朋友數斯疏矣此皆先哲之格言後王
之軌轍然則人臣之道陳力濟時雖勤比大禹功如
師望亦不得厚自矜伐上要君父况復功無足紀勤
不補過而敢自陳勲績輕干聽覽世之喪道極於周
代下無廉恥上使之然用人唯信其口取士不觀其
行矜誇自大便以幹濟蒙擢謙恭靜退多以恬默覺
遠是以通表陳誠先論已之功狀承顏敷奏嘗道臣
最用心自銜自媒都無慙恥之色强于橫請唯以乾
沒爲能自隋受命此風頓改耕夫販婦無不革心况
乃大臣仍蹈弊俗如聞刺史入京朝覲乃有自陳勾
簡之功誼訴堦墀之側言辭不遜高自稱譽上黷冕
旒特爲難恕凡如此輩具狀送臺明加罪黜以懲風
範帝以諤前後所奏頒示天下四海靡然向風深革
其弊

盧思道爲散騎侍郎兼內史侍郎事于時議置六卿
將除大理思道上奏曰省有駕部寺留太僕省有刑

部寺除大理斯則重畜產而賤刑名誠爲未可又陳殿庭非杖罰之所朝臣犯笞罪請以贖論帝嘉納之王劬爲員外散騎侍郎劬以古有鑽燧改火之義近代廢絕於長上表請變火日臣謹案周官四時變火以救時疾時火不數變時疾必興聖人作法豈徒然也在晉時有以雒陽火度江者代代事之相續不滅火色變青昔師曠食飯云是勞薪所爨晉平公使視之果然車輞令溫酒及炙肉用石灰柴火竹火草火麻芟火氣味各不同以此推之新火舊火理應有異伏望遠遵先聖於五時取五木以變火用功甚少獲益方大縱使百姓習久未能頓同尙食內廚及東宮諸王食廚不可不依古法帝從之

李德林爲內史令開皇中蘇威奏置五百家鄉正卽令理民間詞訟德林議以爲本廢鄉判官事爲其里閭親識剖斷不平今令鄉正專治五百家恐爲害更甚且今時吏部總選人物天下不過數百縣於六七百萬戶內銓簡數百縣令猶不稱其才廼欲於一鄉之內選一人能治五百家者必恐難得又卽是要荒小縣有不至五百家者復不可令兩縣共管一鄉勅令內外羣官就東宮會議自皇太子以下多從德林

議

蘇孝慈為工部尚書時京官及州並給公廨錢廼易生利以給公用至開皇十四年六月孝慈以為所在官司因循往昔皆以公廨物出舉與生唯利是求煩擾百姓敗風損俗莫斯之甚於是奏皆給地以營農廼易取利一皆禁止

唐許敬宗太宗貞觀十九年為中書侍郎時庶人承乾廢黜官僚多被除削久未收敘敬宗上表曰臣聞先王慎罰務在於恤刑往哲寬仁義在於宥過聖人之道莫尚于茲切見廢官五品以上除名棄斥頗歷

歲時但庶人疇昔之年身處不疑之地包藏悖逆陰結宰臣所預奸謀多連貴戚禍生慮表非可防萌宮內官僚迥無關預今乃投鼠及器孰謂無冤焚山毀玉稍同遷怒伏尋先典例有可原昔吳國陪臣則爰絲不聯於劉渙昌邑中尉則王吉免緣於海昏譬諸藥布乃策名於彭越比乎田叔亦委質於張敖主以凶逆陷誅夷臣以賢良荷收擢歷觀往代此類尤多近者有隋又遵斯義楊勇之廢罪止加於佞人李綱之徒皆不預於刑網古今裁其折衷史籍稱為美談而今張玄素令狐德棻趙弘智裴宣機蕭鈞等並砥

節勵操有雅望於當朝經明行修播令名於天下或以直言而遭箠扑或以忤意而見猜嫌一槩雷同竝羅天憲恐於王道傷在未弘繇是玄素等得敘用褚遂良高宗時爲吏部尚書時永徽三年詔追錄前代忠鯁子孫周相州惣管尉遲迥曾孫文禮訴言迥忠於周室爲隋所誅帝遣議之太冑卿江夏王道宗等議咸以迥死節於周宜有甄錄遂良進曰竊觀史籍咸以救君難則爲忠不救則爲逆春秋趙穿殺晉靈公趙盾爲正卿不討賊太史書曰趙盾弑其君繇此言之尉遲迥受周重寄旣聞隋文作相稱兵鄴下

南通於陳北連突厥頓兵六十餘日不赴國難免其罪惡爲幸已多若謂之忠臣所深惑羣議遂寢殿中侍御史張敬一奏曰臣聞堯舜謬謬以昌桀紂默默以亡臣竊以尉遲迥忠於周室身死國難遂良不以爲忠恐未爲允請召史官集議帝竟不許之

劉祥道顯慶初爲黃門侍郎知吏部選事祥道以銓綜之術猶有所闕乃上疏陳其得失其一日今之選司取士傷多且濫每年入流數過一千四百是傷多也雜色入流不加銓簡是傷濫也經明行修之士猶或罕有正人多取嘗徒之流豈能皆有德行卽知其

釐務者善人少而惡人多有國已來已四十載尙未
刑措豈不繇此乎但服膺告王之道者奏第然始赴
選趨走几案之間者不揀便加祿秩稽古之業雖尙
難知斗筭之材何期易進其雜色應入流人望令曹
司試判訖揀爲四等第一等付吏部第二等付兵部
次付主爵次付司勳其行署等私犯公坐者雖經赦
降以量配三司不經降者放還本貫與入流不濫官
無冗雜且令嘗徒之輩漸加勸勉其二曰古之選者
爲官擇人不聞取人多而官員有數入流無限以有
數供無限遂令九流繁摠人隨歲積今内外文武官
一品已下九品已上一萬三千四百六十五員略舉
大數當一萬四千人壯室而仕耳順而退取其中數
不過支三十年此則一萬四千人而略盡若年別入
流者五百人經三十年便得一萬五千足所須之數
况三十年之外在官者猶多此便有餘不慮其少今
年入嘗流者遂便逾一千四百計應數外嘗餘兩倍
又嘗選放還者仍停六七十人更復年別新加實非
處置之法其三日儒爲教化之本學者之宗儒教不
興風俗將替今庠序遍於四海儒生溢於三學勸誘
之方理實爲備而獎進之道士或未周但永徽已來

于今八載在官者以善政粗聞論事者以一言可採莫不光被綸旨超昇不次而儒生未聞恩及豈爲獎進之道其四曰國家富有四海已四十年百姓官寮未有秀才之舉豈今之人不如昔人將獎賢之道未至寧可方稱多士豈得遂闕斯人望六品已下爰及山谷特降綸言更審搜訪仍量爲條例稍加優獎不然赫赫之辰斯舉遂絕一代盛事爲朝廷惜之其五曰唐虞三代考績黜陟幽明兩漢用人亦久居其職所以因命官有倉庾之姓魏晉已來事無可紀今之在四考卽遷官人知將秩滿必懷去就百姓見有遷代能無苟且以去就之官臨苟且之輩責以移風易俗其可得乎望今四海就任加階至八考滿然後聽遷還淳反樸雖未敢必期送故迎新實減勞弊其六曰尙書省二十四司及門下中書都事主事主書等比來遷補皆取舊任流外有刀筆之人縱欲參用士流以儔類爲恥前後相承遂爲故事但掖省崇峻王言祕密尙書政本人物攸歸而多用胥徒恐未盡銓衡之理望有釐革稍清其選明年中書令杜正倫亦言入流人多爲政之弊帝遣祥道與正倫詳議其事時宰相已下憚於改作事竟不行

魏玄同上元中爲吏部侍郎玄同以旣委選舉恐未盡得人之術上疏曰臣聞制器者必擇匠以簡材爲國者必求賢以蒞官匠不良無以成其工官非賢無以致於理君者所以牧人也臣者所以佐君也君不養人失君道矣臣不輔君失臣任矣任人者誠國家之基本百姓之安危也方今人不加富盜賊不衰獄訟未清禮義猶闕者繇官不得其才官不得其才者取人之道未盡也臣又聞傳說曰明王奉若天道建邦設都樹后王君公承以大夫師長不惟逸豫惟此理人昔之都國今之州縣士有嘗君人有定主自求名佐各選英賢其大臣乃命於王朝耳秦并天下罷侯置守漢氏因之有沿有革諸侯得自置吏四百石已下其傅相大官則漢爲置之州郡掾吏督郵從卑悉任之於牧守爰自魏晉始歸吏部遞相祖襲以迄于今用刀筆以量才按簿書而察行法令之弊其來自久蓋君子重因循而憚改作有不得已者亦當遵獨見之明定卓然之議如今選司所行者非上皇之令典近代之權道所宜遷革實爲至要何以言之夫丈尺之量所及者蓋短鍾庾之器所積者寧多非其所及馬能度之非其所受何以容之况天下之大士

人之衆而可委之數人之手乎假使平如權衡明如水鏡力有所及焰有所窮銓綜旣紊所失斯廣又以比居此任時有罪人豈真媿彼清通昧於甄察亦將竭其庸妄揉彼茅絲情故旣行何所不至贓私一啟以及萬端至乃爲已謀安爲人擇利顧親疎而下筆看勢要而措情悠悠風塵此焉奔競擾擾游官同乎市井加以厚貌浮衷險如谿壑擇言觀行猶懼不同今使百行九能折之於一面具察庶品專斷於一司不亦難矣乎且魏人應運所據者蓋三分晉氏播遷所歸者非一統逮乎齊宋以及周隋戰爭之日多矣

承之時少瓜分瓦裂各在一方隋氏平陳十餘年耳接以災禍繼以饑饉旣德業之不遠或時事所未遑非謂是今而非古也武德貞觀與今亦異皇運之初庶事草創豈惟日不暇給亦乃人物至稀天祚大聖享國永年比屋可封異人間出咸以爲有道恥賤得時無怠諸色入流歲已千計羣司升位無復新加官有嘗員人無定限選集之始霧集雲屯擢敘於終十不收一淄澠雜混玉石難分用捨去留得失相半撫卽事之爲弊知及後之滋甚夫夏殷以前制度皆闕周監二代煥乎可觀豈諸侯之臣不肯命於天子王

朝庶官亦不專於一職故周穆王以伯冏爲太僕正命之日慎簡乃僚無以巧言令色便僻側媚唯吉士此則令其自擇下吏之文也太僕正中大夫耳以僚屬委之則言九卿亦必然矣周禮太宰內史掌爵祿廢置司徒司馬別掌興賢詔事當是分任於羣司而統之以數職各自求其小者而王命其大者焉夫委任責成君之體也所要者衆所用者精故能得濟濟多士芄芄棫樸裴子野有言曰官人之難先王言之尙矣居家視其孝友鄉黨服其誠信出入觀其志義憂難取其智謀煩之以事以觀其能臨之以利以察

六廉周禮始於學較論之州里告諸六事而後貢之士庭其在漢家尙猶然矣州郡積其功能然後爲五府舉其掾屬而昇於朝三公叅得除署尙書奏之天子一人之身所關者衆一賢之集其課也許故能官得其人鮮有敗事魏晉反是所失弘多子野之論蓋區區之宋朝耳猶爲不勝其弊而况於當今乎又從政爲官不可以無學故書曰學古入官議事以制傳曰我聞學以從政不聞以政入學今貴戚子弟例早求官或髫鬣之年已腰銀艾童卯之歲已襲朱紫弘文崇賢之生千牛輦脚之類課試旣淺藝能復薄而

門閥有素資望自高夫象賢繼父古之道也所謂胄子必裁諸學修六禮以節其生明七教以興其德齊八政以防其淫尚賢以崇德簡不肖以黜惡少則受業長而出仕竝錄德進必以才昇然可以利用賓王移家事國少仕則廢學輕試則無才於此一流良足惜也又勲官三衛流外之徒不待州縣之舉直取之於書判恐非先行德而後言才之義也臣又以爲國之用人有似人之用財貧者厭糲糠思短褐富者餘梁肉衣輕裘然則當衰弊乏賢之時則可磨礲朽鈍而乘馭之在太平多士之日亦宜妙選髦俊而任使

之詩云翹翹者方可用財理亦當爾選人幸多尤宜簡擇臣竊見制書每令三品五品薦士下至九品亦令舉人此朝廷具席旁求之意也但以褒貶不甚明得失無大隔故一人上不憂黜責下不盡披揚苟以應命莫慎所舉且唯賢知賢聖人篤論伊尹旣舉不仁咸遠復患階秩雖同人才異等身且濫集鑿豈知人今欲務得實才兼宜擇其舉主流清因源潔影端繇表正漢書云張耳陳餘之賓客廝役皆天下俊傑彼之蕞爾猶能若斯况以神皇之聖明國家之德業而不建長久之策爲無窮之基盡得賢取士之術而

但顧望魏晉之遺風留意周隋之末事臣竊惑之伏願稍迴聖慮時採芻言略因周漢之規以分吏部之選卽望所用精詳鮮於差失疏奏不納

冊府元龜卷第四百七十三

十一月初四日校

冊府元龜卷第四百七十四

巡按福建監察御史臣李嗣京 訂正

知甌寧縣事 臣 孫以敬 叅閱

知建陽縣事 臣 黃國琦 較釋

臺省部 一十八

奏議第五

唐李嶠則天朝爲鳳閣舍人時初置右御史臺巡按天下嶠上疏陳其得失曰陛下創置右臺分巡天下察吏人善惡觀風俗得失期政途之綱紀禮法之準

繩無以加也然猶有未折衷者臣請試論之夫禁網尚疎法令宜簡簡則法易行而不煩雜疎則所羅廣而無苛碎竊見垂拱二年諸道巡察使所奏科目凡四十有四件至於別準格勅令察訪者又有三十餘條而巡察使率是三月已後出都十一月終奏事時限迫促簿書填委晝夜奔逐以赴限期而每道所察文武官多至二千餘人少者一千已下皆須品量材行褒貶得失欲令曲盡行能則皆不暇此非敢惰於職而慢於官也實材有限而力不及耳臣望量其功程與其節制使器周於用力濟於時然後進退可以

責成得失可以精覈矣又曰今之所察但準漢之六條推而廣之則無不包矣無爲多張科目空費簿書且朝廷萬機非無事也機事之動嘗在四方是故冠蓋相望郵驛繼踵今巡使旣出其外州之事悉當委之則傳驛大減矣然則御史之職故不可得闕自非分州統理無餘濟其繁務請大小相兼率十州置御史一人以周年爲限使其親至屬縣或入閭里督察姦訛觀採風俗然後可以求其實効課其成功若此法果行必大禪政化且御史出持霜簡入奏天闕其於勵已自修奉職存憲比於他吏可相百也若其按

劾姦邪糾謫欺隱比於他吏可相十也陛下試用臣
言妙擇賢能委之心膺假溫言以制之陳賞罰以勸
之則莫不盡力而効死矣何政事之不理何禁令之
不行何妖孽之敢興則天善之乃下制分天下爲二
十道簡擇堪爲使者會有沮議者事竟不行
薛謙光爲補闕天授三年正月上疏曰臣聞國以得
賢爲寶臣以舉士爲忠是以子皮之讓國僑鮑叔之
推管仲燕昭委兵於樂毅苻堅託政於王猛及子產
受國人之謗夷吾貪其賈之財昭王錫輅馬以止讒
永固戮樊世以除讒處猜嫌而益信行間毀而無疑

此錄默而識委而察之浮也至若宰我見遇於宣尼
逢萌被知於文叔韓信無聞於項氏毛遂不齒於平
原此失士之故也是以人主愛不肖之士則政垂得
賢良之佐則時泰故堯資八元而庶績其理周任十
亂而天下和平錄是言之則知士不可不察而官不
可妄授也何者比來舉薦多不以才假譽馳聲互相
推獎希潤身之小計忘臣子之大猷非所以報國求
賢副陛下翹翹之望者也臣竊窺古之取士實異於
今先觀名行之源考其鄉邑之譽崇禮讓以勵已顯
節義以標信以敦朴爲先最以彫蟲爲後科故人崇

勸讓之風士去輕浮之行希仕者必修貞確不拔之操行難進易退之規衆議以定其高下郡將難誣於曲直故計貢之賢愚卽州將之榮辱穢行之彰露亦鄉人之厚顏是以李陵降而隴西慙于木隱而西河美故名勝於利則小人之道銷利勝於名則貪暴之風扇是知化俗之本須擯輕浮昔吳缺以禮讓昇朝則晉人知禮文翁以儒林獎俗則蜀士崇儒燕昭好馬則駿馬來庭葉公好龍則真龍入室繇是言之未有上之所好而下不從其化者也自亡國之季雖雜縱橫而漢代求材猶徵百行是以禮義之士敏德自

修里閭推高然後爲府寺所辟魏氏取人尤愛放達晉宋之後祇重門資獎爲人求官之風垂授職惟賢之義有梁薦士雅愛屬詞陳氏簡賢特珍賦詠故其俗以講酒爲重不以修身爲務迨至隋室餘風尚存開皇李諤論之於文帝曰魏之三祖更好文詞忽君人之大道好彫蟲之小藝連篇累牘不出月露之形積案盈箱唯是風雲之狀代俗以此相高朝廷以茲擢士故文筆日煩其政日亂帝納李諤之策繇是下制禁斷文筆浮詞其年泗州刺史司馬幼之以表不典寔得罪於是風俗改勵政化大行煬帝嗣興又變

前法置進士等科於是後生之徒復相倣倣因陋就寡赴速邀時緝綴小文名之策舉不以指實爲本而以浮虛爲貴有唐纂曆雖漸革於前非陛下君臨思察才於共理樹本崇化唯在旌賢今之舉人有乖事實鄉議決小人之筆行脩無長者之論策第喧競於州府祈恩不勝於拜伏或明制纔出試遣搜駁驅馳府寺之門出入王公之第上啓陳詩唯希咳唾之澤摩頂至足莫荷提攜之恩故信號舉人皆稱覓舉覓爲自求之稱未是人知之詞察其行而度其材則人品於茲見矣徇己之心切則至公之理乖貪仕之性

彰則廉潔之風薄是知府命雖高異叔度勤勤之讓黃門已貴無秦嘉耿耿之辭縱不能挹已推賢亦不肯待於三命豈與夫白駒皎皎不雜風塵束帛寥寥榮高物表較量其廣狹也是以耿介之士羞自拔而致其辭循常之人舍其疎而取其附故選司補授喧然於禮闈州貢賓王諍訟於階闈謗議紛合浸以成風夫競榮者必有競利之心謙遜者亦無貪賄之累自非上智焉能不移在於中人理飾習俗若重謹厚之士則懷祿者必崇德以修名若開趨競之源則邀利者皆戚施而附會附會則百姓罹其弊修名則兆

庶蒙其福故風化之漸靡不歸茲今訪鄉閭之談唯
祇歸於里正縱使各虧禮則罪挂刑章或冒籍以偷
資或邀勳而竊級假其不義之賂卽是無犯鄉閭豈
得比郭有道之詮量茅容望重裴逸民之賞拔夏少
名高語其優劣也祇如才應經邦之流唯令試策武
能制敵之例只驗彎弧若其文擅清奇便充甲第藻
思微減旋卽告歸以此收人恐垂事實何者樂廣假
筆於潘岳靈運詞高於穆之平津文劣於長卿子建
華麗於荀彧若以射策爲最則潘謝曹馬必居孫樂
之右若使協贊機猷則安仁靈運亦無裨附之益總

此言之不可一槩而取也至如武藝則趙雲雖勇資
諸葛之指馮周勃雖雄乏陳平之計略若使樊噲居
蕭何之任必失指縱之機使蕭何入戲下之軍亦無
免主之効故鬪將長於摧鋒謀將審於料事是以文
泉聚米知隗囂之可圖陳湯屈指識烏孫之自解入
難之謀設高祖退慙於酈生九拒之計窮公輸息心
於伐木謀將不長於弓馬良將寧資於射策豈與夫
元長自表廣飾詞鋒曹植題章虛飛麗藻較量其不
可也伏願陛下降明制頒峻科千里一賢尙不爲少
僥倖冒進湏立隄防斷浮虛之飾詞收實用之良策

不取無稽之說必求忠告之言文則試以効官武則令其守禦始既察言觀行終亦循名責實自然僥倖濫吹之僥無所藏其妄庸故晏嬰云舉之以語考之以事寡其言而多其行拙於文而工於事此取人得賢之道也其有武藝絕倫文鋒挺秀有効伎之偏用無經國之大才爲軍鋒之爪牙作詞賦之標準自可試凌雲之策練穿札之工承上命而賦其泉稟中軍而令赴敵既有隨才之任必無負乘之憂臣謹案吳起臨戰左右進劍吳子曰夫提鼓揮桴臨難決疑此將事也一劍之任非將事也謹案諸葛亮臨戎不親

戒服頓劄兵於渭南宣王持勁卒不敢當此豈弓矢之用也謹案楊得意誦長卿之文武帝曰恨不得與此人同時及相如至終於文園令不以公卿之位處之者蓋非其所任故也謹案漢法所舉之主終身保任揚雄之坐田儀責其冒薦成子之居魏相酬於薦賢賞罰之令行則請謁之心絕退讓之義著則貪競之銷自然朝廷無爭祿之人選司有謙撝之士仍請寬立年限容其採訪簡汰堪用者試令職守以觀能否參驗行事以別是非不實免王丹之官得人加翟璜之賞自然見賢不隱食祿不專則荀彧進鍾繇郭

嘉劉隱薦李膺朱穆勢不云遠有稱職者受薦賢之賞濫舉者抵欺罔之罪自然舉得其才擢君子之道長矣

盧榮中宗時爲給事中神龍二年冬十月初有制皇太子在藩府日食封物每年便納東宮榮奏日伏以皇太子處繼明重離當主鬯之尊歲時服用自可百司供擬又據周官諸司應用財噐歲終則會唯王及太子不會此則儲蓄之費咸與王同今與列國諸侯齊衡入封豈所謂憲章在昔番法將來者也帝納其言而止

韋嗣立爲兵部尚書景龍中上疏曰刺史縣令理人之首近年已來不存簡擇京官有犯及聲望下者方遣牧州吏部選人暮年無手筆者方擬縣令此風久扇上下同知將此理人何以致化今歲非豐稔戶口流亡國用空虛租調減削陛下不以此留念將何以理國乎臣望下明制其論前事使有司改換簡擇天下刺史縣令皆取才能有稱望充自令已後應有遷除諸曹侍郎兩省兩臺及五品已上清資望官先於刺史內取刺史無人然後餘官中求其御史員外郎等諸清要六品已上官先於縣令中取制中明言如

是則人爭就刺史縣令矣得令天下大理萬姓欣然豈非太平樂事哉

盧備睿宗景雲中爲右補闕時有上言天下置都督府不便命羣公卿士議定備與太子右庶子李景伯等議曰牧伯之命非不古也洎漢襲秦罷侯置守方制萬里以綏兆人令出王庭威行郡國南海與利東海詳刑人以阜安其流多矣至漢武帝初置刺史秩六百石掌察墨綬以下其黃綬以上則不察焉所以全長吏之威行不擾之政也至漢成帝改置州牧秩二千石遂以秩高自守而功業不著於是罷州牧又

置刺史及東漢之時復置州牧王綱不振浸以陵夷則事之汗隆詳乎典策今天下諸州分隸都督專生殺之柄典刑賞之科若委非其人授受有失權柄旣重疵釁或生又非疆幹弱枝經邦執物者也其親置都督事恐不便今巡察御史秩卑任重御史之流也委以時巡姦宄自禁伏請慎考古道率錄舊章法乾元之簡易守前王之令典俾夫化洽昇平務依貞觀制度矣其後停焉

李揆肅宗時爲中書舍人時京師多盜賊有通衢殺人寘溝中者李輔國方恣橫上請選羽林騎士五百

人以備巡簡揆上疏曰昔西漢以南軍北相統攝故
周勃因南軍入北軍遂安劉氏皇朝置南北衙文武
區分以相伺察今以羽林代金吾警夜忽有非嘗之
變將何以制之遂罷羽林之請

李栖筠爲工部侍郎代宗廣德二年三月癸丑奏京
畿諸縣百渠下主公寺觀碾磴凡七十餘所有妨農
利並請毀廢計收田租二百萬言入帝甚善之爲權
臣不便寢之

沈既濟爲左拾遺史館脩撰德宗建中二年五月二
日勅宜令中書門下兩省分置待制官三十員仍於

見任前資及同正兼試九品已上官中簡擇文學理
道法度優深者具各聞奏度支據品秩量給俸錢并
置本收利供廚料所須手力什物廳宇等並計料處
分旣濟上疏論之曰伏以陛下今日之理患在官煩
不患員少患在不問不患無人且中書門下兩省官
自嘗侍諫議補闕拾遺總四十員及嘗參侍制之官
日有兩人皆備顧問亦不少矣中有二十一員尙闕
人未充他司缺職累倍其數陛下若謂見官非才不
足與議則當選求能者以代其人若欲廣務聰明畢
收淹滯則當擇其可者先補闕員則朝無曠官俸不

徒費且夫置錢息利是有司權宜非陛下經理之法
今官三十員皆給俸錢幹力及厨料什器建造廳宇
約計一月不減百萬以他司息利准之當以錢二千
萬爲之本方獲百萬之利若均本配人當復除二百
戶反覆計之所損滋甚當今關輔大病皆爲百司息
錢傷人破產積於府縣實思改革以正本源又臣嘗
計天下財耗斲之大者唯二事焉最多者兵資次多
者官俸其餘雜費十不當二事之一所以黎人重困
軸杼猶空方斯辨熙必藉裁減豈俾闕官復爲冗食
藉舊而置猶可省也若之何加焉疏奏從之

崔縱爲御史大夫貞元元年九月縱上言准今年正
月制宜令御史臺勘會內外官員商量併省停減仍
集百僚詳議聞奏者臣伏以兵戎未息仕進頗多在
官者又須褒賞比來每至選集不免據闕留人嘗歎
遺才仍招怨望况緣頻有恩詔甄錄功勞諸道敘優
人數甚廣見須處置不可稽留今若停減吏員實恐
未便於事非但承優者無官可授抑又敘進者無路
可容本冀使人讎成歛怨恐須仍舊以適時宜更待
事平然後議經度制日可

李紱貞元初爲吏部侍郎嘗建議享武成王不當視

文宣王用王者之禮

袁高爲給事中貞元二年帝以關輔祿山兵戈之後百姓貧乏田疇荒穢詔諸道進耕牛時諸道觀察使各選棟耕牛隨貢委京兆府勸課民戶勘責有地無牛百姓量其地着以牛均給之其田十畝已下人不在給限高上疏論之聖慈所憂切在貧下有田不滿五十畝者尤是貧人請量三兩家共給牛一頭以濟農事疏奏從之

陸贄爲翰林學士貞元四年贄奏曰學士私臣玄宗初令侍詔內庭止於贈和詩賦文章而已詔告所出本中書舍人之職軍興之際促迫應務權令學士代之今朝野又寧合歸職分其命將相制詔請付中書行遣物議是之

韋貫之憲宗初爲右補闕時杜佑爲相子從郁爲左補闕貫之崔羣奏論宰相子不合爲諫官尋降爲左拾遺又論遺補雖品不同皆是諫官父爲宰相子爲諫官若政有得失不可使子論父乃改爲秘書丞穆質爲給事中元和三年九月奏諸州府鹽鐵使巡院應決私鹽使囚請州縣同監決免有冤濫從之李璠爲給事中元和中以舊制隻日視事對羣臣遜

奏論曰事君之義有犯無隱陳誠啟矣不必擇辰今羣臣敷奏乃候隻日是畢歲臣下睹天顏獻可否者能幾何憲宗嘉之俄遷戶部侍郎

李渤穆宗時爲諫議大夫理匭使長慶四年奏應進狀人論事大者請分析聞奏次者請申中書門下小者請各牒諸司諸司若處理不當復來投匭者卽請其事錄聞奏如投匭人有欺狂責問得情狀請本罪之外更加一等又寶應元年六月勅如有告密人登時進狀分付金吾留身待進止今緣匭院無械繫之具忽慮兇暴之徒難以理制請勒安福門司領付金

吾仗留身然後牒送御史臺京兆府莫絕兇人喧競從之渤又以左右嘗侍職參規諷而循默無言論之曰若設官不責其事不如罷之以省經費苟未能罷則請責職業

王敦史敬宗時爲膳部員外郎寶曆元年上言中外官寮准制封贈多請廻授祖父母臣謹詳古禮及國朝故事追贈出於鴻恩非錄臣下之求不繫子孫之便開元新詔唯許宰相廻贈於祖蓋以宰相位高封贈崇極故許廻授於義無妨近日嘗僚率援此例夫推讓於祖在父則然改奪於朝爲子何忍伏望宣付

宰臣重與依法詳議從之

崔元略為戶部侍郎寶曆二年奏曰伏准職役令內
 外六品已下官及京司諸色職掌人合免課役伏以
 設官之際未關隄防給蠲之時不免踰濫至有因緣
 假冒多非本身臣自受此官已來無日而不見論請
 蠲牒必恐從茲不已天下無復有應役之人伏請自
 今以後應諸司見在官及准式合蠲免職掌人等並
 先於本司陳牒責保待本司牒到然與給符其前資
 官即請於都省陳狀准前勘責事若不實並准詐偽
 律論其孝子順孫義夫節婦及割股奉親比來州府
 懸免課役不錄所司覆請從今已後應有此色勅下
 後亦須先牒臣當司如不承戶部文符其課役不在
 免限制可

宇文鼎為左司員外郎寶曆二年奏戶部尚書判度
 支胡証准兩度勅賜爵司禦率府錄事參軍文約各
 一級今月五日勅下尚書省伏以胡潛等先丁母憂
 猶未終制豈得公然食邑苟竊恩榮下避三年之喪
 冒受五等之爵有傷教義實敗國風臣謬跡都曹職
 當綜覈致興物論不敢不舉勅宇文鼎所奏胡潛等
 爵宜令所司落下胡証職在殷繁事或錯誤特宜釋

放司封本郎官委都省書罰

文宗太和三年十月御史臺奏准勅差孟瑄巡察米價其江西湖南地稱沃壤所出嘗倍他州俾其通流實資巡察若便空行文牒或慮遠郡未委詔條今孟瑄既下淮南卽去洪潭不遠伏望便令兼去洪潭可之仍令便道至浙西存恤

四年祠部上言當司准赦書節文緇黃之衆蠶食生人規避王徭凋耗物力應諸州府度僧尼道士及創造寺觀累有禁令尙或因循自今已後非別勅處分妄有奏請者委憲司彈奏量加貶責於百姓中苟避

徭役冒爲僧道所在長吏重爲科禁者謹具起請條件如後准天寶八年十一月十八日勅諸州府僧尼籍帳等每十年一造永爲常式者其諸州府近日因循都不申報省司無憑收管造籍起今已後諸州府僧尼已得度者勒本州府具法名俗姓鄉貫戶頭所習經業及配住寺人數開項分析籍帳送本司以明真僞又將諸州府及京城應置方等受戒僧尼身死及還俗者其告牒勒本寺綱維當日封送祠部其餘諸州府勒本州申送以憑注毀又諸州府僧尼籍帳准元勅十年一造今五年一造又天下僧尼冒名及

非正度者緣經恩赦自太和三年十一月十八日勅
前無憑追勘自今已後伏請切加禁斷先度者具各
申省省司各給牒知爲憑入籍又正度僧尼竝勒於
省司請告牒其僧尼童子自今已後不得令私度如
有此色勒當寺綱維申報本管長吏其與剃頭師長
及專擅出家者當便科決勒還俗其綱維不申報十
日已上勒停解便令出寺其所在長吏不爲糾舉者
具各銜奏聽進旨又諸州府及兩京除舊寺破壞要
修理外竝不創建造寺仍請具每州縣管寺幾所每
寺管僧尼幾人竝請具寺額僧尼各申省如有創造

寺舍委本管長吏切加禁斷其僧尼有不依典教興
販經紀行船駕車擅離本寺於公衙論競及在俗家
夜結戒壇書符禁呪陰陽術數占相吉凶妄陳禍福
旣虧釋教與俗無殊自今已後切加禁斷如有此色
委所在長吏量情科決使勘還俗其天下州府村坊
佛堂普通私色蘭若義井尋竝請割屬當州府寺收
管又伏准元和元年二月十日勅京城及諸州府寺
觀銅鐘固有破損須更製造者請令州府申牒所司
奏聞勅下許以本鍾再鑄不得更別添銅者其諸州
府近日皆不守勅文擅有鼓鑄自今已後竝令申省

臣等伏以當司公事廢闕多年名額空存事皆去本因起請再舉舊規比類叅詳依格可之

九年三月都省奏湖州百姓韓巨川及庾威男道彰進狀稱庾威緣定戶左降及錄事叅軍縣令等黜責事勅付尚書省四品已上官集議議曰定罪者必原其情議事者宜究其本庾威均稅之法情實擾人顧其施爲必有工拙工者何也富戶業廣以資自庇產多稅薄歸於羸弱威能盡簡并包者加籍取均困窮者蠲減取濟稅旣頓異法亦稍嚴事歸平一人無冤訴此所以威之工也其拙何也五縣土廣人姦徵薄

書卽隱占居多簡田苗卽驚擾爲慮散亂村野胥徒千人雖成功於已事之時而受弊於作法之始豈無他術用以周知竟此紛紜斯所以威之拙也大凡爲郡止於四過一者私加公稅二者逃失黎甿三者虐害平人四者富潤私室庾威改張稅額賦不加徵聯綿歉灾人悉安業刑甚峻而下無屈祿不厚而賞無濫顧茲四者威無一焉而以擾人均稅投荒黜遠是使循嘗守故者得以稱功革弊去姦者坐以招譴誰能自苦納諸刑名觀沮之風於斯何在官職黜削本自庾威罪旣無名官吏所宜牽復臺司所勘定稅本

謂有害於人事既無私理當免復若因其案驗舉察
細微以法吏合寘科條在衆議須明本末郡人遠訴
益表事情幸遇聖明合從昭雪勅庾威定戶意在均
稅臺司推勘慮以擾人近者王璠授威循王傳其連
坐左遷錄事參軍杜膺及縣令等六人竝復本資官
令狐楚爲左僕射元和九年奏諸道新授方鎮節度
使等具弩抹帶器仗就尚書省兵部參辭伏以軍國
異容古今定制若不錄舊斯爲改嘗未聞省閣之門
忽入弓刀之器鄭注外蒙恩寵內蓄克狂首創奸謀
將興亂兆遂致王璠郭行餘之輩敢驅將吏直詣闕

庭震驚乘輿騷動京國血濺朝路屍僵禁街史冊未
書人神共憤既往不咎而其源尚開前件事宜伏乞
聖恩速令停罷如須參謝卽具公服從之

歸融爲戶部侍郎開成元年兼御史中丞湖南觀察
使盧周仁違勅進羨餘錢十萬貫融奏曰天下一家
何非君土中外財賦皆陛下府庫也周仁輒陳小利
妄設異端言南方火災恐成灰燼進於京國姑徇私
誠入財貨以希恩待朝廷而何淺臣恐天下倣效以
羨餘爲名因緣刻剝生人受弊周仁請行重責以例
藩方其所進錢請還湖南代貧下租稅詔周仁所進

於河陰院收貯以備水旱
 李中敏為右諫議大夫充匭使開成三年中敏奏臣
 據舊例所有投匭進狀及書策文章等皆先具副本
 呈匭使其有詭異難行不令進入臣尋簡文案不見
 本勅所錄但云貞元中奉宣恐是一時之專臣以為
 本置匭函每日從內將出日暮進入意者使充濫無
 告有司不為申理者或論時政或陳利宜通其必達
 之路所以廣聰明而慮幽枉若使有司先具裁其可
 否即非重密其事俾壅塞自申於九重之意也臣伏
 請自今已後所有人進狀及封章等臣但為封狀以
 進取舍可否斷自中旨庶使名實在茲明置匭之本
 意從之

韋昭度昭宗時為左僕射時大順元年十二月太康
 軍屯晉州李克用遣中使韓歸範還朝因上表訴冤
 言被賊臣張濬依倚朱全忠離間忠臣致削奪臣官
 爵朝廷欲令釋憾下羣臣議其可否昭度等議曰賞
 恭罰否前聖之令猷含垢匿瑕百王之垂訓是以雷
 解而義文象德網開而湯化歸仁用彼懷柔式存典
 範上自軒農之代下臻文武之朝罔不允洽寬弘以
 流霽澤况國家當德祖守成之日憲宗致理之時車

執一同桑麻萬里燭龍外野悉在梯航大鼠窮郊咸
歸正朔然猶王承宗擁兵鎮冀詔范希朝討之仍歲
無功卒赦宥而又朱滔以幽州之衆結田悅李納
王武俊之彊遣馬燧等征之不克旋又寬之以累聖
之典謀睿哲大朝之紀律文明非不欲勵彼風驅快
其電掃然且考春秋之義稽鄭楚之文或退而許平
服而便捨存於舊史載彼新書李克用代漢彊宗陰
山貴胄呼吸而風雲作氣指麾而草樹成形仰天指
心誓獻袂嘗之首伏歿歐血屢親都護之營所謂爲
多上人自匪窮來歸我及陛下聖考懿宗皇帝之朝

彭門失守親驅驍卒首建殊功而先帝卽位之初諸
宮大擾復提義旅克靜妖氛其後封豕長蛇薦食上
國繼以子朝之亂皆因重耳之盟保大朝之宗祧垂
中興於簡冊蓋聖主之御天下也有勲可書有績可
載宥過不忘於十代念功豈止於一時天高聽卑請
事斯語且四海之內瘡痍尤殷九貢之邦綱條未整
昨者遽起邠岐之衆尋已退還又徵燕薊之師倏聞
內變出於饑饉失職資非絕供致此投戈是乖借箸
蓋下計之未熟非聖謀之不臧儻宸斷重新天機間
出錄茲誠款散彼師徒虛其念舊之懷待以如初之

禮臣等所議實在於斯抑又聞往者漢將趙充國欲
因邊境衰弱出兵擊之是時魏相上書畫陳利害且
曰恃國家之大矜民物之衆欲見威於敵者謂之驕
兵兵驕者滅非但人事乃天道也又曰臣不知此兵
何名者也兵出無名事乃不成漢宣納之竟罷其伐
伏惟皇帝陛下鑒往古用師之難採列聖遷善之美
恩加區宇信及豚魚則臣等不勝懇願况今汴魏尤
難幽定方困縱遣之調發豈能集事慮行號令以名
寇讐將以勦人非惟辱國且黷憂斯舉勤王之衆推
致命之誠未能羸騎獨攻所望漢兵同力今茲數鎮
奔命不遑難致濟師恐又生事論其漸當暑熱非和
戎旃悉力頒浩遣還蕃部重繫陳五郡之卒益謹關
防王琪振兩河之雄更嚴旗鼓然後獎其上表哀以
自陳錄彼前勞責之後効徵神爵之往典還日逐之
故封論其已斥王恭不使更疑晉帝凡百臣子實切
乃誠其克用在身官爵竝請却還仍依前編屬藉從
之

冊府元龜卷第四百七十四 十月初四日校

臺省部

卷之四百七十四

冊府元龜卷第四百七十五

巡按福建監察御史臣李嗣京

訂正

分守建南道左布政使臣胡維霖

參閱

知長樂縣事 臣夏允彝

知建陽縣事 臣黃國琦

較釋

臺省部 一十九

奏議第六

後唐盧文紀為吏部侍郎天成元年十月丙戌奏一人御宇百職交修則四時無水旱之災萬國有樂康之詠頃屬中原多事三紀不寧廉平因此而茂聞賞

冊府元龜

臺省部

卷之四百七十五

罰繇茲而失序所以臬鸞竝起駘驥難分有援助者
至濫必容守孤貞者雖賢莫進遂使居官僂俛奉職
因循唯思避事以偷安罔効輔時而濟物伏惟皇帝
陛下削平九有收復八紘承乾典萬代之基出震應
千年之運櫛沐風雨手足胼胝勤勞大集於聖功華
夏畢歸於睿略雖遠柔邇伏咸知臨耀之鴻恩而肝
食宵衣尚念生靈之久困累頒絲綍典訪芻蕘恐天
災之流行因皇風之擁隔臣不揆庸短輒冒宸聰臣
請告論内外文武臣僚凡守一官責其舉職公請奉
上勤恪爲心每歲秋冬明定考較將相則希迴御筆

班行則悉委司存外則州牧縣寮具以真虛比較儻
聞共推異績便宜特示甄酬如其衆謂曠官固可明
行黜責所冀免懷竊位俱効竭誠上則輔佐於大君
下則精專於庶務高卑不濫功過無私官旣清廉則
民無愁歎勸課之方得所則生靈之賦樂輸故可以
進賢良退不肖安生聚寔倉箱使和氣遠敷德澤廣
被顧惟穹昊必降休祥永致太平竝期混一臣叨逢
明聖謬列班行旣奉德音合申所見疏下中書宰臣
奏曰盧文紀踐履清華昭彰問望行已每聞於端慤
操心動絕於阿私以爲將聳効官莫先較考欲明書

於殿最異顯示於勸懲况將相兩途尤爲重委慮無報國最要聞天欲迂宸毫親書嘗課誠有塵於聖德亦是責以佐君直道不欺忠規可尚至於所陳黜陟竝叶規繩以此責成庶求良吏事無疑礙理可施行從之

李光憲爲右散騎嘗侍天成元年十月乙巳明宗御中興殿光憲奏將垂帝範在守於舊章欲敘彛倫合循於故典實大朝之理本蓋有國之嘗規臣嘗覽列聖寶錄伏見建中元年正月五日勅旨應內外嘗參官上後三日舉一人自代者編諸簡冊異拔賢良是

資教化之方以盛簪裾之列爰于近歲稍易舊規臣請明下勅文許行建中故事所異振纓在位咸懷舉善之心棧樸興歌漸致得賢之美疏奏不報

張鑄爲起居舍人天成元年十月庚戌奏欽若天道聞諸堯舜之朝敬授人時乃自殷周之代能消災異而致福祥自兵興以來多失本朝故事不拘與法有誤修攘承前日月薄蝕百官皆合守司星象有差九重亦當避殿以明減損式示恭虔信守國經何虧聖德自此或乾象謫見凡關災異請依故實令百官守司陛下御便殿減嘗膳准令式遵行從之

蕭希甫爲佐諫議大夫知匭院天成元年十一月戊午奏臣叻蒙擢任官忝諫司所職重難兼知匭院但有關於至理卽欲合於無私冀竭丹誠仰禱玄造臣伏見自同光元年十月九日先朝收下汴州後至今年四月一日已前兵革盛興亂離斯極典章幾壞刑政莫施每於紛擾之間甚有殺傷之苦非惟州縣長吏或濫誅夷直至鄉里居民互爲殘戮挾私怨公者公行白刃將快忿心怙強力者豈闢丹書唯欣得志掠妻女以轉賣劫財貨以平分如此之流應遍天下伏惟皇帝陛下薦恢帝載光啟鴻圖伏思自陛下臨

御以來皇綱漸正有功者盡賞有罪者咸誅閭外將清朝中無事今則匪戚已再修整欲具進呈必恐擡出外邊施行已後遠近披訴受狀至多但慮京國諸司因禁便憂填委則至上虧皇化有玷國風其次更慮勲貴親賢或關對訟便煩讞議或礙刑書若今事有否臧卽便政移曲直以臣愚見欲自元年四月二十八日昧爽已前罪無輕重應大辟已下弗一切釋而不問庶得刑清俗泰國富民康咸欽不宰之功永奉維新之化勅旨喪亂之際不可以法行致理之初漸宜恭刑措蕭希甫官居諫省職本匭函慮黎民年

有讐嫌致法寺愈煩讞議特塞紛爭之路請申昧爽之朝言出忠誠事關理本載許論奏合議施行宜自天成元年四月二十八日已前罪無輕重一切不問其間已經勘窮推鞠者須見罪狀其餘卽依所奏裴皞爲禮部侍郎天成元年十一月戊辰奏方伯郡守之任與大朝分理疆土共養黎民委寄非輕古今所重親人之職莫過於斯伏請啟今後諸州刺史經三考方可替移使能理者盡展所能弊政者自彰其濫優劣旣判黜陟可行則州縣免迎新送故之勞朝廷得惠養除煩之理太平之道無易於斯勅旨有政聲者就加恩澤弊政者不限考課替移

劉岳爲吏部侍郎天成元年十一月甲戌奏凡在立朝悉是爲臣之貴每蒙進秩咸加報上之忠奉勅命以遷昇固當感抃降綸言而褒飾或未捧觀將使知寵陟之錄認訓誥之旨必在各頒官帶令親制詞處列班以增光傳子孫而永耀伏請自此凡有除轉登朝官已上名至閣門宣賜在外則付本州使賜之勅旨朝官素有品秩不可一例頒宣文班三品已上丞郎給舍諫議武班大將軍已上宜賜官誥舊例吏部出告身納朱膠紙軸錢方給朝臣或親舊者隨卽給

付而官貧不辨者但領勅牒而已喪亂之後因以爲嘗朝臣多不出告身制下之後中書但收其制詞編爲勅田本官多不見獎飾之詞故岳有是奏勅旨不編頒得事體也其後執政相與謀罷朱膠紙軸之例以爲天下吏員無多除拜亦簡官給膠軸之費歲不過數萬國既錫以爵位而邀其膠紙之直是巨細不相稱也因奏覆凡中外官除拜竝宣賜官誥然執政之議雖善蓋令其始不料其終何者同光世至天成初官爵之命止于除授中外正員官其餘試衡貼號則寵激軍中將較而已自長興已來除授日多上至

軍中卒伍下迨州使鎮戍購籍書吏之流皆有銀青官憲之號每歲給賜告身動盈數萬非續尺紙之費虛銷財力而又賞賜之道難以勸功以臣料終則知執政圖治之非善也作事謀始凡執政者慎圖之楊凝式爲給事中天成元年十二月庚寅奏舊制臺省在西京東都置留臺留省及分司官屬請依舊制於西京置留臺省如本朝東都之制不報

是月庚戌御史臺奏京城坊市士庶工商之家有婢僕自經投井非理物故者近年已來凡是死亡皆是臺司左右巡舉勘驗施行已久仍恐所差人吏及

以下双行夾注

街市猾卒同於民家因事邀頡取索臣詢訪故事當
司今有舊京往例凡京城臣庶之家死喪委府縣簡
舉軍家委軍巡商旅委戶部然諸司簡舉後具事錄
申臺其間或枉濫情故臺司訪聞卽行舉勘如是文
武兩班官吏之家卽是臺司簡舉臣自今已後欲准
故事以施行者兼左右巡使錄到喪葬車輿格例比
緣官品等差無官秩之家過爲僭侈供應者固當刑
責今則凡是葬儀動踰勅格但官中祇行簡察在人
情各盡孝思徇彼稱家之心許便送終之禮又難將
孝子盡決嚴刑遂以供人例行書罰以助本司支費
兼緣設此防禁比爲權豪之家違禮厚葬若貧民薄
斂不充無憂替禮書罰兩京卽是臺司州府元無條
例者勅旨今後兩班文武及諸司官吏諸道商旅凡
有喪亡卽准臺司所奏施行其坊市民庶軍士之家
凡有喪亡及婢僕非理物故依臺司奏委府縣軍巡
同簡舉仍不得縱其吏卒於物故之家妄有邀頡或
恐暑月屍柩難停若待申聞簡舉縱無邀頡亦須經
時日今後仰其家喚四隣簡察無他故遂使葬埋具
結罪文狀報官或後別聞枉濫妄有保證官中訪知
勘結不虛本戶隣保量事科罪如聞諸道州府坊市

死喪取分巡院簡舉頗致淹停人多流怨亦仰約京城事例處分所奏喪葬車輿格例今後據品秩之外如庶人喪葬宜令御史臺差御史一員點簡供賃行人如有違越據所犯科罪臺司不得書罰徵擾行人交非憲綱事體

曹琛天成中爲右拾遺上疏請百寮朔望入閣及五日内殿起居請許三署寺監輪次轉對奏事從之

李同爲左拾遺天成二年正月奏三尺之法天下共之法一動搖民無所措是知愛育黎庶信及豚魚旣禮樂之中興在刑罰之必中陛下初當治亂合肅化

修請處分天下州使繫囚逐旬咨長吏親自引慮使知罪真虛然後論之以法則獄無冤滯政治和平

李光緯爲右拾遺天成二年三月奏自本朝應運以來陛下登極之後有赤心事主勳力勤王或代著軍功身已淪沒者乞遣崇官爵延賞子孫庶張開國之榮永保承家之慶兼內外重臣已下班行間請許追封以孝道雖九泉之幽暗亦荷明時庶百辟之忠良同扶聖代

封翹爲給事中天成二年四月戊子上言日臣聞立愛惟親教民以睦實大朝之重事乃有國之通規是

知維城爲固本之資磐石作安宗之計所以興隆鴻業保定皇家伏惟陛下天祚丕基日新聖德使九功之咸敘致百度以維身墜典皆修遺文必舉獨於封建未覩宣行旣尙抑於龍樓宜且遵於麟趾乞命親賢以資夾輔

周知微爲吏部員外郎天成二年四月戊子上言竊覩近勅慮有貧吏割剝下人許百姓陳告民之愚下罔認宸衷或捃撫纖微或受人驅駕事多憑虛適足爲亂有過者罔合當辜誣罔者諸議刑憲庶或知止免瀆風化從之

李鏐爲戶部尙書天成二年六月乙未上言請朝班自四品已上官各許薦令錄兩人五品六品官許薦簿尉兩人使廉慎能名者同受爵賞貪婪害物者竝坐刑書各舉所知不弊賢路奉勅興國之方養民爲本衣不可一歲不製食不可一日不充其或桑柘少而望多耒耜閒而求食足雖千堯萬舜聖知神功不能致也然則樹疎禽少山廣獸多百川淺則海不深萬姓貧而國不富富庶之要根源可知故王者深居九重奄有四海不可家至而日見只在德盛而教尊千載一時古猶今也李鏐情專奉上務在任人藉

官吏當才爲國朝布化實以知人則哲惟帝其難肯
舉者可嘉堪舉者可重必須愛而知其惡憎而知其
善內舉不避親外舉不避讐凡事無私何憂不理李
鱗所奏宜與施行其所舉人仍於官告內顯據所舉
姓名赴任之後臨事可觀或有不公當累舉主兼三
品已上有舊諳行止堪充節度觀察兩使判官者亦
各據才業上聞卽當委任庶朝廷立制長施勸善之
恩臣下推公未絕蔽賢之路

符蒙爲右拾遺天成二年六月辛丑奏以五日轉對
無獻替之風虛瀆聖聽請罷之

梁文矩爲左諫議大夫天成二年七月上言以軍人
百姓服裝僭越爲費耗之本請下令禁止

鄭韜光爲給事中天成二年八月庚辰上言以諸縣
力及人戶多爲州使影占或臺省投名唯貧民客戶
在縣應役例有不均之歎且多僥倖之流請議禁止
孔邈爲吏部郎中天成二年八月庚辰上言曰臣聞
賞延於世實皇王體國之規立身揚名爲人子承家
之道苟推誠於忠孝必懷慶於子孫存歿其瞻君親
是望伏自陛下中興大業念舊錄勲賞賜無時渥恩
咸徧尙慮有奮身爲國跡殞覓孤姓名不達於乾坤

骨肉飢寒於道路不因詔書博訪所在不與申聞伏乞特下外藩如有身歿王事忠節顯彰軍伍備聞恩澤未及者必令具錄聞奏如有子孫便委所司齒錄使父母有可依之地妻孥免無告之心如祇有孤遺亦便令救卹卽已往者知皇恩不棄將來者罄臣節何疑楚師忘寒空憑念問周文葬骨唯示深仁異於有道之朝不漏無垠之澤上先是已行詔命及覽是奏促再行之

姚顛爲左散騎嘗侍天成二年九月上言伏以運當昭泰時屬豐成金鑿已議於省方綵仗將離於上國沿路供億固有舊規况聞詔旨丁寧不許分外科率所在藩侯郡守竭力推忠奉迎願備於貢輸徵歛或及於黎庶伏望更加示諭免至煩勞使四海九州遐邇共聞於聖德千乘萬騎經過不擾於疲民俾諸望幸之心以顯來蘇之義

王騫爲刑部郎中天成二年十月上言請准建中舊勅文武叅官及刺史上後三日舉人自代
十一月吏部侍郎劉岳上言日伏以有國命官立朝釐務必資詳諫以集事功竊見諸色詞科多昇通籍向者先爲列藩從事叅佐可稱次經三館職各編修

是著方居華秩始在彤庭近或雖有兩任前銜未歷一司公事莫申勞績虛謂滯淹未若委以親人俾之及物粗聞善最然議陟遷免自難於漂流復有名於選任伏乞特加搜採廣察單平白身者授以佐僚歷官處之縣令歲月俟當於制限班資擢在於朝行理契毓材事唯責實

盧成雍爲起居郎天成二年十二月上言以賊寇宵行逼脅村舍俾供食宿及當敗露指引行程追禁經時慮妨農作望頒明勅俾得疎治從之

王鏞爲左拾遺天成三年二月上言曰伏覩州縣百姓早因危歲小寇連綿舊染成非習性難改逃刑網外作患民間起晝藏夜出之謀懷念惡墮農之志惟觀得失但聽災危不慮嚴章當孤美化法緩則潛藏軍旅法急流散藩方條令難加網羅莫及是非同等曲直相參伏乞顯示軍門無招此輩永去未萌之咎當平不力之民從之

三月己巳給事中封翹上言曰天地之經陰陽之數莫不上規帝道旁體物情儻國人偶有其容嗟則時令必爲之差忒如陛下英明御宇勤儉臨朝推泣辜罪已之心行解網納隍之道無偏無黨憲章不濫於

雷霆克寬克仁霈澤嘗均於雨露致君已及於堯舜
勃興尋竝於禹湯則合災星退於三移瑞日呈於五
色焉有自冬徹臘啟歲經春陰雲多蔽於長空滯雨
頻霑於連日豈是未臻聖政不降靈休旣難喻於玄
穹頌更增於隆德伏乞稍留聖念明下所司俾郊壇
祠祭之儀簠簋馨香之料尤加清潔倍致敬恭罪非
刼殺旋令疎放亡歿卿士希加賻贈農桑藉力之時
務蠲夫役禽鳥營巢之際禁斷網羅恭祈十雨五風
以下千秋萬歲詔付所司詳酌施行

崔居儉爲尙書左丞天成三年五月請於西京置分

司官

六月戊子散騎嘗侍蕭希甫奏以府州官吏不務守
官咸思避事每覩徼小刑獄皆是聞天不唯有紊朝
綱實恐淹延刑獄奉勅昔虞舜以恤刑安萬國賴十
六相熙帝圖漢高以約法定八方致四百年享天祿
故法無嘗則官有倖刑不濫則民無冤千古同風百
王齊致况今朝廷致理中外同心近者無偏遠者不
間慮於聽訟或有惠姦其類具奏聞所在不勤決斷
則諸道侯伯未至盡心兩使賓僚亦非稱職蕭希甫
位兼三事務贊萬機更激藩方其禪庶政自此凡有

爭訟委隨處官吏據罪詳斷如事有不可裁斷者則結案聞奏

呂夢奇爲諫議大夫天成三年七月上言近制令州使判官逐旬引問獄囚恐屢變其情狀請便案成慮之奉勅宜依

趙熙爲起居郎天成三年八月戊寅上言曰伏自陛下乘乾之後續聖已來從諫如流求賢不倦遂令五日之內一度敷敷百辟之間咸陳管見伏覩武班朝士皆大國賢臣或繼委藩任或盡知民瘼或久請師旅深知兵機或將相子孫或貔貅烈士或銜命每推於專對或臨戎嘗立於殊功蘊器業而不敢自陳有籌畫而無絲上奏方今烝黎尙困兵革未銷儻一言仰合於天心一事有資於軍志可裨睿筭便致小康抱材能者無愧於朝廷懷義勇者何慙於休運伏望令兩班更互奏對

崔稅爲右補闕天成三年八月己亥上言曰昔漢宣帝繼紹皇圖勤恤民隱慎擇循良之吏分居牧守之權其有政合廉平惠敷疲瘵小則降璽書而勞問大則錫侯爵以甄酬欲教化之久行故遷移之不遽伏惟陛下糝糠大漢回復皇唐整百王隳紊之綱削四

紀傷夷之弊永言致治實在審官刺史縣令有能副
陛下之憂勤去生民之疾苦增本戶中勸課農桑休也且命撫
 綏不必循拘考限明加獎激就進階資如有課最漸
 高始終不易量其器業擢在朝廷自然有位之人咸
 思職分無為而治坐致時雍疏奏不報後為比部員
 外

閏八月癸卯朔散騎嘗侍蕭希甫上言曰神聞天地
 助順神理福謙既物性之得宜何靈心之致誤伏惟
 陛下自統臨四海勤恤萬方每崇恭儉之風嘗布仁
 慈之德即合陰陽無爽災沓不生百穀豐盈五兵息
 偃今乃川瀆決溢水旱潛違必恐是調燮有乖祭祀

未潔軫吾君宵旰之慮負陛下覆育之恩臣實痛心
 誰不抱愧伏乞特頒明詔下訪有司詢其錯遺之方
 採被妖祥之本庶是前皇古帝往哲先賢或有違祠
 但存舊址在祀典者咸加嚴飾稟靈通者盡略修崇
 悉遵虔肅之誠無墮精祈之懇然後別宜長吏側聽
 庶民稍關疾苦之錄須整撫循之策奠其昭感仰贊
 昇平

鄭號為膳部郎中天成三年九月乙亥奏諸司諸使
 職掌人吏乘暖坐帶銀魚席帽輕衣肥馬參雜庭臣
 尊卑無別汚染時風請下禁止帝嘉其事促行之中

書覆爲不可趙鳳亟言於執政曰此禮誠大不可不切爲權吏所庇竟寢其事

是月丁酉吏部員外郎周知微上言曰竊以唐有天下垂三百年聖帝明君覽宏綱而御蠢忠臣賢佐法古道以贊時兩漢已還歷代罕比雖國有中否之數人無厭德之言果致陛下紹開中興繼承大業將欲永光帝載而猶動守典刑伏見州縣官僚被人論訟始行追取未辨是非稱呼不去其官曹枷鎖已拘於道路所以上無耻格下絕恭敬有玷盛明實駭觀聽此後凡有官緒可稱所訟罪名未正伏請祇令監守皆在法司俟勘直銷分卽荷較無憚所貴坐法者知國章有節司刑者表守律無踰

孔昭序爲給事中天成三年九月丁酉上言曰伏見本朝儀制北省官爲近侍之班遂異嘗參之禮所以百寮則曰拜蓋云謝食北省官不赴廊飡食於本署故嘗朝不拜况今耆舊皆日覩躬行伏望陛下順考古道率繇舊章正立朝之嘗規遵先王之定制

盧詹爲中書舍人天成三年十月上言曰歌稱九德彰聖哲於一人國啟四門睦臣賓於萬宇伏惟陛下登臨宸極統御寰區普天之來享來王率土之爲臣

爲子所以西戎獻款北狄輸誠五谿之蠻獠皆臻百越之梯航畢至華夷率服聲教遐流竊見外國朝天諸藩到闕多於便殿引對中外不知旣聞來自殊鄉宜使觀於盛事此後每有四夷入貢伏乞御於正殿列彼羣臣立天仗於廣廷臨宸軒而端拱庶使邊荒異俗向慕華風亦具禮樂威儀更顯聲明文物

何澤爲吏部郎中天成四年二月上言昨問罪中山近鎮有飛輓力役之勞乞議蠲減

于嶠爲北部郎中知制誥天成四年四月丙午上章以兩班有老病者咸絕其俸慮玷聖明請各授致仕官仍加勳資以符尚齒之化

程遜爲主客郎中知制誥天成四年四月丙辰上言曰臣聞身體髮膚受之父母不敢毀傷所以樂正子春下堂傷足三月不出而有憂色民間多有割股上聞天聽者伏以堯代則共推虞舜孔門則首舉曾參皆以至孝奉親不聞割股肉療疾或真有懷怙恃之感報劬勞之恩孝起因心痛忘遺體實行此事自是人子之嘗情不合鼓扇聲名希霑卹資伏惟陛下道齊覆載孝治寰區漸致昇平全除矯妄乞願明勅徧下諸州更有此色之人不令舉奏所冀真誠者自彰

孝感詐僞者免惑鄉閭咸歸樸素之風永布雍熙之化

孔莊爲司門郎中天成四年五月上言曰臣聞漢宣帝云與朕共治天下者其唯良二千石乎今國家每擇郡牧唯賞軍功慮於治民未盡其旨爲人求瘼責在參佐則庶幾近理願留天聽俾慎揀焉

崔億爲左諫議大夫天成四年六月上言曰臣伏見雜都頃當制葺之初荒涼至甚纔通行逕徧是荆榛此際配人開耕便許爲主或農或圃逾三十年近歲居人漸多里巷頗隘湏增屋室宜正街坊都邑之制度旣成華夏之觀瞻益壯因循未改汚濁增深竊惟舊制宮苑之側不許停穢惡之物今以菜園相接宗廟祠宇公府民家穢氣薰蒸甚非蠲潔清議條制俾四方則之

郭正封爲考功員外郎天成四年八月癸卯奏中興平定之初自數十年雜亂編民或爲兵士所掠沒爲奴婢者旣無特勅釐革無復從良遂令骨肉流離有傷王化勅旨曉喻天下諸軍所掠生口有主識認並勒放歸

是月乙丑左補闕楊途奏明公舉事湏合前規竊見

京城之內尚有南州北州縱市井不可改移城池卽宜廢毀復見郡城舊墻多已摧塌不可使浩穰神京旁通綠野徘徊壁壘俯近皇居無復因循嘗宜修葺初光啟末張全義爲河南尹爲蔡賊所攻乃於南市一方之地築壘自固後延於市南又築嘉善坊爲南城天復修都之際元未毀徹途之所奏頗適事宜後爲金員外郎

任贊爲左散騎嘗侍天成四年十月奏於郊天前有犯重罪合當極法者竝令推鞠斷遣無容開啟侍門從之

十一月辛未左諫議大夫崔慄奏請止絕諸道州府不得進金玉鞍轡龍鳳御衣其奏曰凡在御前皆爲法物供奉所宜出自內司豈假外臣而有營造若無禁止漸謂通規一則乖國朝淳厚之風一則冒典憲防閑之制

是月壬辰刑部郎中周知微奏請藩方州郡皆令抄寫法書每遇詳刑須憑條格旣無失入自絕銜寃王鬱爲右庶子天成四年十二月辛酉奏伏自廣明辛丑之後天祐甲子已來官壞政荒因循未補此蓋諸司減喪人吏曹局亡失簿書至今官僚中有不知

所掌之事者伏准文明元年四月十四日勅律令格式爲政之本內外官員退食之暇各宜披覽仍以當司令式書於廳事之壁俯仰觀瞻使免遺忘虔尋茲制實繫化源請下內外文武百司如本司闕令式者許就三館抄六典內本司所掌各目各粉壁書寫從之

張延雍長興元年爲諫議大夫七月奏請百官各遵前勅及舉行令式中事

八月壬辰朔刑部郎中周知微奏近年關防商賈不憑司門公驗關禁之設國有舊章請諸司舉行之疏
奏不報

孔崇弼爲庫部郎中長興元年九月奏天下州縣長吏每到任造得公廨什物罷任之時多蓄已有不係案牘此後請公廨什物明立文案不許乾沒免致擾人

崔衍爲給事中長興元年十一月壬戌奏當省給納諸州銅魚勘問本行令吏狀稱內庫每州有銅魚八隻一隻大七隻小兩隻右五隻左其右銅魚一隻長留在內留一隻在本州庫逐季申報平安左魚五隻皆鐫次第字號每新除刺史到任後卽差人到當省

請領左魚當司覆奏內庫次第出給左魚一隻當省
責領分付到州集官吏取州庫右魚契合却差人送
左魚納省如別除刺史州司又請次第左魚周而復
始臣以州司差人請魚往來須有煩費請此後新除
刺史在京受命或經過都城者可令自牒當省請左
魚齎歸本郡契合然後差人納省所異稍免煩勞從
之

是月乙丑中書舍人封翹奏切見五日轉對於事太
繁所見或有短長不當空煩聖覽請此後祇於入閣
者依刑法侍制官例次對同日比部員外郎知制誥
崔稅奏臣歷觀往代下及近朝既立盤維必擇師友
或取其德行彰著或取其學術精通待以優崇俾之
規益斯亦前王之急務也伏見陛下頒宣典冊封立
親賢盛禮旣陳普天咸慶諒鴻基之永固豈麟趾以
能歌伏願陛下特詔有司遵行舊制慎求端士博訪
碩儒命以王官使同猶豫雖聰明天縱固不俟於切
磋而孝敬日躋亦良錄於輔導臣謬塵近侍無補盛
時輒以蕩蕘上塵旒宸疏奏不納

李崇遇爲尚舍奉御長興元年十一月辛未奏竊見
文武百官三品已上薨謝者皆有賻贈自四品已下

無例施行請特定事例以表無偏
王延爲左補闕長興元年十二月奏一縣之內所管鄉村而有割屬鎮務者轉爲煩擾益困生民請直屬縣司鎮唯司賊盜從之

呂朋龜爲度支員外郎長興二年二月庚戌奏以恩赦中許追贈追封已及周歲有未沾恩命者乞賜施行勅旨宜令所司報在朝文武官員及諸道州府當制內有未霑恩命者令供申文狀到者旋即施行不得停滯

楊途爲金部員外郎長興元年三月辛亥奏但是古墓荒墳不計有主無主陛下諸道州府嚴誠鄉閭不得開發從之

正月甲寅尙書戶部奏當司所管天下合貢方物法長興二年三月定到七十餘州舊例冬至齊到正仗前點簡至元日於殿前排列當司引進昨點簡今年正仗前七十州所貢方物內六十七州正仗前至其餘二十州自正月至三月方到京師其江陵府所貢胎白魚臣勘本道進奏官狀稱每年臘月裏造至正仗未堪供進固難及限猶慮其餘州未曾嚴加告諭不可便議刑名請行勅命約束如來年正仗前貢物

不齊其本州錄事參軍及勾押官典量定殿罰又棣州合進蘿摩子本州稱無本色折進價錢絹一匹伏以任土作貢必須產在封疆本色不供價錢何取兼恐顧茲名目廣有科求其價絹請停勅旨江陵府胎白魚許於限外供進餘依所奏

閏五月起居郎曹琛奏兩班或請假歸寧或染疾未捐纔注班簿便住料錢勅旨有禮於君克勤於國爲臣所重自古皆然其或合朝不朝卽虧匪懈無病稱病亦屬自欺儻異下冰須資勿藥臥疾非人情所欲歸寧光孝治之朝曹琛所奏文武官請歸寧准式假及實卧病者並許支給本官料錢宜依或有託病不赴朝叅故涉曠怠者慢於事君何以食祿如聞糾奏當貴尤違

康澄爲大理少卿長興二年六月辛未奏曰陛下御極以來大稔于此時無水旱歲有豐登所以民去農桑士思遊惰或機巧以趨利或宴樂以棄時且一夫不耕或受其飢一婦不織或受其寒者而况鄉間之內城郭之中競削錐刀罔知本末或鼓舞於村落或謳歌於市廛寔繁有徒觸類而長若非禁止漸恐滋彰勅旨皇王之業寰海爲家民不擾而自安事不紊

而易治皆修遠大以固雍熙朕自纂丕圖每勤庶政
民有耕耘之樂時無饑饉之災然猶菲食如初宵衣
若舊內則仗前後左右外則委侯伯子男共削煩苛
同除蠹弊康澄所奏機巧之事游惰之徒所在不無
未能全斷令仰諸道長吏詳此曉示村巡游惰者勸
以歸農機巧者戒其越樣此外或更有不利於民事
竝可嚴行止絕將使俗無奇伎野絕閒游爲下有勤
力之資在上無蕩心之事屬肆人和之際何禁謳謠
村間農隙之時無妨歡樂卽須辨認姦惡不得分外
搔擾人戶所切者嘗輕徭薄賦不急斂暴徵民不勸
而自勤財不營而自富况諸侯勦力列較盡忠皆是
腹心總如魚水將期混一永致和平

是月戊寅左散騎嘗侍鄭韜光奏臣聞春秋傳曰將
賞爲之加膳將刑爲之徹樂此明君之愛人也伏乞
下大理刑部兩司凡經定罪之時結正之際徧覽格
律稽驗盡舉勅文討尋俾獲罪者甘心受罰者無怨
人知法有畫一之義律無再易之門

盧損爲左諫議大夫長興二年十二月上封事三件
先罪犯譴逐歿於遐方者請淮南郊赦文竝許歸葬
仍還舊秩處分鳳翔山南已來長吏有兩川界內人

戶任還鄉里願住者卽加安撫前任節度使刺史勝
禦等使請五日隨例起居竝從之

張昭遠爲都官員外郎知制誥長興三年正月上疏
曰臣聞諫官進言御史持法實人君之耳目正邦國
之紀綱自本朝已來尤重其任今之選授莫匪端良
然則彈奏之間尙未伸於才用使諫諍之道或未罄
於箴規俾七人徒歷於清華三院但循於資級考其
志業孰測短長臣請依本朝故實許御史以法冠彈
事諫官逐月給諫紙政事有所不便竝許陳聞所冀
履班行者不負於君親有才業者自分於涇渭庶幾
舉職免有曠官從之

曹允昇爲太嘗丞長興三年七月奏使府郡牧例以
隨身僕使爲中門代判通呈等名目極多皆恃勢誅
求不勝其弊伏請特行止絕如藩侯郡守不解書札
請委本判官代押其職務監臨請蓋本處衙院官吏
庶得漸除踰濫兼使州奏薦判官多非才行或以賄
賂求進今後奏薦請令本人隨表至京令所司比驗
盧華爲刑部員外郎長興四年奏臣竊以欽恤者聖
人之大德畏慎者臣下之小心倘不怠於交修庶自
叶於理道伏遇陛下靜符玄化動修至仁八紘無幽

枉之人四海有昇平之望但以人非誘勸事罕專精
將欲仰副憂勤實願再明條制伏見本朝故事凡內
外官司有能辨雪冤獄活得人命者特書殊考非時
命官多難已來此道漸廢既隳賞典難得公心伏乞
明降勅文顯示中外自此不繫正攝官吏能辨雪冤
獄全活人命斷割纔訖旋具奏聞考較不虛特與超
轉如或滯留不具申奏及虛妄輒希恩澤其所任司
長本判官竝請重加殿罰

冊府元龜卷第四百七十五

十二月初四日校

冊府元龜

巡按福建監察御史臣李嗣京 訂正

分守建南道左布政使臣胡維霖 參閱

知建陽縣事 臣黃國琦較釋

臺省部 二十

奏議第七

後唐李元龜末帝時為刑部郎中清泰元年上言以
聞開成格凡貶降官本處春秋以存亡報省如沒於
貶所有骨肉許歸葬如無骨肉本處便與埋葬乃下
詔曰李元龜官處法司次當候對以稍憊於時雪請

特降於優恩初則以貶謫官亡歿外州乞容歸葬次則以亡歿者兒孫絕嗣請本處瘞埋宜依所陳頒告諸道

周元樞爲侍御史清泰元年陳十事其行者四詔曰請再示賞罰提舉縣令事百里象雷之地一同製錦之人期在養民豈宜失職諸州觀察使刺史嚴切提撕請牢籠俊乂搜訪賢良况選部貢闈每年慎擇尙慮貞廉之士愧趨躁競之門諸道廉使更宜搜訪請斷無名率配委三司使省奏舉行請止急徵暴賦况秋夏徵科自有常限宜令官吏不得踰違

清泰二年御史中丞盧損上言五事其一臣觀陛下勤儉爲本宵旰是專日新之德繼聲時病之憂漸息事纔達聽言乃必行若有隱於聖明必貽咎於陰責器小而成難測海日下而但合傾心今欲曉諭中外臣寮載星登車端門待漏寅初開鑰日出排班中興殿庶事未通乞光降宣不坐冀視朝之制合古事君之禮得中匪懈之誠咸專未明之求外顯其二曰臣聞食其時則百骸皆理失其言而駟馬難追利便可行疎闊莫返况開闔之制出入須常且貴賤而不分恃強壯而爭進此後逐日早辰軍人百姓馬群放牧

令兩掖門出廣列尊卑其三云帝居皇宅法象大微取則皆自於上玄隳度無違於古道標正影端之語萬世不踰從權就便之規一時難守臣見九衢巷陌已是漸微兆庶街坊未止侵占陛下仁恕在念約絕難行且乞五鳳樓南定鼎門北禁止搭棚籬圍籠樹舍簷取土填街引渠穢路請指揮金吾軍巡止絕其四橋號天津名實帝道人臣履歷尙令兢趨牛車往來公然縱恣請止絕天津橋中道兩頭下關駕出卽開兩傍之路士庶往來其車牛並浮橋路來往其五朝廷所重名器爲先叙禮樂道尊卑明貴賤伏見禁

門之內人馬出入極多臣請凡官員除將被袋馬外其餘騎從並令於光政門外下馬詔曰聽政不坐禮儀而合使先知牧馬趨朝道路而宜令有異况民家占侵於御路固合條流牛車來往於天津宜須禁止盧損益深奉職言切爲時詳五件之封章俾四方之觀政除光政門外下馬一件續有處分餘並從之是年又上言准天成二年二月勅每年進士合有聞喜宴春關宴并有司所出春關牒用綾紙並官給臣等以舉人旣成名第晏席所費屬私况國用未克枉有勞費請依舊制不賜又准天成元年七月及四年十

二月勅應中外官除授不繫品秩一例宣賜告身請
依舊制合賜外各令自出綾紙又准天成元年七月
勅加每月十五日入閣罷五日起居臣等以中甸排
伏有勞聖躬請只以月首入閣五日起居如舊又天
成元年八月勅除旨授令錄皆令內殿辭謝臣等以
令錄卑微不可內廷展謝請依舊制正衙辭謝又天
成三年五月長興二年七月勅許節度使帶使相歲
薦五人餘薦三人防禦團練使二人臣惟州縣員闕
甚少若容薦舉則每年銓選可以注擬請特行釐革
又長興二年八月勅州縣簿尉判司差克軍巡

上

仍同一任自邇已來頗傷物論以爲不當請行止絕
依舊令衙前選任詔曰令錄之任摠六曹之糾轄繫
百里之慘舒惠養吾民可以親承碩問內殿辭謝可
如舊制藩侯郡守薦人或諳公事或有裨益不可全
阻許依天成勅帶使相藩臣歲薦三人餘二人直屬京州郡
防禦團練一人諸色官告舉人春闕冬集綾紙聞喜
闕晏所賜錢並仍舊官給餘並從之
劉鼎爲吏部員外郎清泰二年上疏臣見建中元年
正月勅中外文武臣寮授官上後三日舉人自代事
下中書如除官用人選所薦多者擬議多事已來此

道久廢今後乞復施行詔曰設官分職爲時王之敷
恩推賢讓能乃朝臣之盛事是以詩稱伐木史載彈
冠俾拔茅連茹之時見力行修身之道劉鼎官居雉
省立近龍墀因貢讜言請行故事欲使子皮舉善終
明子產之賢鮑叔讓能不掩夷吾之略兼可以致同
心叶力表後已先人克揚文子之風免有展禽之嘆
舉實公當便可施行情涉阿私理當比驗

許遜爲右拾遺清泰二年上疏曰臣見上封事者多
不關時政得失或以事不合已或以位未及人但欲
虛鼓聲名妄邀抽擢全非切當空事游詞數件之中

一無可取不惟熒惑聖聽兼屬侮慢朝綱今後請除
兩省官合上封事者其別班除論本司公事外請准
太和二年勅輪轉待制給事合司封奏大凡食祿之
道本在致君不可獨善一身歸惡萬乘惜暫時之逆
耳貽他日之痛心事切三思理實不可其切要言者
或君上情耽酒色志好畋遊言動稍乖理須論諍職
司其事合在諫官况陛下嗣位已來憂勤庶政鮮有
過悞無可陳論朝廷班外之宜職在御史臺如有愆
違御史彈糾其餘鞫獄自有法司事若有違他自論
奏此外越局言事竝望寢停詔曰上書言事諫署舊

規各有所司豈宜越局若思出於位理或侵官言匪盡忠徒欲沽於審直詞多率意實有望於指陳許遜所上封章請依近敕各司其事允叶舊章

李慎儀爲考功員外郎清泰二年上言今春已來稍愆雨澤陛下念稼穡之重深宵旰之憂倍軫聖心遍走群望盈尺則告瑞於元朔如膏則潤浹於暮春可卜豐穰動諸響應請天下凡祠宇有益於人者下本處常令修飾冀集洪休從之

子邁爲刑部郎中清泰二年上言臣忝掌刑名合論法律臣見比年已來有前州縣官或假侵官不量事體皆投匭乞官况大朝取士之門有舉有選苟有長才茂器舉選安敢滯留國家置匭之意本爲訴寃士人乞官安得造次又間里淺識濫繇官路妄有求請不顧格律條章所司以陛下方開言路不敢是非典法是國家大經誰可析言輕議此後凡投匭上言乞官亂法者望下所繇法司勘驗可否從之

張守吉爲吏部員外郎清泰三年上封事伏覩兩道興兵所宜備慮臣恐京師天下州府所禁囚徒獄戶不完寃徒多狡或踰垣破械結黨連群或聚綠林或奔逆壘以此爲患事狀非輕臣望所禁重囚除惡逆

光火殺人外可恕者量減本罪一等斷遣兼州縣近山澤人煙濶遠處量令州縣置舖警巡以防聚集詔曰所奏除惡逾外降罪一等下大理寺詳簡疾速施行

晉梁文矩爲吏部尚書天福二年七月奏臣伏奉勅牒令參詳文武百官所進封事內宗正卿石光贊上章云伏見滎陽縣道左萬石君廟本前漢大中大夫石奮之廟德行意績備列前書乞降封崇俾光宗祖者切以萬石君播盛德於漢朝立嚴祠於鄭圃爰開聖緒永叶昌期石光贊所上公言備章職分深爲允

當堃賜施行勅漢大中大夫石奮德盛軒裳道光簡素享萬石休明之祿成一門忠孝之名彰茂實於前修契隆興於景運宗正卿石光贊特上章疏欲示封崇異表深源式昭豐祚宜贈太傅八月又奏臣看詳左捨遺任瑤所進封事切見唐莊宗朝宰臣竇盧昇韋詵洎歷數朝累行宥典俱遂昭雪頗是分明然則令河令豆盧昇南頓令韋濤因父配流遂停官爵况曾居郎署又在朝行或以被茜袍或以紆紫綬前後十遷歲曆八奉赦書至於嘗赦不原亦得乘時被寵况竇盧昇等唐少帝之時刑部已得雪牒便可却復

舊官旋屬僞廷却除宰子旣塵墨綬須服荷衣敢望
明朝特加殊澤切以任璠所進封章請復竇盧昇等
官序服色望中書商議勅竇盧昇等已經洗滌又復
官嘗俟著政能當行甄獎

曹國珍爲吏部郎中天福三年十月隰州蒲縣令竇
溫顏進策內一曰兵不可不戰將不可不擇每於月
旦宜令教習楚莊立功而心懼晉文戰勝而色憂居
安慮危古之道也此乃鴻圖永固霸業彌芳詳定官
等以其徵引方拙未可奏聞國珍與其議以爲可行
乃上言曰臣聞去華務實拾短從長片善不遺群材

畢錄切詢古道寃是良圖將隆講武之規宜舉訓戎
之典故左氏春秋傳云禁暴戢兵保大定功安民和
衆豐財此所以昭宣七德制服萬邦又云春蒐夏苗
秋獮冬狩皆於農隙以講武事此所謂聿脩戰法俾
耀軍威又云三時務農一時講武不教民戰是謂棄
之所請每月旦教習事伏乞宣駙馬步軍都指揮使
簡練馴閱甚爲允當望賜施行勅習戰講武歷代通
規選士練兵其來舊制宜以每年農隙時講武仍准
令式處分

張恕爲刑部郎中天福二年十月奏伏以革故從新

方恢於聖運赦過宥罪繼洽於君恩故澤布九天無所不及慶流萬國無所不周伏惟皇帝義布幽明化均動植改秦隋之覆轍繼周漢之昌圖上簡帝心蕩蕩方臻於壽域下符民欲熙熙將返於淳風彌寬含垢之情遐廣推恩之道臣伏見去年閏十一月二十九日赦書節文應為廷貶降官未量移者與復資責授官亦與復資應徒流收管人並放還者又覩今年八月二十五日德音節文應自創業已來降黜者並與放還枯鱗再泳朽木重芳是知弘貸之朝大舉哀矜之與所有偽廷貶降官等雖經量移盡思歸復每望雲天之澤嘗懸省責之心特冀聖慈更加念恤未敢希復序資品且乞令放還鄉閭所冀表明代之好生遂小人之懷土臣叨司刑典獲奉赦條願迴解網之仁用廣垂衣之化從之

殷鵬為起居郎天福二年十二月上言切聞司封格式內外文武臣寮纔昇朝籍者無父母便與追封追贈父母在卽未叙未封以臣所見誠為不可此則輕生者而重死者棄今人而錄古人其榮有何其理安在又云父母在品秩及格者卽與封其母不言其父便加邑號兼曰大君遂令妻則旁若無夫子則上若

無父豈有父則賤而母則貴夫則卑而妻則尊若謂其父未合加恩安得其母受賜若謂以子便合從貴曷得其父不先伏以父尊母卑天地之道尊無二上國家同體今母受封父無爵名教不順莫大於茲臣伏乞自今後文武臣察父母在其父已有官爵者卽叙進資品以及格式或不任祿仕卽可授以致仕或同正官所貴得以叙封妻室卽父母俱榮孝子無不待之感閨門交映聖君覃慶賞之恩噫荷陛下孝治之風受陛下榮親之祿者靜而屈指不過數人陛下得以特議舉行編爲令式勸天下之爲善令域中之望風自然見前代之闕文成我朝之盛典况唐明宗朝長興元年德音內一節應在朝中外臣察父母在竝與加恩司封不行明制堅執前文儻布新恩兼合舊勅庶使事君事父嘗遵一體之規爲子爲臣不失兩全之義臣又聞司封令式內外臣察官階及五品已上者卽封妻廕子固不分於清濁但祇言其品秩且諫議大夫給事中中書舍人竝是五品贊善大夫洗馬中允奉御等亦是五品若論朝廷之委任宰相之擬掄出入之階資中外之瞻望則天壤相懸矣及其叙封乃爲一貫相沿至此其理甚非而况北省爲

陛下待從之臣南宮掌陛下彌綸之務憲臺執陛下紀綱之司首冠群寮總爲三署當職尤重責望非輕此則清列十年不遂顯榮之願彼則雜班兩任便承封廕之恩事不均平理宜改革伏乞自今後應諸司官及五品已上者卽依舊制施行應三署清望官及六品已上便與封廕清濁旣異秩品宜異仍下所司議爲嘗式勅人子之道祿貴在於及親王者之恩事必從于尊本應内外文武臣寮父母在如子品秩及格與加恩在朝行者父與致仕官母與叙封郡邑號其外四品已上節度團練防禦使刺史父與致仕官其餘與同正官母與叙封郡邑號如内外官父已有致仕及同正官母已曾叙封子品高者更與加進半俸續議指揮如父有職官不在此限餘並准格文處分仍編令式永嘗規

邊光範爲太府少卿天福三年三月上書曰臣聞太宗有言曰朕居深宮之中視聽不能及遠所委者惟都督刺史則知此官實繫治亂本須得人臣竊見今之刺史或因緣世祿或貢奉家財或徵立軍功或但詢官序實恐撫民寡術仰貪吏以無方以此牧民而望民安未可得也特乞除此舊說委其能吏將祛民

病永召時和疏留中不出

李祥爲中書舍人天福三年三月上疏曰臣聞除舊布新故順天而設教惟名與器不假人以樹恩所以示寓縣之至公所以仰朝廷之大柄今則旣逢英主未革前蹤是敢聊舉一端輕塵四達酌其損益幸補涓埃伏覩南北兩班內庭諸局或有不文不武非舊非勲論伎術則罔有所長語才行則罕聞其異但思月限以冒官嘗俾五細以在庭使四方而何則有虛華級仍陰私門忝榮更及於子孫祿利徒銷於府庫况今乃與戎事久困生民因無用之官寮具員無關計有限之財力帑藏正虛若不去留空成耗蠹伏望畧加澄汰稍辨幽明則支分或減於殷憂內外庶成於通濟又覩十年已來肆赦頻降諸道職掌一例獎酬藩方不守於規程奏薦罔論其高下僕隸則動逾數百絲綸則皆示特恩所以倉場管鑰之微人曹局簡札之小吏至於伶倫賤類灑掃庸奴初命便假於貴階銀章青綬拜賜遽披於法服牙笏紫袍乃致貴賤不分寵榮濫被雖雷雨作解渥澤恐遺於萬物而衣裳在筓貞規何法於百王此後或有溥恩應諸道職員除主兵將較外其衙前職列伏乞明示條章俾

循事體節度州只許奏都押衙都虞候教練使客將
孔目官及有朱記大將十人仍取上名支郡則只許
薦都押衙都虞候孔目官其諸色人並委本道量轉
職次則得之者感恩有異受之者與衆稍殊寰區仰
天子之尊藩后知王澤之貴名器之重治亂是資伏
惟皇帝陛下俯廻宸覽略炤愚衷勿爲小善不行勿
謂舊弊難改失之在漸謀之在初儻或因此留神自
可觸類而長宰臣奏李詳才光鳳閣志奉龍圖聰明
有作誥之方名器無假人之理以茲留意爰具上章
乃是大綱且非小善旣叶聖人之教可嘉君子之言
所奏節度刺史州衙前職員等事望賜施行從之

劉皞爲駕部員外郎知雜事天福三年三月上言曰
藩侯郡牧仗鉞分符繫千里之慘舒行一方之威福
自古選任須擢賢明近代統臨爲酬勲績將邦域之
生聚展將領之人情識分者附正營私黷貨者嚴刑
廣取諸頭剝削多贍爪牙自黃巢已來僞梁之後公
署例皆隳壞編戶悉是凋殘或不近邊陲不屯師旅
無城郭郡邑非控扼藩垣試任廉能且權嘗理逐年
屬州錢物每季申省區分支解有餘罄竭供進府庫
漸足黎庶稍蘇縱有過愆亦施懲責言雖鄙近望賜

施行疏留中不出

趙仁奇爲司天少監天福三年五月上言曰臣聞自古創業之君開基之主設官分職革故鼎新必有強名用爲公器以誘英彥皆不徒然伏見近年酬賞在京諸指揮使皆遙授刺史得非朝廷以貴其地望優其祿利乎臣以爲大輅起推輪之始濫觴成方舟之流但恐滋深不可改易非創業制命之所宜也今六軍諸衛品秩皆高不用酬勲是成虛設遂使掌禁軍者鄙昇朝之貴貪外任者無戀闕之心稍涉官邪徒費國用其六軍諸衛官員伏望委宰臣約前唐故事依文班品第加以料錢自此後非有軍功不可輕授名器無假中外迭居豈唯正於等威抑亦省於經費時下中書行之宰臣奏云朝廷所設還衛此掌禁軍久屬從權驟難改制望令將來商議施行

趙遠少帝時爲刑部侍郎開運二年奏臣伏覩長興四年五月二十三日勅州縣官在任日有覆推刑獄公事雪得冤獄活人性命者准長興元年二月二十一日南郊赦書節文便許非時參選特與超資注官仍賜章服者宜令諸道州府凡有雪活冤獄州縣官等依元勅點簡給付公憑本官自齋赴刑部投狀委

勅便仰給付優牒此蓋道弘激勸務絕罔欺在酬獎以甚優期刑殺而無濫臣詳元勅只言州縣官員所許加恩未該內外職掌臣又詳前後請給優牒人等文案若繫雪寃屈本道尋合奏開例過五年十月本人方來論請須却尋追文案勞擾公方於事難明於理未當伏惟皇帝陛下體堯仁而御寓敷舜德以臨民大闡化條克修刑政旁詢闕典用整弘綱功必賞而罪必誅善者進而能者勸起今後但能雪活寃獄不限在朝職司亦乞量加旌賞應闕諸道州縣官員

雪活寃獄不虛委逐處長吏抄略諸實案節先具奏聞所付本人憑由官滿到京便於刑部投狀不得隔越年歲方可論訴功勞庶內外以皆同使期程而有守廣亭毒好生之道盡高低察獄之明者勅旨理寃申屈勞績可加內職外官課最無異苟能雪活何吝甄酬宜先錄公文直具奏聞或官滿到闕投狀無到隔年度絕濫訛用分真偽宜依仍付所司

漢盧權爲右拾遺天福十二年轉對奏曰臣聞詩云哀哀父母生我劬勞又仲繇云樹欲靜而風不止子欲孝而親不待皆以昊天所覆永報爲難今陛下信

及昆蟲孝理天下漏泉之澤儻尚拘於嘗制過隙之
限誠何慰於孝思今請應在朝内外文武臣寮亡父
亡母並請特與追贈追封既存沒以知榮則寰區而
荷德勅曰盧擢忠勤奉職讜直言貢以封章舉其
隆典詳觀弘益尤切歎嘉宜下所司並令舉奏

乾祐元年詔尚書省集議内外臣寮父在母承子蔭
叙封追封合加大字否以聞尚書省奏議曰今詳前
後勅條凡母皆太字存歿並同此卽是父歿母存卽
叙封追封内加大字母歿追封亦加大字故云存歿
並同若是父在據勅格無載爲母加大字處若以妻

近勅因子貴與父命官父自有官則妻從夫品可以
封妻父在不合以其子加母太字若雖有因子之官
其品尚卑未得蔭妻亦不合用子蔭之限從之
麻麟乾祐元年爲水部郎中上言臣聞漢朝除吏苟
稱其職不數遷移自先朝開國已來牧守多酬勲舊
以寵勞臣竊見晉朝除刺史或數月驟替或一歲卽
移不惟送故迎新轉成煩擾其次廉能者未暇施政
貪濁者轉急誅求以臣愚管望朝廷立定年限觀其
考課以議轉遷

呂咸休爲給事中乾祐元年上言臣見前朝閩浙入

貢物色下船之後官差脚乘搬送到京臣悉諳知害民尤甚比來貢奉自是勤王差擾貧民貢之何益以臣管見凡此數處貢物竝令自出脚乘不困貧民於理無爽

王易乾祐二年爲尚書左丞上言尚書省名曰中臺素稱會府列曹令式廢墜多年兩轄紀綱隳紊積歲或因貢一時之淺見破千載之通規遂俾靡宇類乎衡門官位等乎虛噐若以從權改易應變弛張又未見國富時康家給民足禮記日以舊防爲無所用而壞之者必有水敗以舊禮爲無所用而去之者必有

亂患伏惟陛下守文繼統宰輔戮力致君立太平之基創無窮之業其尚書省二十四司公事望准令式積漸施行所有唐末艱難已來權立名目請皆停罷卽守官有視事之方爲吏無虛名之役

于德辰爲兵部侍郎乾祐二年上封九事其一文武兩班有年深不遷官不改服色者或遭喪闋而不追者今遇聖朝幸均渥澤其二每年貢舉人數極多登科者少伏恐淹滯賢能乞量增所放人數其三潭郎茶貨只至襄州客旅竝不北來請三司差清強官於襄州自立茶務收稅買茶足以贍國其四湖南見食

嶺南鹽請置官綱於湖南立務權賣其五文武兩班
差使出入所令部轄幹濟者聊加酬獎其六河朔緣
邊豪俠丁壯能抗拒契丹鬪戰者官中訪聞擢用其
七臣伏見官禁牛皮條流太重每請甲科合要皮請
量於地畝上配納若民間牛死損亦從許貨賣其皮
價不得過錢五百其八昨山陵宜仗一行道路人戶
配米者未納已納並請放免其九西道行營立功將
卒早宜賞勞不報

梁文贊爲戶部員外郎乾祐二年上言臣竊見諸道
州府力及人戶廣置田園不勤耕稼唯爲興利以事
末遊臣慮因循以成漸染請量爲條教以塞源流臣
請在處官吏搜求此色戶民令出代耕錢納官以督
農務

劉濤爲中書舍人乾祐二年上言方鎮之內土俗不
同山澤川原租賦各異任土作貢蓋便黎民臣恐天
下稅賦上供土產各異恐於調度或未便安請勅諸
道州府於所部之內貢賦供輸有未便特許上書論
列以協物宜

邊歸謹初仕晉爲給事中開運三年奏臣近以宣達
絲綸經過州縣切見使臣於券料外別要供侍以奈

紀綱亂索人驢自遁行李挾命爲勢凌下作威或副
應稍遲卽便恣行打棒旣遭屈辱寧免怨嗟天聽未
聞無處披訴伏乞潛令察訪兼便明降指揮官吏祇
供亦須精細使臣取索嚴示戒懲庶息煩苛漸期開
泰者勅遣歸讜近曾銜命經歷郵亭見使臣踰違以
公言上疏事爲允當理叶規程其諸道州府館驛宜
體所奏施行仍付所司又至隱帝時爲刑部侍郎乾
祐三年上言臣伏見諸處有人拋無名文書及言風
聞訪聞之事不委根苗接便追擾旣非責實多是構
虛窮理本之有傷瀆化源之無益遂使貪吏狡吏蓄
私憾以讐人讒夫佞夫扇狂言而害物請明行條制
庶絕罔誣其受納獄訟直須顯有披論具陳名姓卽
據理詳按無縱舞文其無名文書及風聞訪聞竝望
止絕不得施行俾存欽卹之風不失含弘之體從之
時史弘肇弄權殺害酷毒不循理體以羅織成風歸
讜嫉之故有是奏

周太祖廣順三年正月兵部尙書言管諸道州府貢
物據元勅諸道州府合輸土貢每年冬至後到京歲
前點簡候正伏於殿廷樂懸南排列如不依期限到
京者本州錄事叅軍殿罰勾押官典各料斷當司每

年坐勅文告報催促去年冬諸州府輸貢物違勅限者丹絳登曹等四州直至今年正月一日後方送貢物其本官典合行殿責欲移本州勘責從之

竇儼爲中書舍人顯德四年上疏云伏以歷代至理六綱爲首一曰明禮禮不明則彝倫不叙二曰崇樂樂不崇則二儀不和三曰熙政政不熙則群務不整四曰正刑刑不正則巨姦不懾五曰勸農農不勸則資澤不流六曰經武武不經則軍功不盛故禮有紀若人之衣冠樂有章若人之喉舌政有統若人之情性刑有制若人之呼吸農爲本若人之飲食武爲用

若人之手足斯六者不可斯須而去身也陛下思服帝猷寤寐獻納亟下方正之詔廓開藝能之路士有一技必得自效學攻百端靡不明至故小臣不揆愚鄙欲有陳導於禮樂刑政之內勸農經武之中相今所宜各具疏列其一曰夫禮者太一之紀品物之崇與天地同其節與陰陽順其道協於分藝行於國家本之以忠孝文之以倫義君臣父子夫婦之制冠婚喪祭射御之容朝聘享宴之宜軍旅田獵之事各有宜稱不相侵越所以講信修睦所以洗心防患上得之尊下得之安定親疎而別同異明是非而彰貴賤

執之則致福繆之則招悔憲物成教崇政明本未有不繇於禮者也自五帝之後三王以來有益有損或因或革咸有章憲書於冊書浩浩千編不可遽悉越在唐室典章頗盛程軌量昭采物酌中古訓垂法百代則有開元禮在紀先後明得失次其沿變志其楷式則有通典在錄一朝之事包五禮之儀義類相從討尋不紊則有會要在此三者聖教經制國之大綜也爰自梁朝之後仍世多故典臺之官皆差使於公務禮直之吏悉昧昏於檢按至今每有戎祀之事朝會之期多於市廛草議定注前後矛盾卒多糝穉臣

竊以保殘守缺因狹就寡乃暗主之事非明君所爲豈可以光陛下超世之宏圖爲大朝千載之盛美也所宜闡崇令猷以立國典綴叙舊書以爲邦紀義在精審理資端要可以範圍五帝楷則萬古彰陛下之聖明禮不虛道者也伏請依唐會要所設門類上自五帝迄于聖朝凡所施爲悉令編次凡關禮樂無有闕漏開元禮通典之書包綜于內名之曰大周禮俾禮院掌之太嘗博士如得其人宜久其職年深則兼官在任勿使旁轉如是則助風教以彌隆昇典制於將替隱覈前軌聲施無窮者也其二曰夫樂者以德

爲本以聲傳御中出所以導志外揚所以審政有天
地辰宿有軌數形色有陰陽逆順有離合隱見天數
五地數六六五相合故十一月至生黃鍾黃鍾者同
律之主五音之元宮也元宮之諧於仲呂母子也傳
於林鍾夫婦也迴於大簇父子也聚於南宮子婦也
兩陽必爭二陰必乖故抗衡者多異前五相追而後
五相隨蓋繇是也一章之中凡有七閏亥未巳丑酉
午寅者七閏之正也日有盈縮之度月有遲速之期
故或進於前或退於後陰陽之理也六鍾六閏十二
節凡二十有四位聲氣之大率也平分爲七直而略
其餘則子寅卯巳未酉戌謂之羽子寅辰午未酉亥
謂之宮子丑卯巳未申戌謂之角子卯辰巳未酉戌
謂之商此四者靡靡成章峻而清厲鄭衛之音也與
夫推曆生律以律命呂九六之偶旋相爲宮三正生
天地之美七宗固陰陽之序者於其通人神宣歲功
生成範宜之德紀協長大之筭則精麤異矣在乎審
治亂察盛衰原性情應形兆則殊塗而同歸也三正
者一爲天二爲地三爲人七宗者黃鍾爲宮大簇爲
商姑洗爲角林鍾爲徵南呂爲羽應鍾爲變宮蕤賓
爲變徵角爲木商爲金宮爲土變徵爲日變宮爲月

徵爲火羽爲水龍角元龜天豕井侯主乎角平亢河
鼓婁聚輿鬼主乎商天根須女庖俎鳥啄主乎宮辰
馬陰虛耗頭天都主乎變徵大火兵封天高鳥翼主
乎變宮龍尾玄室四兵天倡主乎徵天津東壁參伐
輟車主乎羽角之數六十有四商之數七十有二宮
之數八十有一變徵之數五十有六變宮之數四十
有二徵之數五十有四羽之數四十有八極商之數
九十陽之數一百二十有八陰之數一百一十有二
五音之數畢矣神無形而有化處乎聲之門故昭之
以音合之以筭音以定主筭以來象觸於耳而激於

心然後可言其樂也其音五其聲十二其調六十雅
部之樂也其音四其聲八其調二十有四胡部之樂
也隋唐已來樂兼夷夏天寶之世雅部大備寶應之
後音律漸衰郊廟殿延舊事失次泊黃巢盪覆京兆
鐘磬皆毀龍紀返正之歲有司別創樂懸乘風雖存
旋宮何在音範寢失至今闕然豈可以一時偶失之
事爲百代無窮之制何以訓正四方綏和百神軌物
垂則示人之極也昔唐虞歷載頌聲方作文武相繼
樂教大同陛下布昭聖武彰信天下宗社靈祇聿監
明德所宜憲章成式不失舊物原始以要終體本以

正未使樂與天地同和禮與天地同節伏請命博通之士上自五帝迄於聖朝凡樂章沿革摠次編錄凡三絃之通七絃之琴十三絃之箏二十絃之離二十五絃之瑟三漏之箏六漏之箏七漏之笛八漏之箎十三管之和十七管之笙十九管之巢二十三管之簫皆列譜記對而合之類從聲等雖異必通編於歷代樂錄之後永爲定式名之曰大周正樂俾樂寺掌之依文教習務在齊肅如是則可以移風俗和上下和順之象著則嘉盛之德備則六變至幽深九奏達高明知樂之爲大者也其三曰夫政者正也以正率

下下思盡誠則上無闕政人能持政非政持人若失人而務政則雖勤而何益故人道敏政政在擇人擇人之先自相而始登庸廊廟則有經啓措置之權入侍帷幄則有將迎承弼之任機事攸綜號令攸發平章於百揆維制於四方不可不重也唐末政出中冓輕於爰立才處輔相之任便兼公揆之官卿大夫奔競公行禮讓道息未得之日則以致身富貴爲馳騫旣得之後則以與國休戚爲憂虞乃三緘於統要之司獨善於兼濟之職但思解密勿之務守崇重之官逍遙林亭保安宗族於身之謀甚利於國之效如何

方今宰臣實罄忠力燹和元化則歲以之豐稔攸叙
彛倫則時以之雍靖上無闕政下無異議固能明舉
賢才羅濟經略也伏請今宰臣於南宮三品之中兩
省給舍已上有能經營國家寧衛社稷者具名以舉
若陛下素諳才業上符定制則輔相公揆之授誠亦
得宜陛下嚮不知名或官品未稱則令以本官權知
政事若尚書承郎權知政事則兼散騎嘗侍之官陛
下歲年之間察其爲作如能興利除害獻可替否進
賢才退不肖則遷其官加其秩官高者則受平章事
末高者但循資而轉且令權知如其非才卽便守本

官罷知政事讓其舉主令廷謝知過亦繇子玉敗軍
令尹當責之義也書曰試可乃已又曰歷試諸艱今
班行之中有員無職者大半可令量才授任臨事制
宜出則以公務效試入則以舊位登叙任事者有賞
不任事者當黜黜陟旣明天下自正此則爲政之道
畢矣其四曰刑者五行之鞭策五性之權衡下民之
隄防有國之紀律自古五刑之設期於無刑仲尼曰
民有輕辜必求其善以赦其過民有大罪必原其故
以輔其化如有死罪期使之生則其善也刑肅俗弊
禮謂疵國勝殘去殺傳稱善人昔漢文斷獄四百殆

致刑措唐朝貞觀之世歲決死罪二人今陛下恤刑慎獄義權情恕非不至也而天下冒禁麗法者甚衆殊死大辟者頗多蓋繇未塞其原而理其著者也省刑之要厥有二端一者謹吏二者息盜謹吏在乎責長息盜在乎黷取吳姬群笑孫武加戮於隊長此責長之明效也襄民不道班伯得賊於酋豪此息盜之良術也夫一縣之政揔於令長令長正下吏自肅一州之權統於牧守牧守繆僚屬必濫濫之與肅上使然也近代下民之訟多訟令佐敢訴牧守十中或一訟令佐者皆得理察訟牧守者十無一問縱或詰之

而歸罪陪隸者衆矣斧鉞不用刀鋸日弊古人耻之典刑不阿貴賤貴猶當罰賤者自戒如是則官吏畏法刑損其半矣而又除其寇盜使無逸越除盜之術大槩有三一者使賤人徒侶自相糾告糾告不虛則以所告賊產之半賞其告者或一人能告十賊亦以十賊半產與之親屬之間比許容隱在於用權救弊亦可暫更今後有骨肉爲非許令首告然所被告者不可令至極刑傷宗族之情失風教之義只令通指同行徒侶則除惡甚多骨肉所首之人特與疎放如是則同惡自相疑阻爭先於陳告骨肉欲保其親競

來於原首此息盜之上策也二者如鄭州新鄭一縣
團結鄉社之人名為義營分立將佐一戶為賊則累
其一村一戶被劫則罪其一將大舉鼓聲之所壯丁
雲集賊徒至多不過一二十數義營所聚動及百人
賊人奔逃無有免者見今鄭州封內唯新鄭獨免紋
數頃歲尉氏強民潛往密縣行劫迴入新鄭疆界殺
獲苦無漏遺豈止自部之中不留凶慝兼令涉境之
寇難出網羅此息盜之中策也三者有賊之後村人
報鎮鎮將詰村驗蹤團保限外不能獲賊罪罰鎮戍
此息盜之下策也如是則姦盜漸息刑又損其半矣

何慮漢文之年貞觀之世不在於今時矣其五日農
者至正之道自然之資為邦大本當今急務欲國家
之康濟在府庫之充盈欲府庫之充盈在田疇之修
闢人力可以課致地利可以計生若地利有遺人力
不勸欲邦寧本固化治時雍不可得也今宰牧怠職
百姓怠業曠土不墾履畝是憂但隨宜以耕耘惟天
時而是賴苟有水旱其將柰何危殆之機在乎返掌
晉朝開運之歲卽其驗歟夫欲富國強兵愛民利物
興事任力崇德尊道敷至化恢長御革頽風洽豐澤
無不繇家給人足而馴致其道也家給人足始於務

農務農之原實有三術一曰廣田二曰已債三曰節費廣田則所獲豐羨已債則儲積可保節費則歲計有餘今民不廣田良有以也蓋慮無盡地之稼括爲稅簿則并竭所收輸不蒲要誰不懼也晉漢二代累發德音使民多種廣耕只以舊額供賦既種之後旋以見苗計租以至倉箱匱空鄉井愁歎先皇享御之始赦書節文之中亦勸民勤勞不殊前意至今曠隙之地荒萊不開繇於誠信前失民無固志者也夫爲政之先莫若著信商君移木豈禮也哉蓋使人信之則無不治也陛下宜散下明詔使民廣田但輸舊租

永不簡案上言宗廟以表至誠令州郡懸法之所刻石示民民必信之而田廣矣田廣則多獲多獲則民足王者藏於天下實一國之富完此廣田之上策也小畝步百周之制也中畝二百四十漢之制也大畝三百六十齊魯之制也今所用者漢之中畝若步以大畝之田輸其中畝之稅或額不敷舊則虛加蒲之逮於次年而田自多矣此廣田之中策也前所言已債節費利莫大焉今編戶之疇以債成俗賦稅之外罄不償債收穫纔畢率無困倉官有科折之弊私有酺醯之緡倍稱速息半價速賣則利貸一斗而償四

斗矣欲民不困豈可得哉此外鄉閭之中嘗有酒食之耗諂僧佞佛相扇成風且瑞雪甘雨和氣所致非爲一鄉一里委曲而降小民無知競作齋賽一歲之內數數有之是則債利之劫民也將倍於公賦齋賽之蠹民也又等於王租欲民之饒終不可致莫若已債節費歸利於民起於來年不得通債今歲見償之者但令以本債償之留其利餘爲民不債之備則民食資半矣夫陽秋之候豺獮尙祭民祭里社自古而然宜於二社之辰得以祭餘共相飲食其餘祈禱散賽之事嚴禁罷之則民食又資其半矣民食旣足則

民力普存民力普存則穡事敦業穡事敦業財用益豐因其利而利之則國富刑清天下知禮節矣其六曰兵者所以成武功遏亂略行天討順人心混一區宇昭宣文德三五之伐不能去兵故軒戰阪泉堯征丹浦西伯戡黎之誥成王踐奄之誓卽其前躅也陛下卜世之數莫知其紀五德所正泄萬方之率從未占而孚契人心不戒而謀同時利唯淮南李景負固不賓陛下神略內融大權潛運整軍經武倏往忽來戎輅一巡則八州降附靈旗再指則四塞盪平歸命者一一皆存來戰者萬萬無免偏師獻捷迨有百數

仁贍交臂以請命壽春全城而北遷淮上嚙喉古來
未有命以衆擊寡以尊伐卑以正破僞以強凌弱鮮
不克矣然兵道貴速速則惠民在敵境者免驅掠俘
馘之無期處內地者免資糧供億之爲役荆湖兩浙
竝有舟師聞其水戰之利勝於淮寇皆未肯叶心齊
力犄角成功者蓋慮吞韓併衛滅虞兼虢唇亡齒寒
勢之懼也陛下宜分命使臣諭其成策錫之以丹書
鐵契質之以左宗右社其三方協同大舉如株陵淪
陷南服懷柔則元功盛勲當崇賞厚報俾百世傳襲
保其江山旌旗服章僚屬官秩咸用舊制朝廷弗詢
彼旣得信誓之文又蒙寬大之詔必能稟大君之神
筭籍清廟之靈祚親督蒙衝橫江長驚李景必分兵
禦拒首尾支離陛下乃躬御六師方軌南進駐驛江
北圖惟厥成則濠廬等州可不攻而拔矣帝覽而善
之

册府元龜 奏議七

册府元龜

册府元龜

巡按福建監察御史臣李嗣京 訂正

知長樂縣事臣夏允彝參閱

知建陽縣事臣黃國琦較釋

臺省部 二十

謀畫

漢室而下借箸引籍出入禁闈者皆天子從官而居
議臣之任也魏晉而下參掌機要彌縫政典亦乃佐
佑大化而總裁衆務焉固其濟濟而富賢材藹藹而
多吉士乃有深達治本詳識國體洞經綸之術練安

册府元龜 臺省部

卷之四百三十一

危之計策慮胸臆智略輻輳或發於占對而曲暢幾
微或形於疏議而咸有倫脊談必極於時變誠因彰
於忠蓋流風嘉論信而有徵斯皆名臣之陳迹立言
之不朽者已

漢主父偃武帝時爲中大夫偃說帝曰古者諸侯地
不過百里強弱之形易制也今諸侯或連城數十地
方千里緩則驕奢易爲淫亂急則阻其強而合從以
逆京師今以法割削卽逾節萌起前日龜錯是也今
諸侯子弟或十數而適嗣代立餘雖骨肉無尺地之
封則仁孝之道不宣願陛下令諸侯得推恩分子弟

以地侯之被人人喜得所願上以德施實分其國必
稍弱矣於是帝從其計因令關馬及弩不得出絕游
說之路重附益諸侯之法急註誤其君之罪諸侯王
遂以弱而合從之事絕矣

魏荀彧漢末爲侍中守尙書令建安九年或說太祖
宜復古置九州則冀州所制者廣大天下服矣太祖
將從之或言曰若是則冀州當得河東馮翊扶風西
河幽并之地所尊者衆前日公破袁尙擒審配海內
震駭必人人自恐不得保其土地守其兵衆也今使
分屬冀州將動心且人多說關右諸將以閉關之計

今聞此以爲必以次見奪一旦生變雖有善守者轉相脅爲非則袁尙得寬其死而袁譚懷貳劉表遂保江漢之間天下未易圖也願公急引兵先定河北然後脩復舊京南臨荊州責貢之不入則天下咸知公意人人自安天下大定乃議古制此社稷長久之利也太祖報曰微足下之相難所失多矣遂寢九州議後太祖將伐劉表問或策安出或曰今華夏已平南土知困矣可顯出宛葉而間行輕進以掩其不意太祖遂行會表病死太祖直趨宛葉如或計表子琮以州逆降

桓階爲尙書時曹仁爲關羽所圍太祖遣徐晃救之不解太祖欲自南征以問群下羣下皆謂王不亟行今敗矣階獨曰太祖以仁等爲足以料事勢不也曰能大王恐二人遺力邪曰不然則何爲自往曰吾恐虜衆多而晃等勢不便耳階曰今仁等處重圍之中而守死無貳者誠以大王遠爲之勢也夫居萬死之地必有死爭之心內懷死爭外有強救大王按六軍以示餘力何憂於敗而欲自往太祖善其言駐軍於摩陂賊遂退

衛覬爲尙書是時關西諸將外雖懷附內未可信司

隸較尉鍾繇求以三千兵入關外託討張魯內以脅取質任太祖使荀彧問覬覬以爲西方諸將皆豎夫崛起無雄天下意苟安樂目前而已今國家厚加爵號得其所志非有大故不憂爲變也宜爲後圖若以兵入關中當討張魯魯在深山道徑不通彼必疑之一相驚動地險衆彊殆難爲慮或以覬議呈太祖太祖初善之而以繇自典其任遂從繇議兵始進而關右大叛太祖自親征僅乃平之死者萬計太祖悔不從覬議繇益重覬

劉曄爲侍中黃初中孫權遣使求降文帝以問曄曄

對曰權無故求降必內有急權前襲殺關羽取荊州四郡備怒必大興師伐之外有彊寇衆心不安又恐中國承其釁而伐之故委地求降一以却中國之兵二則假中國之援以彊其衆而疑敵人權善用兵見策知變其計必出於此今天下三分中國十有其八吳屬各保一州阻山依水有急相救此小國之利也今還自相攻天亡之也宜大興師徑渡江襲其內蜀攻其外我襲其內吳之亡不出旬月矣吳亡則蜀孤若割吳半蜀固不能久存况蜀得其外我得其內乎帝曰人稱臣降而伐之疑天下欲來者心必以爲懼

其一不可孤何不且受吳降而襲蜀之後乎對曰蜀遠吳近又聞中國伐之便還軍不能止也今備已怒故興兵擊吳聞我伐吳知吳必亡必喜而進與我爭割吳地必不改計初怒救吳必然之勢也帝不聽遂受吳降卽拜權爲吳王曄又進曰不可先帝征伐九分天下兼其八威震海內陛下受禪卽真德含天地聲暨四遠此實然之勢非卑臣頌言也權雖有雄才故漢驃騎將軍南昌侯耳官輕勢卑士民有畏中國心不可彊迫與成所謀也不得已受其降可進其將軍號封十萬戶侯不可卽以爲王也夫王位去天子

一階耳其禮秩服御相亂也彼直爲侯江南士民未有君臣之義也我信其僞降就封殖之崇其位號定其君臣是爲虎傅翼也權旣受王位却蜀平之外後盡禮事中國使其國內皆聞之內爲無禮以怒陛下陛下赫然發怒興兵討之乃徐告其民曰我委身事中國不愛珍貨重寶隨時貢獻不敢失臣禮也無故伐我必欲殘我國家俘我民人子女以爲僮隸僕妾吳民無緣不信其言也信其言而感怒上下同心戰加十倍矣又不從遂卽拜權爲吳王權將陸欲議大敗劉備殺其兵八萬人備僅以身免權外禮愈卑而

內行不順果如擘言

蔣濟文帝時爲尙書車駕征吳幸廣陵濟表水道難通又上三州論以諷帝帝不從於是戰船千數皆滯不得行議者欲就留兵屯田濟以爲東近湖北臨淮若水盛時賊易爲寇不可安屯帝從之車駕卽發還到精湖水稍盡盡留船付濟船本歷適數百里中濟更鑿地作四五道礙船令聚豫作土脉遏斷湖水皆引後船一時開遏入淮中帝還維揚謂蔣濟曰事不可不曉吾前決謂分半燒船於山陽池中卿於後致之略與吾俱至譙又每得所陳實入吾意自今討賊

計畫善思論之明帝卽位大司馬曹休帥軍向皖濟表以爲深入虜地與孫權精兵對而朱然等在上流乘休後臣未見其利也軍至皖吳出兵安陸濟又上疏曰今賊示形於西必欲并兵圖東宜急詔諸軍往救之會休軍已敗盡棄噐仗輜重退還吳欲塞夾石遇救兵至是以官軍得不沒焉

劉放爲中書監青龍初孫權與諸葛亮連和欲俱出爲寇邊得權書放乃改易其辭往往換其本文而傳令之與征東將軍滿寵若欲歸化封以示亮亮騰與吳大將步騭等以見權權懼亮自疑深自解說

孫資爲中書令明帝太和末吳遣將周賀浮海詣遼東招誘公孫淵帝欲邀討之朝議多以爲不可惟資決行策果大破之又烏丸較尉田豫帥西部鮮卑洩歸尼等出塞討軻比能智鬱築鞬破之還至馬邑故城北比能帥三萬騎圍豫帝聞之計未有所出如中書省以問監令資對曰上谷太守閻志柔弟也爲比能素所歸信令馳詔使說比能可不勞師而自解矣帝從之比能果釋豫而還

劉邵爲散騎常侍青龍中吳圍合肥時東方吏士皆分休征東將軍滿寵表請中軍兵并召休將士須集擊之邵議以爲賊衆新至心專氣銳寵以少人自戰其地若便進擊不必能制寵求待兵未有所失也以爲可先遣步兵五千精騎三千軍前發揚聲進道震曜形勢騎到合肥疏其行隊多其旌鼓曜兵城下引出賊後擬其歸路要其糧道賊聞大軍來騎斷其後必震怖遁走不戰自破賊矣帝從之兵比至合肥賊果退還

晉安平王孚魏文帝時爲度支尚書孚以爲擒敵制勝宜有備預每諸葛亮入寇關中軍兵不能制敵中軍奔赴輒不及事機宜預選步騎二萬以爲二部爲

討賊之備

張華爲中書令加散騎嘗侍武帝潛與羊祜謀伐吳而群臣多以爲不可唯華贊成其計其後鑿疾篤帝遣華詣鑿問以伐吳之策及將大舉以華爲度支尚書乃量計運漕決定廟筭衆軍旣進而未有尅獲賈充等奏誅華以謝天下帝曰此是吾意華但與吾同耳時大臣皆以爲未可輕進華獨堅執以爲必尅郤鑿明帝時爲尚書令與帝謀滅王敦旣而錢鳳攻逼京都時議者以王含錢鳳衆力百倍苑城小而不固宜及軍勢未成大駕自出距戰鑿曰羣逆縱逸其

勢不可當可以筭屈難以力競且含等號令不一抄盜相尋百姓懲往年之暴皆人自爲守乘逆順之勢何往不尅且賊無經略遠圖惟恃豕突一戰曠日持久必啓義士之心令謀猷得展今以此弱力敵彼疆寇決勝負於一朝定成敗於呼吸雖有申胥之徒義存投袂何補於旣往哉帝從之

孔坦成帝時爲尚書左丞屬蘇峻反坦爲司徒司馬陶回謂王導曰及峻未至宜急斷阜陵之界守江西當利諸口彼少我衆一戰決矣若峻未來可往逼其城今不先往峻必先至先人有奪人之功時不可失

導然之庾亮以爲峻脫逕來是襲朝廷虛也故計不行峻遂破姑熟取鹽米亮方悔之

王彪之爲吏部尙書時簡文帝爲撫軍執政太尉桓溫欲北伐屢詔不許溫輒下武昌人情震懼或勸殷浩引身告退彪之言於簡文曰此非保社稷爲殿下計皆自爲計爾若殷浩去職人情驚駭天子獨坐旣爾當有任其責者非殿下而誰又謂浩曰彼抗表問罪卿爲其首事任如此猜釁已構欲作匹夫豈有全地邪且當靜以待之今相王與手書示以欵誠陳以成敗當必旋旆若不順命卽遣中詔如復不奉乃當

以正義相裁無故息息先自猖蹶浩曰決大事正自難頃日來欲使人悶聞卿此謀意始得了溫亦奉帝旨果不進

宋謝靈運文帝時爲侍中陳疾東歸將行上書勸伐河北曰自中原喪亂百有餘年流離寇戎湮沒殊顛先帝聰明神武哀濟羣生將欲盪定趙魏大同文軌運謝事乖理違願絕仰德抱悲恨存生盡况陵塋未幾凶虜伺隙預在有識誰不憤歎而景平執事竝非其才且遘紛京師豈慮託付遂使孤城窮陷莫肯拯赴綿河千里翻爲寇有晚遣鎮戍皆先朝之所開拓

一旦淪亡此國耻宜雪被於近事者也又北境自染
逆虜窮苦備罹徵調賦歛靡有止已所求不獲輒致
誅殞身禍家破闔門比屋此亦仁者所爲傷心者也
咸云西虜捨未遠師隴外東虜乘虛呼可掩襲西軍
旣反得據關中長圍咸陽還路已絕雖遣救援停住
河東遂乃遠討天城欲爲首尾而西寇深山重阻根
本自固徒棄巢窟未足相拯師老於外國虛於內時
來之會莫復過此觀兵耀威實在茲日若相持未已
或生事變忽值新起之衆則異於今苟乖其時難爲
經略雖兵食倍多則萬全無必矣又歷觀前代顛以

兼弱爲本古今聖德未之或殊豈不以天時人事理
數相得興亡之度定期居然故古人云旣見天殃又
見人災乃可以謀昔魏氏之強平定荆冀乃乘袁劉
之弱晉氏之盛拓開吳蜀亦因葛陸之衰此皆前世
成事著於史策者也自羗平之後天下亦謂虜當俱
滅長驅滑臺席卷下城奪氣喪魄指日就盡但長安
違律潼關失守用緩天誅假延歲月爾來至今十有
二載是謂一紀曩有前言况五胡代數齊世虜期餘
命盡於來年自相攻伐兩取其困卞莊之形驗之今
役仰望聖澤有若渴饑注心南雲爲日已久來蘇之

異實歸聖明此而弗乘後則未兆卽日府藏誠無兼
儲然凡造大事待國富兵強不必乘會於我爲易貴
在得時器械旣充衆力粗足方於前後乃當有優嘗
議損益久可以證冀州口數百萬有餘田賦之沃著
自貢典先才經創基趾猶存澄流引源桑麻蔽野強
富之實昭然可知爲國長久之計孰若一往之費耶
或懲關西之敗而謂河北難守二境形勢表裏不同
關西雜居種類不一昔在前漢屯軍霸上通火甘泉
况乃遠戍之軍值新故交代之際者乎河北悉是舊
戶差無雜人連嶺判阻三關作隘若游騎長驅則沙

漠風靡若嚴兵守塞則冀方山固昔隴西傷破鼃錯
興言匈奴慢侮賈誼憤歎方於今日皆爲餘矣晉武
中主耳值孫皓虐亂天祚其德亦繇鉅平奉策荀賈
折謀故能業崇當年區宇一統况今陛下聰明聖哲
天下歸仁文德與武功並震霜威共素風俱舉協以
宰輔賢明諸王美令岳牧宣烈虎臣盈朝而天威遠
命亦何敵不滅矧伊頑虜假日而已哉伏惟深機志
務久定神謨臣卑賤側陋竄景巖穴實仰希太平之
道傾覩岱宗之封雖乏相如之筆庶免史談之憤以
此謝病京師萬無恨矣久欲上陳懼在觸冒蒙恩賜

假暫違禁省消渴十年嘗慮朝露抱此愚志昧死以聞

蔡興宗爲吏部尙書時太宗初立諸方並舉兵反國家所保唯丹陽淮南數郡其間諸縣或已應賊東兵已至永世宮省危懼帝集羣臣以謀成敗興宗曰今普天圖逸人有異志宜鎮之以靜以至信待人比者逆徒親戚布在宮省若繩之以法則土崩立至宜明罪不相及之義物情旣定人有戰心六軍精勇噐甲犀利以待不習之兵其勢相萬爾願陛下勿憂帝從之

後魏張袞爲給事中時道武在代袞嘗參謀慕容寶之來復寇也袞言於道武曰寶乘滑臺之功因長子之捷傾資竭力難與爭鋒愚以爲宜羸師卷甲以俟其心太祖從之果破之後遷黃門侍郎道武南伐師次中山袞言於道武曰慕容寶憑三世之資城池之固雖皇威震赫勢必擒殄然窮兵極武非王者所宜昔酈生一說田橫委質魯魯飛連書聊將授首臣誠德非古人略無奇策仰憑靈威庶必有感帝從之袞遺寶書喻以成敗寶見書大懼遂奔和龍旣尅中山聽入八議拜袞奮武將軍幽州刺史賜爵臨渭侯

崔浩爲左光祿大夫南藩諸將表宋文帝戒嚴欲犯河南請兵三萬先其未發逆擊之因誅河北流民在界上者絕其鄉導足以挫其銳氣使不敢深入詔公卿議之咸言宜許浩曰此不可從也往年國家大破蠕蠕馬力有餘南賊震懼嘗恐輕兵奄至臥不安席故揚聲動衆以備不虞非敢先發又南土下濕夏月蒸暑水潦方多草木深邃疾病必起非行師之時且彼先嚴有備必堅城固守屯軍攻之則糧食不給分兵肆討則無以應敵未見其利就使能來待其勞倦秋涼馬肥因敵取食徐往擊之萬全之計勝必可尅

在朝羣臣及西北守將從陛下征討西滅赫連北破蠕蠕多獲美女珍寶馬畜成羣南鎮諸將聞而生羨亦欲南抄以取資財是以妄張賊勢披毛求瑕冀得肆心旣不獲聽故數稱賊動以恐朝廷背公存私爲國生事非忠臣也太武從浩議南鎮諸將復表賊至而自陳兵少簡幽州以南戍兵佐守就漳水造船嚴以爲備公卿議者僉然欲遣騎五千并假署司馬楚之魯軌韓延之等令誘引邊民浩曰非上策也彼聞幽州已南精兵悉發大造舟船輕騎在後欲存立司馬誅除劉族必舉國駭擾懼於滅亡當悉發精銳來

備北境後審知官軍有聲無實恃其先聚必喜而前行徑來至河肆其侵暴則我守將無以禦之若彼有見機之人善設權譎乘間深入虞我國虛生變不難非制敵之良計今公卿欲以威力攘賊乃所以招令速至也夫張虛聲而召實害此之謂矣不可不思後悔無及我使在彼期四月前還可待使至審而後發猶未晚也楚之之徒是彼所忌將奪其國彼安得端坐視之故楚之往則彼來楚之止則彼息其勢然也且楚之等項才能招合輕薄無賴而不能成就大功爲國生事使兵連禍結必此之羣矣臣嘗聞魯軌說

姚興求入荊州至則散敗乃不免蠻賊掠賣爲奴使禍及姚泓已然之效浩復陳天時不利於彼曰今茲害氣在揚州不宜先舉兵一也午歲自刑先發者傷二也日蝕滅光晝昏星見飛鳥墮落宿值斗牛憂在死亡三也熒惑伏匿於翼軫惑亂及喪四也太白未出進兵者敗五也夫興國之君先修人事次盡地利後觀天時萬舉而萬全國安而身盛今宋新國是人

事未周也災變屢見是天時不協也舟行水涸是地利不盡也三事無一成自守猶或不安何得先發而攻人哉彼必聽我虛聲而嚴我亦承彼嚴而動兩推

其咎皆自以爲應敵兵法當分災迎受害氣未可舉動也太武不能違衆乃從公卿議浩復固爭不從遂遣陽平王杜超鎮鄴瑯琊王司馬楚之等屯潁川於是賊來遂疾到彥之自清水入河沂流西行分兵列守南岸西至潼關太武聞赫連定與宋懸分河北乃治兵欲先討赫連羣臣皆曰宋猶在河中舍之西行前寇未可必尅而宋乘虛則失東州矣太武疑焉問計於浩浩曰宋與赫連定同惡相招連結馮跋牽引蠕蠕規肆逆心虛相唱和宋望定進定待宋前皆莫敢先入以臣觀之有似連鷄不得俱飛無能爲害也

臣始謂宋軍來當屯在河中兩道北上東道向冀州西道衝鄴如此則陛下當自致討不能徐行今則不然東西列兵徑二千里一處不過數千形分勢弱以此觀之俾兒情見正望固河自守免死爲幸無北度意也赫連定殘根易摧擬之必仆尅定之後東出潼關席卷而前則威震南極江淮以北無立草矣聖策獨發非愚近所及願陛下必行勿疑平涼旣平其日宴會太武執浩手以示蒙遜使曰所云崔公此是也才略之美當今無比朕行止必問成敗決焉若合符契萬無失矣後冠軍將軍安頡軍還獻南俘囚說南

賊之言云宋勅其諸將若北國兵動先其未至徑前入河若其不動在彭城勿進如浩所量太武謂公卿曰卿輩前謂我用浩計爲謬驚怖固諫嘗勝之家自謂踰人遠矣至於歸終乃不能及

張白澤爲給事中時蠕蠕犯塞獻文引見羣臣議之尙書僕射元自辰進曰若車駕親行恐京師危懼不如持重固守自安虜懸軍深入糧無繼運以臣量之自退不久遣將追擊破之必矣白澤曰陛下欽明則天比蹤前聖而蠢爾荒愚輕犯王略寇乃顛沛於遠圖我將宴安於近毒仰惟神略則不然矣今若鑿與親動賊必望塵奔散寧容抑挫神兵坐而縱敵萬乘之尊嬰城自守進失可乘之機退非無前之義惟陛下留神帝從之遂大破虜衆

程駿爲秘書令文明太后臨朝駿上表曰春秋有云見禮於其君者若孝子之養父母見無禮於其君者若若鷹鷂之逐鳥雀所以勸誠將來垂範萬代昔陳恒弑君宣尼請討雖欲宴逸其得已乎今廟筭天廻七州雲動將水蕩鯨鯢陸掃凶逆然戰貴不陣兵家所美宜先遣劉昶招諭淮南若應聲響悅同心齊舉則長江之險可朝服而濟道成之首可崇朝而懸苟

江南之輕薄背劉氏之恩義則曲在彼矣何負神明哉直義檄江南振旅廻旆亦足以示救患之六人揚義風於四海且攻難守易則力懸百倍不可不深思不可不熟慮今天下雖謐方外猶慮捨寅僥倖於西南狂虜伺釁於漠北脫攻不稱心恐兵不卒解兵不卒解則憂慮逾深夫爲社稷之計者莫不先於守本臣愚以爲觀兵江濟振曜皇威宜特加撫慰秋毫無犯秋毫無犯則民知德信民知德信則襁負而來繼負而來則淮北可定淮北可定則吳寇異圖吳寇異圖則禍釁於漠後觀釁而動則不免矣諸停諸州之

兵且待後舉所謂守本者也伏惟陛下太皇太后謨筭神規彌綸百勝之後應機體變獨悟方寸之中臣影頽虞淵昏耄將及雖思憂國終無云補不從

崔衡孝文時爲給事中車駕巡狩以衡爲大都督長史衡涉獵書史頗爲文筆蠕蠕時犯邊塞衡上書陳備禦之方便國利民之策凡五十餘條

郭祚宣武時爲尙書左僕射先是梁帝嘗遣將康絢邊淮將灌揚徐祚表曰蕭衍狂狡擅斷川瀆役苦民勞危亡已兆然古諺有之敵不可縱夫以一勺之水或爲不測之淵如不時滅恐同原草宜命一重將率

統軍三千人領羽林一萬五千人并科京東七州虎
旅九萬長驅電邁遄令揣持擒斬之勲一如嘗制賊
資雜物悉入軍人如此則鯨鯢之首可不日而懸誠
如農桑之時非發衆之日苟事理宜然亦不得不爾
昔帝顧跋扈殷后起昆吳之師儼狃孔熾周王興六
月之伐臣職忝樞衡獻納是主心之所懷寧敢自嘿
并宜勅揚州選一猛將遣當州之兵令赴浮山表裏
夾攻朝義從之

李苗爲員外散騎嘗侍孝明正光末三秦反叛侵及
三輔時承平旣久民不習戰苗以隴兵強悍且羣聚
無資乃上書曰臣聞食少兵精利於速戰糧多卒衆
事宜持久今隴賊猖狂非有素蓄雖據兩城本無德
義其勢在於疾攻日有降納遲則人情離阻坐受崩
潰夫颺至風起逆者求萬一之功高壁深壘王師有
全制之策但天下久泰人不曉兵奔利不相待逃難
不相顧將無法令士非教習以僞將御情卒不思長
久之計務奇正之道必有莫敖輕敵之志恐無充國
持重之規如今隴東不守汧軍敗散則兩秦遂強三
輔危弱國之右臂於斯廢矣今宜勅大將深溝高壘
堅守勿戰別命偏師精兵數千出麥積崖以襲其後

則沂岐之下羣妖自散於是詔苗爲統軍與別將淳于誕俱出梁益隸行臺魏子建子建以苗爲郎中仍領統軍深見知待

高恭之字道穆爲中書舍人元顥逼虎牢城或勸莊帝赴關西者帝以問道穆道穆對曰關中今日殘荒何繇可往臣謂元顥兵衆不多乘虛深入者繇國家將帥征捍不得其人爾陛下若親率宿衛高募重賞背城一戰臣等竭其股肱之力破顥孤軍必不疑矣如恐成敗難測非萬乘所履便宜車駕北渡循河東下徵大將軍天穆合於滎陽向虎牢別徵爾朱榮軍

令赴河內以掎角之旬月之間何往不尅也臣竊謂萬全俄除給事黃門侍郎於是爾朱榮欲迴師待秋道穆謂榮曰元顥以蕞爾輕兵掩據京雒使乘輿飄露人神恨憤主憂臣辱良在於今大王擁百萬之衆輔天子而令諸侯自可分兵河畔縛筏造船處處遣渡徑擒羣賊復主宮闕此桓文之舉也且一日縱敵數世之患今若還師令顥重完守具徵兵天下所謂養虺成蛇悔無及矣榮深然之曰揚黃門侃已陳此計當更議決耳及莊帝反政因宴次謂爾朱榮曰前若不用高黃門計則社稷不安可爲朕勸其酒令醉

榮對曰臣本北征蠕蠕高黃門與臣作監軍臨事能
決實可任用遷御史中尉兼黃門侍郎及爾朱世隆
等率其部顛戰於大夏門北道穆受詔督戰又贊成
太府卿李苗斷橋之計世隆等於是北遁

北齊孫搦高祖時爲散騎嘗侍奏請大括燕嘗雲朔
顯蔚二夏州高平涼之民以爲軍士逃隱者身及主
人三長守令罪以大辟沒入其家於是所獲甚衆搦
之計也

顏之推爲黃門侍郎武成清河末周兵陷晉陽帝輕
騎還鄴窘急計無所從之推因宦者侍中鄧長顛進

奔陳之策仍勸募吳士千餘人以爲左右取青徐路
共投陳國帝甚納之以告丞相高阿那肱等阿那肱
不願入陳乃云吳士難信不須募之勸帝送珍寶累
重向青州且守三齊之地若不可保徐浮海南渡雖
不從之推計策然猶以爲平原太守令守河津

源文宗後主時爲祕書監陳將吳明徹寇江南歷陽
瓜步相尋失守趙彥深於起居省密訪文宗曰吳賊
講張遂至於此僕妨賢旣久憂懼交深今者之勢計
將安出弟往在涇州甚悉江淮間情事今將何以禦
之對曰荷國厚恩無繇報效有所聞見敢不盡言但

朝廷精兵必不肯多付諸將數千已下復不得與吳楚爭鋒命將出軍反爲彼餌尉破胡人品王之所知進旣不得退又未可敗績之事匪朝伊夕王而能入朝野傾心脫一日參差悔無所及以今日之計不可再三國家待遇淮南失之同於蒿箭如文宗計者不過專委王琳淮南招募三四萬人風俗相通能得死力兼令舊將淮北捉兵足堪固守且琳之於曇瑱不止北面事之明矣竊謂計之上者矣若不推赤心於琳別遣餘人制肘復成速禍彌不可爲彥深歎之曰第此良圖足爲制勝千里但口舌爭來十日已足終不見從時事至此安可盡言相顧流涕

隋趙賢通仕周爲民部中大夫武帝出兵鞏雒欲收齊河南之地賢通諫曰河南雒陽四面受敵縱得之不可以守請從江北直指太原傾其巢穴一舉以定帝不納師竟無功

宇文弼仕周爲內史都上士武帝將出兵河陽以伐齊謀及臣下弼進策曰齊氏建國于今累葉雖曰無道藩屏之寄尚有其人今之用兵須擇其地河陽衝要精兵所聚盡力攻圍恐難得志如臣所見彼汾之曲成小山平攻之易拔用武之地莫過於此願陛下

詳之帝不納師竟無功

唐高適爲左拾遺天寶末天下兵起潼關失守適上策曰竭庫藏召募以禦賊猶未失計事雖不行聞者壯之

李絳爲左僕射寶曆元年澤潞節度使劉悟死子從諫求爲留後絳上疏曰臣伏以兵機尙速久卽計生威斷貴定疑卽變起人情未一乃可伐謀事勢已分則難命中據劉悟八月十日得病計是日便死逗留掩匿奏報已遲朝廷旣知又數十日都未有處分中外人意共惜事機令昭義兵衆必不盡同從諫之亂

縱有同者不過所厚一二千人直使一半叶同尙有一半守順况從諫不魯久主兵馬威惠未加於人又此道素亦貧窮非時必無優賞今朝廷但速除近澤潞四面一將帥充昭義節度令倍程赴鎮從諫未及鋪置新使已到潞州所謂先人有奪人之心疾雷不及掩耳真從天上落也新使旣到潞州軍心自有所繫從諫無位何名主張又設使未到已前謀撓朝命臣亦料得必無能爲若欲多分兵馬守境則事須給付噐械將較等旣得噐械又已有正節度使豈肯更爲從諫腹心若欲少分兵馬則不足抗拒新使之入

事宜物理昭然可知臣前月十七日已面陳論并具狀聞奏訖至今又二十餘日未有處分恐潞州三軍會朝廷意旨將欲效順卽慮忽與從諫將欲同惡又却恐除別人儻更被姦人爲畫狡計虛張賞設錢數兵士覬望尤難指揮今則已似太遲失於制置若更稽緩事恐轉生伏望速賜裁斷仍先下明勅符賜新節度使五十萬匹物令宣示三軍以其從來忠節故有此賜便節級賞設續除劉從諫一軍郾刺史從諫旣粗有得必且擇利而行萬萬之中無一二違拒必若不從指揮臣亦以爲不假攻計蓋山東三州難自存立若欲旁連魏鎮卽須厚賂交通若擬自保封疆卽須終日備禦四面受敵必不支持數月之間定見覆敗况又聞山東官健已不許自畜刀兵足明軍心殊未得一帳下之事亦在不疑長短此方義無便授從諫之理今更於意外料度儻從諫事急將所親厚三二千人散投魏鎮必亦虜縛送歸闕廷上取忠義之名下快讐怨之志此必然之理也在魏博鎮州留一從諫亦何所利其將士三二千旣是從逆得散却亦是國家一事縱橫揣度股掌無逃又以爲直使山東之人未得其便偶俛受制依違俟時朝廷亦只要

明勅四面諸軍嚴兵保境勿令公私來往勿使商旅通流遲不一年梟首必至若或捨此數計事或後時卽非愚臣所知亦必他日追悔臣不勝憂憤激切之至帝雖多絳之忠誠其時李逢吉王守澄中外議已定朝臣徒瀝丹懇竟不勝苟且之謀

王起穆宗時爲禮部侍郎長慶初大梁師李宓叛與兄播密上疏請以徐州王智興討之遣自贖其過帝納之果復汴州深謂其有將略焉

漢龍敏初仕後唐爲吏部侍郎敏學術不甚長然外柔而內剛愛決斷人計清泰末從末帝在懷州時趙

德濟父子有異圖晉安岩旦夕憂陷末帝計無從出問於從臣敏奏曰臣有一計請以兵援送東丹王李贊華取幽州路趨西樓虜主必有北顧之患末帝然之而不能用敏又謂末帝親將李懿曰君連姻帝戚社稷之危不俟翹足安得默默苟全耶懿因籌德濟必破蕃軍之狀敏曰僕燕人也諳趙德鈞之爲人膽小謀拙所長者守城砦嬰壕塹篤勵健兒爾若見大敵奮不顧身推堅陷陣必不能矣况名位震主姦以謀身乎僕有狂策不知濟否苟能必行亦救寨之一術也請言之曰如聞駕前馬僅五千匹請於其間選

壯馬精甲健夫千人僕願與郎萬金二人繇介休路
出山夜冒虜騎循山入大砦千騎之內得其半濟則
砦無虞矣張敬達等幽閉不知朝廷援兵近遠若知
大軍在圍相谷中有鐵障亦可為陷况虜騎乎末帝
聞之曰龍敏之心極壯用之晚矣人亦以為大言然
其慷慨感激皆此類也

册府元龜

册府元龜

巡按福建監察御史臣李嗣京 訂正

知 閩 縣 事 臣 曹鼎臣 參閱

知 建 陽 縣 事 臣 黃國琦 較釋

臺省部 二十二

簡傲 廢職 交惡 漏泄

簡傲

直而不倨蓋存乎格言傲不可長亦載諸往誠矧夫
居臺閣之任忘謙虛之美安肆自處鄙悖成風失庸
行之規虧好讓之道雖曰君子其猶病諸况在中人

胡足多者斯亦不仁者足以取禍深識者可以自戒矣

晉衛瓘爲尙書令以法御下視尙書若參佐尙書郎若椽屬和嶠爲中書令舊制監令共車入朝時荀勗爲監嶠鄙勗爲人以意氣加之每同乘高抗專車而坐乃使監令異車自嶠始也

何綏字伯蔚曾之孫劭之子也官至侍中尙書自以繼世名貴性旣輕物翰札簡傲城陽王尼見綏書疏謂人曰伯蔚居亂而矜豪乃爾豈其免乎後爲東海王越所誅

宋何承天爲尙書左丞承天性剛愎不能屈意朝右頗以所長侮同列

劉湛爲給事中與殷景仁竝被任遇湛常云今世宰相何難此正可當我南陽郡漢世功曹爾

張敷爲秘書郎嘗在省直中書令傅亮貴宿接宴聞其好學過候之敷卧不卽起亮恠而去後敷爲正員外郎中書舍人狄當周赧竝管要務以敷同省名家欲詣之赧曰彼若不相容便不如勿往詎可輕行耶當曰吾等竝已員外郎矣何憂不得共坐敷先設二牀去壁三四尺二客就席酬接甚歡旣而呼左右移

我遠客赴等失色而去其自標遇如此

王僧達孝武時爲中書令黃門侍郎路瓊之太后兄慶之孫也宅與僧達門竝嘗盛車服詣僧達僧達將獵已改服瓊之就坐僧達了不與語謂曰身昔門下騶人路慶之者是君何親遂焚瓊之所坐牀太后怒泣涕於帝曰我尚在而人凌之我死後乞食矣帝曰瓊之年少無事詣王僧達門見辱乃其宜耳僧達貴公子豈可以此加罪乎太后又謂帝曰我終不與王僧達俱生後竟坐死

梁張稷初出吳興郡以僕射徵還道繇吳鄉人候稷者滿水陸稷單裝徑還京師人莫之識其率素如此也

謝幾卿爲左丞僕射省嘗議集公卿幾卿外還宿醉未醒取枕高卧傍若無人又嘗於閣省裸袒酣飲小遺下霑令史爲南司所彈幾卿亦不介意

任孝恭爲中書通事舍人而性頗自伐以才能尚人於流輩中多有忽略世以此少之

蕭子顯爲吏部尚書性凝簡頗負其才氣及掌選見九流賓客不與交言但舉扇一撫而已衣冠竊恨之陳蔡凝爲吏部侍郎年位未高而才地爲時所重嘗

端坐西齋自非素貴名流罕所交接趣時者多議焉
後魏穆紹莊帝時爲侍中時河南尹李獎往詣紹獎
以紹郡民謂必加敬紹又恃封邑是獎國王待之不
爲動膝獎憚其位望致拜而還議者兩議焉

北齊封孝琰爲尚書左丞性頗簡傲不諧時俗意任
遇漸高彌自矜誕舉動舒遲無所降屈識者鄙之
崔陵爲光祿大夫仍領黃門郎陵預義旗頗自矜縱
崔瞻爲銀青光祿大夫性簡傲以才地自矜所與周
旋皆一時名望在御之臺嘗爲宅中送食備盡珍羞
別室獨食處之自若

後周王悅文帝初爲散騎常侍遠授大行臺尚書悅
以儀同領兵還鄉里悅久居顯職及此懷快猶陵駕
鄉里失於宗黨之情

隋柳述高祖仁壽中判吏部尚書事述雖職務脩理
爲當時所稱然不達大體暴於馭下又怙寵驕豪無
所降屈楊素時方貴倖朝臣莫不讐憚述每凌侮之
數於席前而折素短判事有不合素意素或令述改
述輒謂將命者曰語僕射道尚書不肯

王胄爲散騎嘗侍性疎率不倫恃才自伐鬱鬱於薄
宦每負氣陵傲忽略時人爲諸葛穎所嫉屢譖之於

場帝

崔儵為員外散騎侍郎越國公楊素時方貴倖重儵
 門地為子玄縱娶其女為妻聘禮甚厚親迎之始公
 卿滿座素令騎迎儵儵故弊其衣冠騎驢而至素推
 令上座儵有輕素之色禮甚倨言又不遜素忿然拂
 衣而起竟罷坐

唐顏師古為中書侍郎性簡峭罕所推接視同儕蔑
 如也人亦以是少之

韋陟中書令安石之子玄宗天寶初為吏部侍郎自
 以門地才業坐取三公嘗以簡貴自處當時朝貴視
 之蔑如也

崔元翰為職方員外郎知制誥性剛偏簡傲不能取
 容於時嘗頗忤執政故掌制誥二年而官不遷罷職
 王仲舒為中書舍人初仲舒與楊憑穆質許孟容李
 鄴為友故時人稱楊穆許李之友仲舒以後進慕賢
 而入性尚簡傲不能接下以此人多怨之

鄭仁表文宗朝宰相肅孫也為起居郎文筆尤稱俊
 拔然恃才傲物人士薄之

後唐陳乂為中書舍人微有才術嘗自恃其能及居
 西掖而姿態愈倨位竟不至公卿蓋器度促狹者也

廢職

詩有素殮之刺書垂沉湎之戒斯皆棄命廢職之謂也乃有居紳紱之列踐臺省之任或性識庸昧或材用迂闊或雅有嗜好或素多疾疹繇是忘在公之節忽盡瘁之義宴安自得弛慢無媿遂使曹事曠闕官方沸騰冒有司之抨彈罹邦家之典憲則知龜王之毀咎將誰執當塗而下咸用論次者焉

魏李豐爲侍中僕射在臺閣多託疾制滿百日當解祿豐未滿百日蹶起已而復臥如是數歲

山弼爲尚書郎在臺旣淺事功亦雅非所長益不留意焉

晉牽秀爲尚書秀少在京輦見司隸劉毅奏事而扼腕慷慨自謂居司直之任當能激濁揚清處鼓鞞之間必建將帥之勲及在嘗伯納言亦未曾有規獻弼違之奇也

宋王敬弘爲尚書僕射闕署文按初不省讀嘗豫聽訟文帝問以疑獄敬弘不對帝變色問左右何故不以訊牒副僕射敬弘曰臣乃得訊牒讀之正自不解帝甚不悅

王球爲尚書僕射素有脚疾錄尚書江夏王義恭謂

尚書何尚之曰當今乏才群下宜加戮力而王球放恣如此恐宜以法糾之尚之曰球有素尚加又多疾應以淡退求之未可以文案責也猶坐白衣領職何承天爲御史中丞承天素好奕棊頗用廢事文帝賜以局子承天奉表陳謝帝答曰局子之賜何必非張武之金耶

殷嘗爲度支尚書坐屬父道矜疾及身疾多爲有司所奏明帝詔曰殷道矜生更有病更無橫病嘗因愚習隋父妨清叙左遷散騎嘗侍

何尚之爲尚書令時徐湛之轉尚書僕射尚之以湛之國戚任遇隆重欲以朝政推之凡諸辭訴一不科省湛之亦以職官記及令文尚書令敷奏出納事無不總令缺僕射任總又以事歸尚之互相推委御史中丞袁淑奏竝免官詔曰令僕治務所寄不輕將求體當而互相推委糾之是也然故事殘舛所以致茲疑執特無所問時詳正之乃使湛之與尚之竝受辭訴尚之雖爲令而以朝事悉歸湛之

南齊王綸之爲侍中世祖幸瑯琊城綸之與光祿大夫王景文等二十一人坐不參承爲有司所奏詔綸之親爲陪侍之職而同外情慢免官景文等贖論

張緒爲尚書倉部郎都令史諮詳郡縣米事緒蕭然直視不以經懷

梁謝幾卿爲尚書三公侍郎尋爲治書侍御史舊郎官轉爲此職者世謂之南奔幾卿頗失志多陳疾臺事略不復理徙爲散騎侍郎

陳到仲舉爲左僕射參掌選事仲舉旣無學術朝章非其所長選舉引用出自表樞性疎簡不干時務與朝市無所親狎但聚財酣飲而已

後魏陸昶爲光祿大夫昶無他才能唯飲酒爲事

張普惠爲諫議大夫初任城王澄嘉賞普惠臨死啓爲尚書右丞靈太后旣深悼澄覽啓從之詔行之後尚書諸郎以普惠地寒不應便居管轄相與爲約竝欲不復上省紛紜多日乃息

北齊崔瞻爲給事黃門侍郎瞻患氣兼性遲重雖居二省竟不堪敷奏

杜臺卿爲中書黃門侍郎兼尚書左丞省中以其耳聾多戲弄之下辭不得理者乃至大罵臺卿見其口勤謂爲自陳令史又故不曉喻謝對往往乖越聽者以爲嗤笑

王普明爲尚書右僕射百餘日便謝病而退告人曰

廢人飲酒安能作刀筆吏披故紙乎

隋柳機高祖開皇初自華州刺史徵為納言機性寬簡有雅望然當近侍無所損益又好飲酒不親細務柳詵為內史侍郎以無吏幹去職

唐韋巨源則天時歷文昌左右丞遷納言為政委碎不達大體

王昂代宗時為刑部尚書專事奢靡廣修第宅多畜妓妾以逞其志在刑部雖公務有程昂耽徇私宴連日不視曹事

李藩憲宗元和初為吏部郎中掌曹事為吏所蔽濫用官闕黜為著作郎

李元素為御史大夫居位一無修舉大失人情

周楊昭儉太祖廣順初為中書舍人多在假告少親職司勅令解官俾遂私便

蕭愿為兵部郎中性嗜酒無節職事弛慢既掌告身即覃恩之次頗怠職司父頃為吏部尚書代愿視印篆其散率如此

交惡

臺省之職古今所重莫不妙選英俊以居其任若乃官聯相接出處攸同至有怙寵恃權專斷任氣迤相

裁抑互構短長繇是至於誼譁盈於糾奏或遯免以避禍或誅殺以逞憾斯乃軒冕之醜行簡冊之所譏至有比周之徒引繩連根懷背公死黨之信造罔上附下之憊是故竝牒比名連曹分置者得不接其邪僞指其憊罪雖謂之交惡誠可懲也史稱忠臣不和不臣不忠良有以焉

漢袁盎爲中大夫素不好御史大夫鼂錯錯所居坐盎輒避盎所居坐錯亦避兩人未嘗同堂語孝景卽位錯使吏案盎受吳王財物抵辜詔赦以爲庶人晉任愷爲侍中時賈充爲尚書令愷惡充之爲人也

不欲令久執朝政每裁抑焉充病之不知所爲後承間言愷忠貞局正宜在東宮使護太子武帝從之以爲太子少傅而侍中如故充計畫不行會秦雍寇擾天子以爲憂愷因曰秦涼覆敗關右騷動此誠國家之所深慮宜速鎮撫使人心有庇自非威望重臣有計略者無以康西土也帝曰誰可任者愷曰賈充其人也中書令庾純亦言之於是詔充西鎮長安傳玄爲侍中進皇甫陶及入而抵玄以事與陶爭言誼譁爲有司所奏二人竟坐免官

謝石爲散騎嘗侍以公事與吏部郎王恭互相短長

恭甚忿恨自陳褊阨不允且疾源深固乞還私門石亦上疏遜位有司奏石輒去職免官武帝詔喻令還歲餘不起表十餘上帝不許

宋何承天文帝時爲御史中丞與尚書左丞謝元素不相善二人競伺二臺之違累相糺奏太尉江夏王義恭戚給資費錢三千萬布五萬匹米七萬斛義恭素奢侈用嘗不充元嘉二十一年途就尚書換明年資費而舊制出錢二十萬布五百匹以上並應奏聞元輒命議以錢二百萬給太尉事發覺元乃使令史取僕射孟顛命元時新除太尉諮議參軍未拜爲承

天所糾帝大怒遣元長歸田里禁錮終身元時又舉承天賣菱四百七十束與官屬求貴價承天坐白衣預職

蕭惠開孝武初爲黃門侍郎與侍中何偃爭權任遇甚隆惠開不爲之屈偃怒使門下推彈之惠開乃上表解職曰陛下未炤臣愚故引參近侍臣以執事非長故委何偃凡諸當否不敢參議竊見積射將軍徐冲之爲偃命所黜臣愚懷謂有可申故聊設微異偃恃恩使貴欲使人靡二情使呵脅主者手定文案割落臣議專載已辭雖天炤廣臨竟未見察臣理違顏

咫尺致茲壅濫則臣之受劾蓋何足悲但不順侍中臣有其咎當而無之不知何過且議之不允未有彈科省心予揆天知在宥臣不能謝譬右職改意重臣刺骨鑠金將在朝夕乞解所忝保拙私庭時優寵方隆繇此忤旨別勅免惠開官

南齊張岱字景山宋末爲吏部時王儉爲吏部侍郎專斷曹事岱每相違執及儉爲宰相以此頗不相善虞玩之爲黃門郎以年老致政玩之於人物好臧否宋末王儉舉員外郎孔逸使魏玩之言論不相饒邊儉並恨之及玩之東歸儉不出送朝廷無祖餞者其後員外郎孔誼就儉求會稽五官儉方盥投皂莢於地曰卿鄉俗惡虞玩之至死煩人

梁張纘武帝時爲尚書僕射初與叅掌何敬容意趣不協敬容居權軸賓客輻湊有過詣纘纘輒拒不前曰吾不能對何敬容殘客及是遷爲讓表曰自守股肱入居衡尺可以仰首伸眉論列是非者矣而寸衿所滯近蔽耳目深淺清濁豈有能預加以矯心飾貌酷非所閑不喜俗人與之共事此言以指敬容也後魏李順爲中書侍郎太武始光初順從征蠕蠕以籌略之功爲後軍將軍太武將討赫連昌謂侍中崔

浩曰朕前北征李順獻策數事實合經略大謀今欲使總攝前驅之事卿以爲何如浩對曰順智足周務實如聖旨但臣與之姻婚深知其行然性果於去就不可專委太武乃止初浩弟取順妹又以弟子娶順女雖二門婚媾而浩頗輕順順又弗之伏也錄是潛相猜忌故浩毀之順又從擊赫連定於平涼三秦平遷順爲四部尚書甚見寵待時沮渠蒙遜以河西內附太武欲簡行人崔浩先與順有隙浩曰蒙遜稱藩款著河右俾遐域流通殊荒畢至宜令清德重臣奉詔褒慰尚書順卽其人也太武曰順納言大臣不宜方爲此使若蒙遜身執玉帛而朝於朕復何以加之浩曰邢貞使吳亦魏之太常苟事是宜無嫌於重爾日之行豈吳王入覲也太武從之以順爲太嘗策拜蒙遜爲太傅涼王後順使於涼州而沮渠蒙遜數與順游宴頗有悖慢之言恐順東還洩之以金寶納順懷中故蒙遜罪不聞崔浩知之密言於太武太武畜怒後以事殺之及浩之誅太武怒甚謂孝伯曰卿從兄往雖誤國朕意亦未便至此錄浩譖毀朕忿遂殺卿從兄者浩也

李坤孝文時爲尚書僕射李彪之入京也孤微寡援

而自立不羣以冲好士傾心宗附冲亦重其器學禮而納焉每言之於帝公私共相援益及彪爲中尉兼尚書爲帝知待便謂非復藉冲而更相輕背唯公坐歛袂而已無復敬宗之意也冲頗銜之後帝南征冲與吏部尚書任城王澄並以彪倨傲無禮遂禁止之奏其罪狀冲手自作家人不知辭甚激切因以自劾帝覽其表歎悵者久之旣而曰道固可謂溢也

李彪字道

固僕射亦爲滿矣冲時震怒數數責彪前後愆悖瞋目大呼投折几案盡收御史皆泥首面縛詈辱肆口冲素温性柔而一旦暴患遂發病忿悖言語亂錯猶

扼腕叫罵稱李彪小人醫藥所不能療或謂肝臟傷裂旬有餘日而卒

宋弁爲黃門侍郎始孝文北都之選也尚書李冲多所參預頗抑弁弁有恨於冲而與僕射李彪交結雅相知重及彪之抗冲冲謂彪曰爾如狗爾爲人所嗾及冲劾彪不至大罪者弁之力也彪除名爲民韋伯昕爲員外散騎嘗侍自以才智優於尚書裴植嘗輕之植疾之如讐

山偉爲中書令外示沈厚內實矯競與左光祿大夫綦雋少甚相得晚以名位之間遂若水火

北齊孫騰爲侍中時京兆王愉女平原公主寡居騰尚之公主不許侍中封隆之無婦公主欲之騰妬隆之遂相間構高祖啓免騰官請除外任

後周楊寬爲御正中大夫性通敏有器識然與司會中大夫柳慶不協及寬參知政事慶遂見疎忌出爲萬州刺史

隋柳述高祖仁壽中判吏部尚書事雖職務脩理爲當時所稱然不達大體暴於馭下又怙寵驕豪無所降屈僕射楊素時稱貴倖朝臣莫不讐俾述每陵侮之數於帝前面折素知判事有不合素意或令述改之述輒謂將命者曰語僕射道尚書不肯素繇是銜之

唐劉文靜太宗貞觀中爲戶部尚書自以才能幹用左僕射裴寂之右又屢有軍功而位居寂之下嘗怏怏身多在外老母在京無屋居益以不平又素輕寂爲人讖相侵侮每庭議多相違戾寂有所是文靜必非之二人繇是有隙文靜性嗜酒與其弟文起酣飲出惡言拔刀擊柱曰會當斬裴寂頭爾

李麟爲兵部侍郎時楊國忠亦爲兵部侍郎欲專權不悅麟同列宰相奏麟以本官權知禮部貢舉俄而

國忠爲御史麟復兵部

楊慎矜爲御史中丞時帝堅得罪慎矜及侍御史王
鏊按其事鏊訶堅慎矜引身中立鏊恨之初慎矜
嘗與鏊爭職田背詈鏊詆其母氏鏊不堪其辱

班宏爲戶部尚書副竇參初爲大理司直時宏已爲
刑部侍郎及參爲相領度支使帝以宏久司國計因
令爲副且謂班宏曰朕以竇參爲使藉其宰相以臨
遠方衆務悉委卿勿爲辭也參以宏先貴嘗解悅之
私謂宏曰參後來一朝居尚書右甚不自安一年之
後當歸使於公宏心喜歲餘參不復言宏性剛愎爲

人間之且怒參食言於公事多與參異揚子院鹽鐵
轉運之委翰也宏以御史中丞徐粲主之頗不理又
以賄聞參欲代之宏執不可參又選諸知院者未嘗
與宏議宏知之密疏參所用者過惡而奏事輒留中
繇是與參有隙無何參以使勞加吏部尚書宏進封
蕭國公怒參愈甚每奉詔有所營建宏必極壯麗親
程課役又厚結權幸以傾參又張滂先善於宏宏薦
爲司農少卿及參欲以滂分掌江淮鹽鐵問於宏宏
以滂疾惡慮以法繩除粲因毀滂曰滂強戾難制不
可用滂知爲宏毀深銜之參知爲帝所疎懼問罪乃

讓度支使遂以宏專判度支參不欲使務悉歸於宏
 問於京兆尹薛珽珽曰張滂與宏交惡滂剛決若分
 鹽鐵轉運於滂必能制宏參乃薦滂為戶部侍郎鹽
 鐵使判轉運宏以權有所分又惡滂同事聞命氣沮
 久之滂至楊州乃窮徐粲逮僕妾子姓得贓巨萬粲
 徙嶺表故參得罪宏頗有力焉

漏洩

易曰臣不密則失身機事不密則害成所以孔光温
 樹之不言羊祜奏蒙之斯毀蓋慎密之至也其有位
 居臺閣職備論思忘率履於恪恭輕訓戒於競畏預

參機事既不慎於三緘漏洩王言徒有違於千里禍
 不旋踵何可勝言

漢夏侯勝宣帝時為諫議大夫給事中嘗見出道上

語人見天子而以其言為外人道之上聞而讓勝讓責也勝曰陛下所

言善臣故揚之堯言布於天下至今見誦臣以為可
 傳故傳爾

陳咸元帝時為御史中丞總領州郡奏事課第諸刺
 史內執法殿中公卿以下皆敬憚之是時弘恭死石
 顯代為中書令用事顯權咸頗言顯短顯等恨之時
 槐里令朱雲殘酷殺不辜有司舉奏未下天子未下其章也

咸素善雲雲從刺候教令上書自訟雲從咸刺探何候事之輕重咸

因交令上書於是石顯微伺知之白奏咸漏洩省中語下

獄掠治掠咎擊也音力向反減死髡為城旦因廢

京房元帝時為郎上中郎任良姚平願以為刺史試

考功法時淮陽憲王舅張博從房受學以女妻房房

與相親每朝見輒為博道其語所與天子言皆其說之也以上意

意欲用房議而羣臣惡其害已故為眾所排博具從

房記諸所說災異事因令房為莊陽王作求朝奏草

皆持東與淮陽王中書令石顯微司具知之以房親

近不敢言及房出守郡顯告房與張博通謀誹謗政

治歸惡天子誤誣諸侯王竟徵下獄房博皆棄市

晉郗弘為尚書左丞坐洩事免

宋何承天為御史中丞遷廷尉未拜文帝欲以為吏

部郎已受密旨承天宣漏之坐免官

羊希為尚書左丞益州刺史劉瑀先為右衛將軍與

府司馬何季穆共事不平季穆為尚書令建平王宏

所親待屢毀瑀於宏會瑀出為益州奪土人妻為妾

宏使希彈之瑀坐免官瑀恨希切齒有門生謝元伯

往來希間瑀令訪訊被免之繇希曰此奏非我意瑀

即日來希間瑀令訪訊被免之繇希曰此奏非我意瑀

即日來希間瑀令訪訊被免之繇希曰此奏非我意瑀

即日來希間瑀令訪訊被免之繇希曰此奏非我意瑀

梁何敬容爲尚書令參掌大選多漏禁中語因此嘲
誚日至

陳陸琛後主時爲給事黃門侍郎中書舍人參掌機
密琛性頗疎坐漏洩禁中語詔賜死

東魏常鴻爲中書舍人天平三年坐洩漏賜死於家
畢義亮性豪疎爲中書舍人天平中與舍人常鴻坐
洩密賜盡於宅

隋盧思道初仕北齊爲散騎嘗侍直中書省以漏洩
省中語出爲丞相西閤祭酒

元敏煬帝大業末爲內史舍人而交通博徒數洩省

中語

唐王珪太宗貞觀中爲侍中坐漏洩禁中語左遷爲
同州刺史

杜正隆貞觀中爲中書侍郎皇太子承乾先有足疾
魏王泰有文才共獲當時之譽其後太宗頗知承乾
奢縱嘗與正倫言承乾不可承宗廟之意兼又稱魏
王泰之美正倫嘗爲左庶子後雖徙職而承乾嘗遣
給事使於正倫覘候帝言正倫遂以太宗言告承乾
勸其遷善以自固承乾旣聞太宗詔欲廢之乃佯不
信正倫遂奏其言實欲令太宗有所慙也太宗大怒

正倫坐漏洩禁中書除名徙邊

李乾祐為司刑太嘗伯嘗舉雍州司功崔擢為尚書

郎事既不果私以告擢其後擢有犯遂告乾祐洩禁

中語以贖罪乾祐坐免立於九成朝堂之間凍中洩

卒

杜景佺則天時為秋官尚書坐漏洩禁語左授司刑

少卿出為并州長史道病卒

張宿憲宗元和中居諫列以舊恩數召對禁中機事

不密貶郴州郴縣丞

冊府元龜

冊府元龜

巡按福建監察御史臣李嗣京 訂正

知甌寧縣事 臣孫以敬 參閱

知建陽縣事 臣黃國琦 較釋

臺省部 一二十一

奸邪

仲尼有言曰巧言令色鮮矣仁又曰鄉原德之賊也

斯奸邪之謂歟漢氏而下庶官增益臺職竝建省署

交屬乃有因緣會遇濫竊名器而便僻其性險詖其

行外剛內荏諱張詭隨徇其媚竈之說希其枉尋之

利繇是戕害時彥阿順君旨畫陰狡之策圖取乎權位崇矯飾之迹張大其名稱忌前而固寵結黨以附炎佞言似忠同惡相濟極其傾巧之態副其浮動之志眩惑左右靡可防遏敗類蠹政莫斯爲甚古人所以比於蝨賊喻於穿窬之盜者蓋有以也

後漢陳忠安帝時爲尚書令忠旣不得志于鄧氏及鄧騭等敗衆庶多怨之而忠數上疏陷成其惡遂詆劾大司農朱寵順帝之爲太子廢也諸名臣來歷祝諷等守闕固爭時忠與諸尚書復共劾奏之及帝立司隸校尉虞詡追奏忠等罪當世以此譏之

賈朗順帝時爲尚書會司隸校尉虞詡自繫廷尉奏言中常侍張防罪惡坐論輸左掖二日之中傳考四獄宦者孫程張賢相率言詡盡忠而防賊罪明正帝問諸尚書朗素與防善證詡之罪帝疑焉謂程曰且出吾方思之於是詡子顛與門生百餘人舉幡候中常侍高梵車叩頭流血訴言枉狀梵乃入言之防坐徙邊賈朗等六人或死或黜

任芝靈帝時爲侍中帝欲造畢圭零琨苑司徒楊賜上疏諫帝以問任芝及中常侍樂松松等曰昔文王之囿百里人以爲小齊宣五十里人以爲大今與百

姓其之無害於政也帝悅遂令築苑

魏丁廙太祖時爲黃門侍郎廙常從容謂太祖曰臨
菑侯天性仁孝發於自然而聰明智達其殆庶幾至
於博學淵識文章絕倫當今天下之賢才君子不問
少長皆願從其游而爲之死實天下所以鍾福於大
魏而永授無窮之祚也欲以勸動太祖太祖答曰植
吾愛之安能若卿言吾欲立之爲嗣何如廙曰此國
家之所以興衰天下之所以存亡非愚劣瑣賤者所
敢與及廙聞知臣莫若於君知子莫若於父至於君
不論明闇父不問賢愚而能常知其臣子者何蓋由

相知非一事一物相盡非一旦一夕况明公加之以
聖哲習之以人子今發明達之命吐永安之言可謂
上應天命下合人心得之於須臾垂之於萬世者也
廙不避斧鉞之誅敢不盡言太祖深納之及文帝卽
王位誅廙

劉曄明帝時爲侍中大見親重帝將伐蜀朝臣內外
皆曰不可伐入與帝議因曰可伐出與朝臣言因曰
不可伐曄有膽智言之皆有形中領軍楊暨帝之親
臣又重曄持不可伐蜀之議最堅每從內出輒過曄
曄講不可之意後暨從駕行天淵池帝論伐蜀事暨

切諫帝曰卿書生焉知兵事暨謙謝曰臣出自儒生之末陛下過聽拔臣群萃之中立之六軍之上臣有微心不敢不盡言臣言誠不足采侍中劉曄先帝謀臣嘗曰蜀不可伐帝曰曄與吾言蜀可伐暨曰曄可召質也詔召曄至帝問曄終不言後獨見曄責帝曰伐國大謀也臣得與聞大謀嘗恐昧夢漏泄以益臣罪焉敢向人言之夫兵詭道也軍事未發不厭其密也陛下顯然露之臣恐敵國已聞之矣於是帝謝之曄見出責暨曰夫釣者中大魚則縱而隨之須可制而後牽則無不得也人主之威豈徒大魚而已子誠

直臣然計不足采不可不精思也暨亦謝之曄能應變持兩端如此或惡曄於帝曰曄不盡忠善伺上意所趨而合之陛下試與曄言皆反意而問之若皆與所問反者是曄嘗與聖意合也復每問皆同者曄之情必無所復逃矣帝如言以驗之果得其情從此疏焉曄遂發狂出爲大鴻臚以憂死

孫資明帝時爲中書令與中書監劉放久專權寵景初二年帝疾篤以燕王宇爲大將軍使與領軍將軍夏侯獻武衛將軍曹爽屯騎較尉曹肇驍騎將軍秦朗等對輔政資放素與朗等不善懼有後害陰圖間

之而宇嘗在帝側故未得有言及帝氣微宇下殿呼
 曹肇有所議未還而帝少間惟曹爽獨在放知之呼
 資與謀資曰不可動也放曰俱入鼎鑊何不可之有
 乃突前見帝垂泣曰陛下氣微若有不諱將以天下
 付誰帝曰卿不聞用燕王邪放曰陛下忘先帝詔勅
 藩王不得輔政且陛下病而曹肇秦朗等便與才
 人侍疾者言戲燕王擁兵南面不聽臣等入此卽豎
 刀趙高也今皇太子幼弱未能統政外有強暴之寇
 內有勞怨之民陛下不遠慮存亡而近係恩舊委祖
 考之業付二三凡士寢疾數日外內擁隔社稷危殆

而已不知此臣等所以痛心也帝得放言大怒曰誰
 可任者放資乃舉爽代宇又曰宜詔司馬宣王使相
 參帝從之放資出曹肇入泣涕固諫帝使肇勅停肇
 出戶放資趨而往復說止帝帝又從其言放曰宜爲
 手詔帝曰我困篤不能放卽上牀執帝手強作之遂
 齊出大言曰有詔免燕王宇等官不得停省中於是
 宇肇獻朗相與泣而歸第

晉賈充武帝時爲中書令侍中從容任職褒貶在已
 頗好進士每有所薦達必終始經緯之是以士多歸
 焉帝舅王恂嘗毀充而充更進恂或有背充以要權

奸邪一
卷之四百七十九

貴者充皆陽以素意待之

荀勗為侍中中書監久管機密有才思探得人主微
意不犯顏廷爭故得始終全其寵祿初與賈充朋黨
及充將鎮關右也勗謂馮統曰賈公遠放吾等失勢
太子婚尚未定若使充女得為妃則不留而自停矣
勗與統伺帝間竝稱充女才色絕世若納東宮必能
輔佐君子有關睢后妃之德遂成婚武帝以太子闇
弱恐後亂國遣勗及和嶠往觀之勗還盛稱太子之
德而嶠云太子如初於是天下貴嶠而賤勗帝將廢
賈妃勗與馮統等諫請故得不廢時議以勗傾國害

時孫資劉放之匹也

馮統為侍中武帝病篤得愈統與荀勗見朝野之望
屬在齊王攸攸素薄勗勗以太子愚劣恐攸得立有
害於已乃使統言於帝曰陛下前者疾若不差太子
其廢矣齊王為百姓所歸公卿所仰雖欲高讓其得
免乎宜遣還藩以安社稷帝納之及攸薨朝野悲恨
初帝友于之情甚篤旣納統勗邪說遂為身後之慮
以固儲位旣聞攸殞哀慟特深統侍立因言曰齊王
名過於實今得自終此乃大晉之福陛下何乃過哀

帝乃收淚而止

一說武帝晚年諸子並弱而太子不
令朝臣內外皆屬意於攸中書監荀

勗侍中馮純皆諂諛自進攸素疾之勗等以朝望在攸恐其爲嗣害必及已乃從容言於帝曰陛下萬歲之後太子不得立也帝曰何故勗曰百僚內外皆歸心於齊王太子焉得立乎陛下試詔齊王之國必舉朝以爲不可則臣言有徵矣統又言曰陛下遣諸侯之國成五等之制者宜先從親始親莫齊王帝信納之

王國寶從妹爲會稽王道子妃孝武帝時道子輔政國寶入補侍中遷中書令中領軍與道子持威權扇動內外中書郎范甯國寶舅也儒雅方直疾其阿諛勸帝黜之國寶乃使陳郡袁悅之因尼支妙音致書與太子母陳淑媛說國寶忠謹宜見親信帝知之託以他罪殺悅之國寶大懼遂因道子譖毀甯甯繇是

出爲豫章太守及弟忱卒國寶自表求解職迎母并奔忱喪詔特賜假而盤桓不時進發爲御史中丞褚粲所奏國寶懼罪衣女子衣託爲王家婢詣道子告其事道子言之於帝故得原繇是愈驕蹇不遵法度起齋侷清暑殿帝惡其僭侈國寶遂諂媚於帝而頗疎道子道子大怒嘗於內省面責國寶以劍擲之舊好盡矣是時王雅亦有寵薦王恂於帝帝夜與國寶及雅宴帝微有酒令召恂將至國寶自知才出珣下恐至傾其寵因曰王恂當今名流不可以酒色見帝遂止也

九月元事 漏洩 卷之四百七

正倫坐漏洩禁中書除名徙邊

李乾祐為司刑太嘗伯嘗舉雍州司功崔擢為尚書郎事既不果私以告擢其後擢有犯遂告乾祐洩禁中語以贖罪乾祐坐免立於九成朝堂之間洩中洩卒

杜景佺則天時為秋官尚書坐漏洩禁語左授司刑少卿出為并州長史道病卒

張宿憲宗元和中居諫列以舊恩數召對禁中機事不密貶郴州郴縣丞

册府元龜

册府元龜

巡按福建監察御史臣李嗣京 訂正

知甌寧縣事 臣孫以敬 叅閱

知建陽縣事 臣黃國琦 較釋

臺省部 二十二

奸邪

仲尼有言曰巧言令色鮮矣仁又曰鄉原德之賊也斯奸邪之謂歟漢氏而下庶官增益臺職竝建省署交屬乃有因緣會遇濫竊名器而便僻其性險詖其行外剛內荏譸張詭隨徇其媚竈之說希其枉尋之

册府元龜 臺省部 卷之四百七

利繇是戕害時彥阿順君旨畫陰狡之策圖取乎權位崇矯飾之迹張大其名稱忌前而固寵結黨以附炎佞言似忠同惡相濟極其傾巧之態副其浮動之志眩惑左右靡可防遏敗顛蠹政莫斯爲甚古人所以比於蝨賊喻於穿窬之盜者蓋有以也

後漢陳忠安帝時爲尚書令忠旣不得志于鄧氏及鄧騭等敗衆庶多怨之而忠數上疏陷成其惡遂詆劾大司農朱寵順帝之爲太子廢也諸名臣來歷祝諷等守闕固爭時忠與諸尚書復共劾奏之及帝立司隸校尉虞詡追奏忠等罪當世以此譏之

賈朗順帝時爲尚書會司隸校尉虞詡自繫廷尉奏言中常侍張防罪惡坐論輸左掖二日之中傳考四獄宦者孫程張賢相率言詡盡忠而防贓罪明正帝問諸尚書朗素與防善證詡之罪帝疑焉謂程曰且出吾方思之於是詡子顛與門生百餘人舉幡候中常侍高梵車叩頭流血訴言枉狀梵乃入言之防坐徙邊賈朗等六人或死或黜

任芝靈帝時爲侍中帝欲造畢圭零琨苑司徒楊賜上疏諫帝以問任芝及中常侍樂松松等曰昔文王之囿百里人以爲小齊宣五十里人以爲大今與百

姓其之無害於政也帝悅遂令築苑

魏丁廙太祖時爲黃門侍郎廙常從容謂太祖曰臨
菑侯天性仁孝發於自然而聰明智達其殆庶幾至
於博學淵識文章絕倫當今天下之賢才君子不問
少長皆願從其游而爲之死實天下所以鍾福於大
魏而永授無窮之祚也欲以勸動太祖太祖答曰植
吾愛之安能若卿言吾欲立之爲嗣何如廙曰此國
家之所以興衰天下之所以存亡非愚劣瑣賤者所
敢與及廙聞知臣莫若於君知子莫若於父至於君
不論明闇父不問賢愚而能常知其臣子者何蓋由

相知非一事一物相盡非一旦一夕况明公加之以
聖哲習之以人子今發明達之命吐永安之言可謂
上應天命下合人心得之於須臾垂之於萬世者也
廙不避斧鉞之誅敢不盡言太祖深納之及文帝卽
王位誅廙

劉曄明帝時爲侍中大見親重帝將伐蜀朝臣內外
皆曰不可伐入與帝議因曰可伐出與朝臣言因曰
不可伐曄有膽智言之皆有形中領軍楊暨帝之親
臣又重曄持不可伐蜀之議最堅每從內出輒過曄
曄講不可之意後暨從駕行天淵池帝論伐蜀事暨

切諫帝曰卿書生焉知兵事暨謙謝曰臣出自儒生之末陛下過聽拔臣群萃之中立之六軍之上臣有微心不敢不盡言臣言誠不足采侍中劉曄先帝謀臣嘗曰蜀不可伐帝曰曄與吾言蜀可伐暨曰曄可召質也詔召曄至帝問曄終不言後獨見曄責帝曰伐國大謀也臣得與聞大謀嘗恐昧夢漏泄以益臣罪焉敢向人言之夫兵詭道也軍事未發不厭其密也陛下顯然露之臣恐敵國已聞之矣於是帝謝之曄見出責暨曰夫釣者中大魚則縱而隨之須可制而後牽則無不得也人主之威豈徒大魚而已子誠

直臣然計不足采不可不精思也暨亦謝之曄能應變持兩端如此或惡曄於帝曰曄不盡忠善伺上意所趨而合之陛下試與曄言皆反意而問之若皆與所問反者是曄嘗與聖意合也復每問皆同者曄之情必無所復逃矣帝如言以驗之果得其情從此疏焉曄遂發狂出爲大鴻臚以憂死

孫資明帝時爲中書令與中書監劉放父專權寵景初二年帝疾篤以燕王宇爲大將軍使與領軍將軍夏侯獻武衛將軍曹爽屯騎較尉曹肇驍騎將軍秦朗等對輔政資放素與朗等不善懼有後害陰圖間

之而宇嘗在帝側故未得有言及帝氣微宇下殿呼曹肇有所議未還而帝少間惟曹爽獨在放知之呼資與謀資曰不可動也放曰俱入鼎鑊何不可之有乃突前見帝垂泣曰陛下氣微若有不諱將以天下付誰帝曰卿不聞用燕王邪放曰陛下忘先帝詔勅藩王不得輔政且陛下方病而曹肇秦朗等便與才人侍疾者言戲燕王擁兵南面不聽臣等入此卽豎刃趙高也今皇太子幼弱未能統政外有強暴之寇內有勞怨之民陛下不遠慮存亡而近係恩舊委祖考之業付二三凡士寢疾數日外內擁隔社稷危殆

而已不知此臣等所以痛心也帝得放言大怒曰誰可任者放資乃舉爽代宇又曰宜詔司馬宣王使相參帝從之放資出曹肇入泣涕固諫帝使肇勅停肇出戶放資趨而往復說止帝帝又從其言放曰宜爲手詔帝曰我困篤不能放卽上牀執帝手強作之遂齊出大言曰有詔免燕王宇等官不得停省中於是宇肇獻朗相與泣而歸第

晉賈充武帝時爲中書令侍中從容任職褒貶在已頗好進士每有所薦達必終始經緯之是以士多歸焉帝舅王恂嘗毀充而充更進恂或有背充以要權

貴者充皆陽以素意待之

荀勗爲侍中中書監久管機密有才思探得人主微
意不犯顏廷爭故得始終全其寵祿初與賈充朋黨
及充將鎮關右也勗謂馮統曰賈公遠放吾等失勢
太子婚尚未定若使充女得爲妃則不留而自停矣
勗與統伺帝間竝稱充女才色絕世若納東宮必能
輔佐君子有關雎后妃之德遂成婚武帝以太子闇
弱恐後亂國遣勗及和嶠往觀之勗還盛稱太子之
德而嶠云太子如初於是天下貴嶠而賤勗帝將廢
賈妃勗與馮統等諫請故得不廢時議以勗傾國害

時孫資劉放之匹也

馮統爲侍中武帝病篤得愈統與荀勗見朝野之望
屬在齊王攸攸素薄勗勗以太子愚劣恐攸得立有
害於已乃使統言於帝曰陛下前者疾若不差太子
其廢矣齊王爲百姓所歸公卿所仰雖欲高讓其得
免乎宜遣還藩以安社稷帝納之及攸薨朝野悲恨
初帝友于之情甚篤旣納統勗邪說遂爲身後之慮
以固儲位旣聞攸殞哀慟特深統侍立因言曰齊王
名過於實今得自終此乃大晉之福陛下何乃過哀
帝乃收淚而止

一說武帝晚年諸子並弱而太子不
令朝臣內外皆屬意於攸中書監荀

勗侍中馮純皆諂諛自進攸素疾之勗等以朝望在
 攸恐其為嗣害必及已乃從容言於帝曰陛下萬歲
 之後太子不得立也帝曰何故勗曰百僚內外皆歸
 心於齊王太子焉得立乎陛下試詔齊王之國必舉
 朝以為不可則臣言有徵矣統又言曰陛下遣諸侯
 之國成五等之制者宜先從親始親莫齊王帝信納
 之

王國寶從妹為會稽王道子妃孝武帝時道子輔政
 國寶入補侍中遷中書令中領軍與道子持威權扇
 動內外中書郎范甯國寶舅也儒雅方直疾其阿諛
 勸帝黜之國寶乃使陳郡袁悅之因尼支妙音致書
 與太子母陳淑媛說國寶忠謹宜見親信帝知之託
 以他罪殺悅之國寶大懼遂因道子譖毀甯甯繇是

出為豫章太守及弟忱卒國寶自表求解職迎母并
 奔忱喪詔特賜假而盤桓不時進發為御史中丞褚
 粲所奏國寶懼罪衣女子衣託為王家婢詣道子告
 其事道子言之於帝故得原繇是愈驕蹇不遵法度
 起齋侷清暑殿帝惡其僭侈國寶遂諂媚於帝而頗
 疎道子道子大怒嘗於內省面責國寶以劍擲之舊
 好盡矣是時王雅亦有寵薦王恂於帝帝夜與國寶
 及雅宴帝微有酒令召恂將至國寶自知才出珣下
 恐至傾其寵因曰王恂當今名流不可以酒色見帝
 遂止也

宋王僧綽文帝末爲侍中元凶劼弒立使蕭斌作詔改元太初斌辭以不文乃使僧綽爲之太初之號劼素所定斌曰舊踰年改元劼以問僧綽僧綽曰晉惠帝卽位便改劼喜從之後劼簡文帝巾箱中得僧綽所啓劼過惡遂遇害

何偃文帝末爲侍中掌詔誥時元凶弒立偃父尚之爲司空尚書令偃居門下父子竝處權要時爲寒心而尚之及偃善攝機宜曲得時譽會世祖卽位任遇無改

張克後廢帝時爲正員外以簡行見寵因坐廢錮

南齊江謚初仕宋明帝爲右丞兼北部郎及太祖領南兖州謚爲鎮軍長史廣陵太守入爲游擊將軍性洽流俗善趨時利後廢帝元徽末朝野咸屬意建平王景素謚深自委結景素事敗僅得免禍蒼梧王廢後物情尚懷疑惑謚獨竭誠歸事太祖以本官領尚書左丞順帝昇明元年遷黃門侍郎左丞如故沈攸之事起議加太祖黃鉞謚所建也齊建元元年爲侍中及太祖不豫謚稱疾不入帝頗疑其怨不豫顧命也武帝卽位謚又不遷官以此怨望及帝不豫謚請豫章王嶷請問曰至尊非起疾東宮又非才公今欲

作何計武帝知之出謚爲鎮北長史東海太守未發
帝使御史中丞沈冲奏謚前後罪曰謚少懷輕躁長
習諂薄交無義合行必利動特以奕世更局見擢宋
朝而阿諛內在貨賂公行咎盈憲簡戾彰朝聽輿金
輦寶取容近習以沈攸之地勝兵強終當得志委心
託身歲暮相結以劉景素親屬望重物應樂推獻誠
薦子窺闕非望時艱綱漏得全首領太祖翊正天地
方弘遠圖薄其難洗之瑕許其革音之効加以非分
之寵推以不次之榮列迹勲良比肩朝德以往者微
勤刀筆小用掌厠河山任忝出入輕險之性在貴彌

彰貪昧之情雖富無蒲重蒞湘部顯行斷盜及居銓
衡肆意受納連席同乘皆設邪舊侶密延閑譙必貨
賄嘗客理合升進者以爲已惠事宜貶退者並稱中
旨謂馭鬻威權姦狀不露欺主罔上姦議可掩先帝
寢瘼彌留人神憂震謚託病私舍曾無變容國諱經
旬甫斃人殿參訪遺詔覘恃時旨以身列朝流宜蒙
兼帶先顧不逮舊位無加遂崇飾惡言肆醜縱悖謗
誹朝政訕毀皇猷遍嗤忠賢歷詆台相至於蕃獄入
授列代嘗規勲戚出撫前王爨則而謚妄發樞機坐
構囂論復貶謗儲后不顧辭端毀折宗主每窮舌抄

皆云誥誓乖禮崇極失宜仰指天俯畫地希幸災故
以申積憤犯上之迹旣彰反噬之情已著請免官削
爵土收送廷尉獄治罪死

陳沈客卿後主時爲中書舍人性便佞忍酷每立異
端唯以刻削百姓爲事繇是自進有施文慶者起自
微賤有吏用後主拔爲主書遷中書侍郎俄擢爲湘
州刺史未及之官會隋軍來伐四方鎮相繼以聞文
慶客卿俱掌機密外有表啓皆申其奏呈文慶心悅
湘州重鎮莫欲早行途與客卿共爲表裏抑而不言
後主弗之知也遂以無備至乎敗國實二人之罪隋
軍旣入並戮之於前關

孔範後主時爲都官尚書隋師臨江後主從容而言
曰齊兵三來周師再至無復摧敗彼何爲者範曰長
江天塹古以爲限隔南北今日北軍豈能飛渡耶臣
每恨官卑彼若渡來臣爲太尉矣後主太悅因奏妓
縱樂賦詩不輟

後魏崔亮爲御史中尉時邢巒爲度支尚書侍中盧
昶與巒不平昶與元暉俱宣武所寵亮昶之黨也昶
暉令亮糾巒事成許言於帝以亮爲侍中亮於是奏
劾巒在漢中掠良人爲奴婢巒懼爲昶等所陷乃以

漢中所得巴西太守龐景民女化生等二十餘口與
暉化生等數人奇色也暉大悅乃背昶爲齋言於帝
云齋新有大功已經赦宥不宜方爲此獄帝納之高
肇以齋有尅敵之效而爲昶所排助齋申釋故得不
坐

李紳執孝明時爲員外嘗侍光祿大夫爲靈太后寵
遇勢傾朝野時云見幸帷幄與鄭儼爲雙時人莫能
明也

徐統爲黃門侍郎性浮動慕權利外似審正內實諂
諛時豪勝已必相陵駕書生貧士矯意禮之其詭態
若此有識者鄙薄焉

魏蘭根孝莊時爲中書令帝之將誅爾朱榮也蘭根
聞其計遂密告爾朱世隆榮死蘭根恐帝知之憂懼
不知所出時應詔王道習見信於帝蘭根乃託附之
求得在外立功道習於啓聞乃以蘭根爲河北行臺
棊攜出帝時爲左光祿大夫儀同三司攜佞巧能候
當途斛斯椿賀拔勝皆與友善斛斯椿之構間也出
帝令攜奉詔晉陽齊獻武王集文武與攜申釋辭屈
而退

北齊薛琰累遷尚書僕射又在省闈開明簿領當官

割斷敏遠如流然天性險忌情義不篤外似方格內實浮動受納貨賄曲法舞文深情刻薄多所傷害士民畏惡之

祖珽字孝徵武成時爲中書侍郎初孝徵善爲胡桃油以塗畫進之長廣王因言殿下有非嘗骨法孝徵夢殿下乘龍上天王謂曰若然當使兄大富貴及帝卽位擢孝徵中書侍郎帝嘗於後園使珽彈琵琶和士開胡舞各賞物百段士開忌之出爲安德太守轉齊郡太守以其母老乞還侍老詔許之會江南使人來聘爲中勞使尋爲散騎嘗侍假儀同三司掌詔詰

初珽於乾明皇建之時知武成陰有大志遂深自結納曲相祗奉武成於天保世頻被責心嘗銜之珽至是希旨上書謂追尊太祖獻武皇帝爲神武高祖文宣皇帝改爲威宗景烈皇帝以悅武成從之時皇后愛少子東平王儼願以爲嗣武成以後主體正居長難於移易珽私於士開曰君之寵幸振古無二宮車一日晚駕欲何以克終士開因求策焉珽曰宜說主上云襄宣昭帝子俱不得立今宜命皇太子早踐大位以定君臣若事成中官少主皆德君此萬全計也君且微說令主上粗解珽黨自外上表論之士開許

諾因有慧星出太史奏云除舊布新之徵珽於是上
 書言陛下雖為天子位是極貴案春秋元命苞云乙
 酉之歲除舊革政今年太歲乙酉宜傳位東宮令君
 臣之分早定且以上應天道并上魏獻文禪子故事
 帝從之繇是拜祕書監加儀同三司大被親寵既視
 重二宮遂志於宰相先與黃門侍郎劉逖友善及疏
 侍中尚書令趙彥深侍中左僕射元文遙侍中和士
 開罪狀令逖奏之逖懼不敢通其事頗泄彥深等先
 詰帝自陳大怒執珽詰曰何故毀我士開珽因厲聲
 曰臣繇士開得進本無毀之之意陛下今既問臣臣

不敢不以實對士開文遙彥深等專弄權威控制朝
 廷與吏部尚書尉瑾内外交通共為表裏賣官鬻獄
 政以賄成天下譎謠若為有識所知安可聞於四裔
 陛下不以為意臣恐大齊之業隳矣帝曰爾乃誹謗
 我珽曰不敢誹謗陛下取人女對曰我以其儉餓故
 收養之珽曰何不開倉賑給乃買取將入後宮乎帝
 益怒鞭杖亂下將撲殺之大呼曰不殺臣陛下得命
 若欲得命莫殺臣為陛下合金丹遂少獲寬放珽又
 曰陛下有一范增不用之如何帝又曰爾自作范增
 以我為項羽邪珽曰項羽人身亦何繇可及但天命

不至爾項羽布衣率烏合衆五年而成霸王業陛下
藉父兄之資纔得至此臣以項羽未易可輕臣何止
方於范增縱張良亦不能及張良身傳天子猶因四
皓方定漢嗣臣位非輔弼疏外之人竭力盡忠勸陛
下禪位使陛下尊爲太上子居宸扆於已及子俱保
休祚蕞爾張良何足可數帝愈怒令以土塞其口琤
且吐且言無所屈撓乃鞭二百配甲坊尋徙光州武
成厭世後主憶之就除海州刺史是時陸媪弟悉達書曰趙
朝政其子穆提婆愛幸琤乃遣陸媪弟悉達書曰趙
彥深心腹陰沈欲行尹霍事儀同姊弟豈得平安何

不早用智士耶和士開亦以琤能決大事欲以爲謀
主故棄舊怨虚心待之與陸媪言於帝曰襄宣昭三
帝其子皆不得立今至尊猶在帝位者寔猶祖考徵
此人有大功直報重恩孝徵心行雖薄奇畧出入緩
急直可憑仗且其雙盲必無反意請喚取問其謀計
從之入爲銀青光祿大夫秘書監加開府儀同三司
和士開死後仍說陸媪出彥深以琤爲侍中在晉陽
通密啓請誅瑯琊王其計旣行漸被任遇又太后之
被幽也琤欲以陸媪爲太后撰魏帝皇太后故事爲
太姬言之謂人曰太姬雖云婦人實是雄傑女媼以

來無有也太姬亦稱珽爲國師國寶繇是拜尚書左僕射監國史加特進入文林館總監撰書封燕郡公食太原郡給幹兵七十人所住宅在義井坊旁柘鄰居大事脩築陸媪自往案行勢傾朝野珽又附陸媪求爲領軍後主許之詔須覆述取侍中斛律孝卿署名李卿密告高元海語候呂芬穆提婆云孝徵漢兒兩眼又不見物豈合作領軍也明且面奏且陳珽不合之狀并書珽與廣寧王孝行交結無大臣體珽亦面思帝令引入珽自分疎并云與元海素相嫌必是元海譖臣帝弱顏不能諱曰然珽列元海共司農卿

尹子華大府少卿李叔元平淮令張叔略等結朋樹黨逐除子華仁州刺史叔元襄城郡太守叔畧南營州錄事參軍陸媪又唱和之復除元海鄭州刺史珽自是專主機衡總知騎兵事內外親戚皆得顯位後主亦令中要數人扶持出入著紗帽直至永巷出萬春門向聖壽堂每同御榻決論政事委任之重群臣莫比自和士開執政以來政體隳壞珽推崇高望官人稱職內外稱美復欲增損政務沙汰人物始奏罷京畿府併於領軍百姓皆歸郡縣宿衛都督等號位從舊官名文武服章並依故事又欲黜諸閹監及群

小輩推誠延士爲致安之方陸媪穆提婆議頗同異
珽乃諷御史中丞麗伯律令劾主書王子冲納賄知
其事連穆提婆欲使贓罪相及望因此坐并及陸媪
猶恐後主溺於近習欲因后黨爲援請以皇后兄胡
君瑜爲侍中中領軍又徵君瑜兄梁州刺史君璧欲
以爲御史中丞陸媪聞而懷怒百方排毀卽出君瑜
爲金紫光祿大夫解中領軍君璧還鎮梁州皇后之
廢頗亦繇此王子冲釋而不問珽日以益疎又諸官
者更共譖毀之無所不至後主問諸太姬憫嘿不對
三問乃下牀拜曰老婢合死本見和士開道孝徵多

才博學言爲善人故舉之此來看之極是罪過人實
難知老婢合死後主令韓長鸞簡案得出勅受賜十
餘事以前與其重誓不殺遂解珽侍中僕射出爲北
徐州刺史珽求見後主韓長鸞積嫌於珽遣人推出
栢閣珽故求面見坐不肯行長鸞乃令軍士牽曳而
立珽於朝堂大加誚責上道後令追還解其開府儀
同郡公直爲刺史卒於州

和士開武成時爲右僕射深見親狎言辭容止極諸
鄙褻以夜繼晝無復君臣之禮至說武成云自古帝
王盡爲灰燼舜堯桀紂竟復何異陛下宜及少壯恣

册册元
好邪一
卷之四十七

意作樂縱橫行之一日快活敵千年國事分付大臣
何慮不辦無爲自勤苦也武成大悅其年十二月武
成寢疾於乾壽殿士開入侍醫藥武成謂士開有伊
霍之才殷勤屬以後事握士開之手曰勿負我也仍
絕於士開之手後主以武成顧託深委仗之又先得
幸於胡太后是以彌見親密

徐之才武成時爲侍中帝生齒牙問諸醫尚藥典御
鄧宣文以實對帝怒而撻之後以問之才拜賀曰此
是智牙生智牙者聰明長壽帝悅而賞之

元文遙後主時爲左僕射爲侍中嘗探測上旨時有

委巷之言故不爲知音所重

韓鳳後主時爲侍中領軍總知內省機密武平陳人
寇彭城後主發言憂懼鳳進曰縱失河南猶得爲龜
茲國子淮南今沒何足多慮人生幾時但爲樂不須
愁也帝甚悅遂耽荒酒色不以天下爲虞未幾爲周
所滅

後周鄭譯宣帝初拜內史中大夫甚委任之譯乃獻
新樂十二各一笙用十六管帝令與太宗伯解斯徵
議之徵駁其奏帝頗納焉及高祖山陵還帝欲作樂
復令議其可不可徵曰孝經云聞樂不樂聞尚不樂其

册册元
臺省部
卷之四十七
十七

册府元龜 奸邪一

况作乎譚曰既云聞樂明即非無後徵上疏極諫帝
不納譚因譖之遂下徵獄遇赦得免

册府元龜

册府元龜

巡按福建監察御史臣李嗣京 訂正

新建縣舉人 臣戴國士參閱

知建陽縣事 臣黃國琦較釋

臺省部 二十四

奸邪第二

隋王邵為員外散騎侍郎高祖夢欲上高山而不能
得崔彭捧脚李盛扶肘得上因謂彭曰死生當與爾
俱邵曰此夢大吉上高山者明高崇太安永如山也
彭猶彭祖李猶李老二入扶持實為長壽之徵帝聞

册府元龜 臺省部

卷之四百八十一

之喜見容色其年高祖厭世未幾崔彭亦卒煬帝嗣位二三諒作亂帝不忍加誅邵上書曰臣聞黃帝滅炎蓋云母弟周公誅管信亦天倫叔向戮叔魚仲尼謂之遺直石碣殺石厚丘明以爲大義此皆經籍明文帝王常法今陛下置此逆賊廢越前聖含弘廣大未有以謝天下謹按賊諒毒被生民者也古者同德則同姓異德則異姓故黃帝有二十五子其得姓者十有四人惟青陽夷彭與黃帝同爲姬姓諒旣自絕請改其氏邵以此求媚帝依違不從

唐封德彝高祖時爲檢校吏部尙書初德彝爲天策上佐預從征討太宗以是厚遇之德彝亦數薦策似輸誠節而背同卽異情持兩端陰附隱太子齊王然每入朝佯爲靜默諸王與語畧無所對又示儉約杜絕交游居處服章類皆卑陋乃陰受宮府賂遺家財委積而人莫之知其矯情飾詐咸此類也兼自負才辯常任智數與人主言亦行鈎距探求意旨而將順之及楊文幹反禍連諸后當行廢立之事高祖猶豫謀及德彝乃包藏隱匿曾不正言兩僥其利幾危社稷然其所爲秘隱時人莫知及遇疾車駕親自臨省卒後德彝奸計始覺

李義府高宗時爲中書舍人大尉長孫無忌惡之奏請左延爲壁州司馬詔書未至門下義府密知之又有中書舍人王德儉卽許敬宗之甥也瘦疾多智時人號爲智囊義府事迫問計於德儉德儉曰武昭儀特承恩顧主上意欲立爲皇后猶豫未決者直恐宰臣異議爾公若能建策立之則轉禍爲福坐致富貴義府然之其日代德儉宿直叩閣上表請廢皇后王氏立武昭儀以厭兆庶之心帝乃悅召見與語賜以珍物詔留爲舊職昭儀又密遣勞勉之超遷中書侍郎侍寵用事聞婦人淳于氏有美色坐事繫大理乃訊大理寺丞畢正義枉法出之將納爲妾或有密言其狀者帝令給事中劉仁軌侍御史張綸鞠之義府恐洩其謀遂逼正義自縊於獄中

許敬宗高宗時爲禮部尚書弘文館學士帝將廢皇后王氏而立武昭儀爲后韓瑗來齊諫皆不納敬宗宣言於朝曰田舍公贖種得十斛麥尚欲換却舊婦况天子富有四海立一皇后有何不可闕諸人何事妄生異議昭儀令左右以聞帝意乃定旣爲贊成立后之策又與李義府希旨構成長孫無忌褚遂良韓瑗之罪繇是甚承恩顧

傅游藝則天臨朝時爲左補闕上書稱武氏瑞合華
姓受命則天甚悅擢爲給事中數月加同鳳閣鸞臺
平章事

崔湜中宗初爲考功員外郎是時桓彥範敬暉等秉
國政懼武三思讒間引湜爲耳目使伺其動靜俄而
中宗數昵三思於是三思寵漸厚湜乃反以桓敬計
議潛告三思尋遷中書舍人及桓敬等流於嶺外湜
又說三思宜盡殺之以絕其歸望三思問誰可使者
湜薦表兄周利貞利貞爲桓敬等所惡自侍御史出
爲嘉州司馬湜乃舉充此行桓敬等聞利貞至乃自

殺中宗於宮掖無禁昭容上官氏屢出外與三思同
寢處或累日不歸三思自嫌衰老舉湜自代繇是中
宗及後宮眷遇彌厚湜與鄭愔同掌選賣官鬻獄一
時巨蠹竝爲御史所彈中宗勅所司以理勘問勿加
窮迫繇是希旨無所發明然猶斷愔配流領南湜貶
江州司馬而更授湜襄州刺史愔江州司馬

鄭愔中宗時爲中書舍人神龍三年春遣使乾陵祈
雨于則天皇后旣而降雨帝大悅特制令武氏崇恩
廟一依舊禮享祭仍置五品令七品丞其吳陵順陵
置令入崇恩廟愔旣素爲德靜郡王武三思所引進

又苟求親媚於三思乃上則天聖感頌頌奏帝大悅
加愜朝散大夫

張景源中宗時為補闕神龍中武三思用事景源希
三思上疏曰陛下以仁孝理國以名教齊人微號之
聞宜超夔古理有未便冒觸天慈伏見天下諸州各
置一大唐中興寺觀者故以式標昌運光贊洪名聖
圖遠著無得而稱焉竊有未廣敢進芻言至如承昌
登封創之為縣名者是先聖受圖勒石之所陛下思
而奉之不令改易今聖善報慈題之為寺閣者陛下
申恩竭力之致故崇而仰之獨昭其號伏惟應天皇

帝陛下深仁至孝之德古先帝代未之前聞也况唐
運自隆周親撫政母成子業周贊唐興雖有紹三朝
而化牟一統既承顧復非謂中興夫言中興者中有
阻間不承統歷既奉成周之業寔揚先聖之資君親
臨之後莫重之中興立號未益前規以臣愚見所置
大唐中興寺觀及圖史并出制誥咸請除中興字直
以唐龍興為名庶望前後君親俱承正統周唐寶歷
共協神聰帝納之因降勅曰朕承天宰物光宅中區
嗣祖宗之不基承聖善之洪業嚮明負辰寔奏成規
往自永淳至於天授奸臣稱亂鼎運不安則天大聖

皇后思顧託之隆審變通之數忘已濟物從權御宇四海繇其率順萬姓所以咸寧唐周之號暫殊社稷之祚斯永天保定爾實繇於茲朕所以撫璇璣握金鏡事惟繼體義卽續戎其若文叔之起春陵少康之因陶正中興之號理異於茲宜革前非以歸事實自今已後更不得言中興其天下大唐中興寺觀宜改爲龍興寺觀諸如此例竝卽令改遂授景源朝散大夫未幾又擢拜起居舍人是時右補闕權若訥見鄭愔等旣妄稱天后德業皆獲榮貴復上疏曰臣聞詩人闡教深懷罔極之思孔氏立言式崇無改之道惟

伏應天皇帝陛下孝德純至超越禮經聖感潛通光昭瑞應置應善報慈之閔義貫於中天存合宮未昌之號敬深於如在伏見天地日月君臣國人授載初慶殿等字皆先朝創制久已施行陛下纂承丕緒嗣守洪業母子相傳國家仍舊此竝則天能事生人積習何所要切登時削除當爲賊臣敬暉等秉政包藏逾節前規務從變易所以多有改張今削之無益於淳化存之有光於孝理又神龍元年三月五日制書一事已上竝依貞觀故事者但則天遺訓誠曰母儀太宗舊章是稱祖德其於公襲應從遠近無容近捨

母儀遠尊祖德昔永徽之始不聞依式武德舊章今
陛下膺期乃欲追貞觀故事如其遠依貞觀實恐未
益先朝以臣愚誠請便詳審則望繼明纂聖之業無
替始終奉先成志之道增耀竹帛疏奏手制答曰卿
資孝踐忠懷才韜義討論今古皆據典章循覽所陳
再三嘉尚若訥雖曲蒙恩旨褒美頗爲正直者所譏
竇懷貞神龍初爲御史大夫兼雍州刺史在御史臺
及雍州每理辭訟乍見無鬚者諸以爲宦官必曲加
承奉監察御史魏傳弓以中嘗侍輔信義尤縱暴將
奏請寘之于法懷貞曰輔嘗侍深爲安樂公主所信

任權勢甚高言成禍福何得輒有彈奏傳弓曰今王
綱漸壞君子道消正繇此輩擅權耳若得今日殺之
明日受誅無所恨懷貞無以答但固止之
黎幹代宗末爲兵部侍郎性險佞挾左道結中貴以
希主恩帝甚信惑之中官劉忠翼寵任方盛幹結之
素厚嘗通其姦謀及德宗卽位幹猶以詭道求進密
居輿中詣忠翼事覺配流旣出市里兒童數人噪聚
懷瓦礫投擊之捕賊尉遮不能止

令孤峘建中初爲禮部侍郎有杜封者故宰相鴻漸
之子求補弘文生宰相楊炎嘗出杜氏門下以託峘

峴謂使者曰相公誠憐封欲成其名乞署封名下一字峴因得以記焉炎不意峴之賣已乃署名託峴峴明日流言宰相炎迫臣以私臣從之則負陛下不從則炎當害臣德宗以問炎炎具道所以德宗怒曰此姦人不可柰欲杖殺之炎救解乃黜爲衡州別駕裴延齡德宗時貞元中爲戶部侍郎判度支貴欲異同宰府張薦爲右諫議大夫史館修撰延齡乃言於德宗諫議大夫論朝廷得失之官史館修撰書朝廷得失之事則領史職者不宜爲諫官故以薦爲秘書少監陸贄爲相知天下皆嫉怒延齡而延齡獨幸於

天子贄陳其不可用延齡知之謗毀百端天子益信延齡而罷贄相貞元十一年春旱德宗數獵苑中延齡疏言贄等失權怨望言於衆曰天下旱百姓且亡度支愛惜不肯支給諸軍人馬無所食其可柰何以搖動群心其意非止於中傷臣而已數日又獵苑中會神策軍人跪馬前云度支不給馬草德宗憶延齡前言卽廻馬而歸繇是貶贄爲忠州別駕李克張滂等皆斥逐德宗怒未解勢不可測賴陽城等救乃止李齊運貞元中爲禮部尙書十餘年宰臣內殿侍對後齊運當次進貢其計慮以決群議齊運無學術不

知大體但其言取信而已

韋執誼以對策高等驟遷拾遺年二十餘入翰林巧
慧便辟媚幸於德宗而性貪婪詭賊

王叔文順宗卽位自翰林待詔除起居舍人翰林學
士俄充度支及諸道鹽鐵轉運等副使依前充翰林
學士叔文越州人以碁待詔翰林嘗侍碁東宮頗自
言讀書知理道乘間嘗言人間疾苦會帝將大論宮
市事叔文說中帝意遂有寵因爲帝言某可爲相某
可爲將幸異日用之密結韋執宜及有當時名而僥
倖欲速者陸賈呂溫李景儉陸泰陳諫柳宗元劉禹

錫等十數人定爲死交而凌準程戢等又因其黨以
進日與游處蹤跡詭秘莫知其端者藩鎮長師頗有
微聞陰進資幣請交者初得志首用韋執誼其嘗所
與結交者相次拔擢王一日除數人日夜群衆圖議
狂狡其黨中人偶言曰某可以爲官隔一二日輒以
得之叔文專內外之政與其黨謀曰判度支則國賦
在手可以厚結諸用事人取兵士心固其權又懼驟
領衆職人心不服籍杜佑雅有會計之才位重而務
省年老易可制故先令佑主其名而除已爲副以專
之又以戶部尚書判度支王紹爲兵部尚書以吏部

郎中李鄘爲御史中丞武元衡爲左庶子初叔文之黨數人貞元末已爲御史在臺元衡薄其爲人待之莽鹵皆有所憾而叔文又以元衡在風憲欲使其黨誘以權利元衡不爲之動叔文怒遂有此授叔文將援其黨韓泰以兵柄利范希朝老疾易乃命爲左右神策京西諸城鎮行營節度使鎮於奉天而以泰爲副欲因代之未幾授叔文戶部侍郎依前充度支及諸道鹽鐵轉運等副使初叔文欲依前帶翰林學士內官俱文珍等惡其專擅削去翰林之職叔文見制書大驚謂人曰叔文須時至此商量公事若不帶此

院職事則無因而至矣其黨散騎嘗侍王伾卽疏請不從再疏乃許三五日一入翰林竟去學士之名與歸登同日賜紫內出象笏賜登而叔文爲文珍等所惡獨不得賜繇此始懼叔文以母死歸第王伾自俛任自叔文歸第失據日詣中人及杜又請起叔文爲相且總北軍旣不則請以爲威遠軍使平章事又不得其黨皆憂悸不自保任至其日坐翰林中疏三上不報知事不濟行且卧至夜忽叫曰伾中風矣明日逮輿歸不出俄以倉部郎中判度支按陳諫爲河中少尹伾叔文之黨也伾杭州人以侍書幸寢陋語帝

所褻狎而叔文頗任氣自許微知文義好言事帝以故稍敬之不得如佞出入無阻叔文入止翰林而佞亦至翰林院見李忠言牛昭容等故各有所主佞往來傳授劉禹錫陳諫韓皐韓泰柳宗元房啓凌準等主謀議唱和採聽外事求媚藩鎮日加大官除大尉中書令司徒司空平章事尚書僕射者相繼帝疾久不瘳內外皆欲早定太子位叔文默不發議已立太子天下喜而叔文獨有憂色常吟杜甫題諸葛亮詩末句云出師未捷身先死長使英雄淚滿襟因歔歔流涕聞者咸竊笑之雖判兩使未嘗以簿書爲事日

引其黨屏人竊細語謀奪納官兵柄以制四海之命旣令范希朝韓泰總京西諸城鎮行營兵馬矣而中人尚未悟會邊上諸將各以狀辭中尉且言方屬希朝中人始悟其兵柄爲叔文等所奪乃大怒曰從其謀吾屬必死其手密令其使歸告諸將曰無以兵屬人希朝至奉天諸將韓泰馳歸白之叔文計無所出唯曰柰何無幾而母死執誼益不用其語叔文怒與其黨日夜謀起復必先斬執誼而盡誅不附已者聞者恟懼皇太子旣監國逐之明年乃殺之叔文母將死前一日以五十擔酒饌入翰林讌李忠言劉光奇

俱文珍及諸學士等大飲叔文執盞言曰叔文母幾病自以身任國家事勞苦朝夕不得歸侍醫藥今方將求假而歸比來盡心力不避好惡難易者皆爲朝廷不爲叔文私家也今一去坐家百謗且至誰肯助叔文一言者望諸公開意見察又曰羊士諤毀叔文叔文將挾殺之而韋執誼懼不敢劉闢以韋臯迫脅叔文求都領三川叔文平生不識闢叔文今日名位何如叔領事輕重而闢乃外使判官排門相干欲前執叔文手豈非凶人耶叔文時已令歸木場將集衆斬之韋執誼又苦執不可每恨失此兩賊令人不快

又自陳判度支已來所爲國家興利除害出若干錢以爲功能俱文珍隨語折之叔文無以對命滿酌雙雙對對飲酒數行而罷方飲時有暫起至廳側者聞叔文從人相謂曰母死已梟不欲棺斂方與人飲酒不知欲何爲所歸之明日而其母死或傳母死數日匿喪乃發叔文最所賢重者李景儉而最所謂竒才者呂溫叔文用事時景儉持母喪於東都而呂溫使吐蕃中半年及叔文敗方歸故二人皆不得用叔文敗後數月乃貶執誼上爲崖州司馬後數年病死海上

裴均憲宗時爲僕射判度支交結權幸欲求宰相先是上策試直言極諫科其中外有譏刺時事忤犯權幸因此均黨揚言皆執政指教冀以搖動宰輔李吉甫賴諫官李約獨孤郁李正辭蕭俛密疏陳奏帝意乃解

張宿爲諫議大夫淄青宣慰使至東都暴卒陰事使左右以圖進取歿於道路正直相賀

于敖爲給事中敬宗初卽位宰相李逢吉內庭連結權傾天下惡李紳曰直與其黨共搆紳自戶部侍郎貶端州司馬又貶翰林學士駕部郎中知制誥龐嚴

爲信州刺史翰林學士司封員外郎知制誥蔣防爲汀州刺史嚴防皆紳之所引敖素與嚴不薄及貶官勅到門下省敖封還之時人凜然皆相謂曰于給事犯宰相怒爲蔣龐申屈及駁奏下乃是論貶嚴太輕中外之人無不大笑之

張權輿敬宗時爲拾遺寶曆初李逢吉在相位不直中外人情咸思裴度入相帝亦微聞其事度時任興元節度使每有中官出使至興元必傳示密旨且有徵還之約及獻疏請覲逢吉之徒皆不自安百計隳沮張權輿旣爲所嗾尤出死力乃上疏云度名應圖

識宅據崗原不召而來其旨可見蓋嘗有人與偽增
識詞非衣小兒坦其腹天上有口被驅逐言度魯征
討淮西平吳元濟也又帝城東西橫亘六崗符易象
乾卦之數度永樂里第偶當其第五崗故權輿得以
爲詞盡欲成事賴帝聰察竟不能動搖

蘇楷哀帝天祐末爲起居郎楷禮部尚書循之子凡
劣無藝乾寧二年應進士登第後物論以爲濫昭宗
命翰林學士陸扆秘書監馮渥覆試黜落永不許入
舉場楷負愧銜怨至是會朱全忠逆君上宰相柳璨
陷害朝臣乃與起居郎羅衮起居舍人鼎連署狀駁

昭宗謚號楷目不知書手僅能執筆其文羅衮作也
時政出賊臣哀帝不能制太嘗卿張廷範改謚曰恭
靈莊閔孝皇帝廟號襄宗全忠雄猜鑿物自楷駁謚
後深鄙之旣傳代之後楷循父子皆斥逐不令在朝
周許遜太祖時爲左司郎中順廣元年正月遜上言
乞追贈宰相李崧遜蜀人在漢與宰相蘇逢吉有舊
頗親狎遜待之有德色李崧之遇害也遜嘗與一二
牧守交言短崧之爲人且言被誅繇已而致牧守信
之亦懼而趨其第者至是以太祖受命之初乃有是
奏請雪崧寃士人鄙之

册府元龜

奸邪二

卷之四十四

宋薛宣燕京士人稱文

文亦時而欲其以休室

外亦交言武燕文燕人

陳於外燕燕文休燕

子度讓燕休文燕燕

風書燕太燕燕燕式

燕燕燕燕燕燕燕燕

燕燕燕燕燕燕燕燕

燕燕燕燕燕燕燕燕

册府元龜

